


Ellen G. White Estate

A photograph of a white lighthouse on a cliff overlooking the ocean at dusk. The lighthouse is illuminated from within, and the sky is a mix of blue and orange. In the foreground, there are silhouettes of palm trees and other vegetation. The background shows a range of mountains under a cloudy sky.

ROT I GO LONG JISAS

ELLEN G. WHITE



Ellen G. White Estate

ROT I GO LONG JISAS

ELLEN G. WHITE

ROT I GO LONG JISAS

Ellen G. White

Copyright © 2014, Ellen G. White Estate, Inc.

Biknem Bilong Ol Sapta

[Information about this Book](#)

[Tok Bilong God](#)

[Sapta 1—Marimari Bilong God](#)

[Sapta 2—Man I Mas Kisim Jisas](#)

[Sapta 3—Tanim Bel](#)

[Sapta 4—Autim Sin](#)

[Sapta 5—Bilong Givim Laip Long God](#)

[Sapta 6—Bilip Na God I Kisim Bek](#)

[Sapta 7—Mak Bilong Trupela Disaipel](#)

[Sapta 8—Kamap Man Tru Bilong Jisas](#)

[Sapta 9—Wok Na Laip](#)

[Sapta 10—Bilong Save Long God](#)

[Sapta 11—Prea](#)

[Sapta 12—Bilong Stretim Tingting](#)

[Sapta 13—Bikpela Amamas Bilong Ol Kristen](#)

Information about this Book

Overview

This eBook is provided by the [Ellen G. White Estate](#). It is included in the larger free [Online Books](#) collection on the Ellen G. White Estate Web site.

About the Author

Ellen G. White (1827-1915) is considered the most widely translated American author, her works having been published in more than 160 languages. She wrote more than 100,000 pages on a wide variety of spiritual and practical topics. Guided by the Holy Spirit, she exalted Jesus and pointed to the Scriptures as the basis of one's faith.

Further Links

[A Brief Biography of Ellen G. White](#)

[About the Ellen G. White Estate](#)

End User License Agreement

The viewing, printing or downloading of this book grants you only a limited, nonexclusive and nontransferable license for use solely by you for your own personal use. This license does not permit republication, distribution,

assignment, sublicense, sale, preparation of derivative works, or other use. Any unauthorized use of this book terminates the license granted hereby.

Further Information

For more information about the author, publishers, or how you can support this service, please contact the Ellen G. White Estate at mail@whiteestate.org. We are thankful for your interest and feedback and wish you God's blessing as you read.

Tok Bilong God

Nem bilong dispela buk i soim wok bilong en. Em i makim Jisas em i helpim bilong olgeta man na meri, na em i save soim rot long man na meri i gat tupela tingting long rot bilong kamap wanbel na bel isi. Sapos wanpela man i painim stretpela pasin dispela buk i soim rot man o meri i ken wokabout na i kamap Kristen, na bai inap kisim bikpela blesing long laip bilong en long wanem em i givim bel pinis long Jisas na i kisim bikpela marimari na helpim long dispela man em i “Pren bilong ol sinaman.” Tok i stap long dispela buk i bin helpim planti man na meri long painim gut rot bilong Kristen na man i kamap pinis long rot bilong Kristen em i helpim tu ol long kisim bikpela amamas long laip bilong ol taim ol i bihainim bikpela Lida bilong ol. Laik bilong mipela bai i helpim tu planti manmeri moa ol i nidim yet dispela kain helpim.

*“Rot bai i klia,
Lata i go long heven.”*

Em olsem i kamap long Jekop taim i pret tru sin bilong en i autim em longwe long God, na i laik malolo na i lindaun, na “wanpela driman i kam long em na i lukim wanpela lata, as bilong dispela lata i stap long graun na antap bilong en i kamap long heven.” Long dispela driman Jekop em i kisim save God i kamapim rot bilong skruim gen heven na graun na dispela dripman em i harim gutpela tok long dispela Man i sanap antap long dispela lata. I gutpela sapos dispela save i kam long olgeta man i ritim dispela buk.

[8] [9]

Sapta 1—Marimari Bilong God

Ol samting God i wokim, na ol samting God i tokim, em i soim marimari bilong God. Papa bilong yumi long heven, em i as tru bilong laip, save, na bilong ol gutpela kain amamas. Yumi tingting liklik long ol samting God i wokim. Lukluk bilong em i gutpela long ai bilong yumi. Yumi tingting olsem wanem, ol dispela samting em bilong helpim yumi na bilong mekim yumi amamas tru. wantaim ol kain samting i gat laip. San na ren, maunten na solwara em i mekim dispela graun i amamas, na em tu i tok long yumi long marimari bilong dispela God i wokim dispela graun. God yet i givim long man, na pisin na long ol samting i gat laip inap long olgeta de. Devit i tok olsem -

*“Ai bilong ol i wet long God;
Na yu yet i givim kaikai long taim bilong ol.
Yu opim han bilong yu,
Na pulimapim laik bilong ol samting i gat laip.”*

- Sam 145: 15, 16.

Pastaim God i bin mekim man i stret tru na man i amamas. Na dispela graun taim God i wokim, i no gat wanpela mak nogut, na i no gat wanpela mak bilong dai. Pasin bilong man - pasin bilong brukim lo bilong God (dispela lo i soim marimari bilong God) - em i mekim pasin nogut i kisim dispela graun. Tasol God i mekim marimari bilong em i stap yet namel long ol pasin nogut na sin. [10] Baibel i tok God i larim dispela pasin nogut i kam long helpim man. Jenesis 3: 17. Diwai i gat nil, na diwai i gat mosong - samting nogut i mekim wokabaut bilong man i hat tru - dispela samting God i larim bilong helpim man, na bilong skulim man, na bilong helpim man i kirap na lusim pasin nogut bilong sin. Tru dispela graun i gat planti pasin nogut, tasol God i no pulapim graun olgeta long samting i mekim sori i kisim man. Insait namel long ol pasin nogut i gat sampela samting i mekim man i amamas. Long diwai i gat nil, na diwai i gat mosong, i gat plaua na pikinini bilong diwai wantaim.

Dispela tok - God em i marimari - em i stap long olgeta plaua na olgeta gras. Ol pisin i mekim gutpela krai, ol gutpela smel bilong sanda bilong ol plaua, ol diwai bilong bus na gutpela lip bilong ol - olgeta i tokautim dispela marimari bilong God Papa, na laik bilong en long mekim pikinini bilong en i ken amamas.

Toktok bilong God i soim wok na pasin bilong en. Em yet i soim sori na marimari bilong en. Taim Moses i prea long God, “Soim mi olgeta glori bilong yu,” God i bekim tok long Moses, “Mi ken soim yu ol gutpela pasin bilong mi.” Eksodas 33: 18, 19. Dispela em i glori bilong God. Na bihain i soim em long Moses, na em i tok olsem, “Mi God, mi gat bikpela marimari long yu, na mi inap long tekewe olgeta pasin nogut.” Eksodas 34: 6, 7. “Yu God bilong marimari. Yu no save belhat kwik,” “Long wanem, yu plis moa long marimari.” Jona 4: 2; Maika 7: 18.

God em i pasim yumi long em long planti mak moa i stap long heven na long dispela graun. Long ol samting God i wokim, na long marimari bilong man na meri na pikinini, God i traim long soim yumi pasin bilong em yet. Tasol ol dispela i no mekim klia marimari bilong God. Tru God i givim ol dispela piksa long pasin bilong en, tasol birua bilong ol gutpela pasin em i pasim tingting bilong man, na ol i lukim God na ol i pret. Ol i tingim God i gat bikpela kros, olsem em i hatpela na em i no save lusim tingting [11] long ol pasin bilong man. Seten em i laik yumi ken tingting, God i redi long kros moa long yumi, na em i save lukim yumi bilong painim pasin nogut na givim kalabus long yumi. Bilong rausim dispela kain tingting, na bilong soim marimari bilong God, Jisas i kam na stap wantaim man.

Pikinini bilong God i lusim heven bilong soim pasin bilong Papa bilong en. “I no gat wanpela man i bin lukim God liklik. Nogat tru. Dispela wanpela Pikinini bilong God, em i stap klostu tru long Papa, em i autim as bilong God long yumi.” Jon 1: 18. “Na i no gat wanpela man i save long Papa. Pikinini tasol em i save long em. Na ol man Pikinini i soim Papa long ol, ol tu ol i save long Papa.” Matyu 11: 27. Taim wanpela disaipel em i askim Jisas, “Bikpela, yu soim Papa long mipela,” Jisas i bekim olsem, “Longpela taim pinis mi stap wantaim yupela, na yu no save yet long mi, a? Man i lukim mi, em i lukim Papa. Olsem wanem na yu tok, ‘Yu soim Papa long mipela?’ ‘ Jon 14: 8, 9.

Taim Jisas i toktok long wok bilong en long dispela graun, i tok, “Spirit bilong Bikpela i stap long mi. Em i makim mi bilong telimautim gutnius long

ol rabisman. Em i salim mi na mi kam bilong telimautim tok olsem: ‘Yupela kalabusman i ken lusim kalabus na i go. Yupela man i aipas, yupela i ken lukluk gen. ‘Em i salim mi na mi kam bilong brukim kalabus bilong ol man i bagarap tru long wok kalabus.’” Luk 4: 18. Dispela em i wok bilong Jisas. Em i wokabaut na wokim gutpela pasin, na mekim gutpela gen ol i kalabus pinis long Seten.

Long sampela ples i no gat wanpela sikman i krai, bilong wanem, Jisas i bin kam pinis long ol ples na mekim gutpela gen ol i bin sik. Wok bilong Jisas i soim, God Papa i makim em long dispela wok. Em i soim marimari tasol long olgeta samting em i mekim long laip bilong em. Em i tingting tasol long olgeta man. Em i kisim skin bilong man na pasin bilong man bilong helpim man. Ol rabisman na ol man i daunim bel, ol i no pret long kam long Jisas. Ol pikinini tu [12] ol i laik kam long Jisas. Ol i laik sindaun long skru bilong Jisas, na lukim pes bilong en, pes bilong marimari.

Jisas is no haitim wanpela trupela loktok, tasol em i tokim wantaim marimari. Em i no belhat, em i soim marimari long ol man. Taim em i toktok long man, em i no sutim tok long mekim man i sem nating. Taim man i no gat strong na pundaun, Jisas i no daunim man long dispela. Taim em i lukim giaman, na pasin bilong lusim bilip, na pasin nogut long laip bilong man, em i daunim 3-pela kain pasin, tasol em i sori na i laik krai taim em i mekim tok olsem. Em i krai long Jerusalem, dispela taun em i laikim tumas. Tasol dispela taun i no laik kisim em husat em i rot, na as bilong tok tru, na as bilong laip. Ol i no laikim Jisas, em i kam long kisim bek ol man, tasol Jisas i gat bikpela marimari moa long ol. Em i no bin tingting long em yet, em i bin tingting long helpim olgeta arapela man. Olgeta man wan wan em i dia tumas long ai bilong en. Em i wokabaut olsem pasin bilong God, tasol em i kam klostu long olgeta man na soim marimari long ol. Long olgeta man wan wan em i lukim man i lus tru, tasol em i save em i kam long painim na kisim bek ol.

Long dispela pasin long laip bilong en, Jisas em i soim pasin bilong God. Ol dispela marimari yumi ken lukim long laip bilong Jisas, em i bilong God Papa na em i kam long yumi. Jisas em i God bilong marimari na bilong kisim bek ol i save lus, “Em i kamap man tru, na i kamap ples klia.” 1 Timoti 3: 16.

Bilong baim bek yumi, Jisas i kam long dispela graun, na i pilim pen na i dai. Em i kisim planti sori long givim yumi bikpela amamas i stap oltaim. God Papa i larim pikinini bilong en - em husat i pulap long marimari na

trupela pasin — i lusim gutpela ples bilong en i pulap long glori. Jisas i kam long dispela graun sin i bin bagarapim, na dai i stap long en. God Papa i larim Pikinini bilong en i lusim bros marimari bilong en, na amamas bilong ol ensel, na i larim em i kisim sem, kros bilong man, na dai. “Jisas i kisim [13] kalabus bilong yumi long mekim yumi i gutpela gen. Ol i paitim Jisas na yumi ken kamap gutpela.” Aisaia 53: 5. Yumi lukim Jisas long taim Seten i traim em long ples i no gat man, long gaden Getsemani, na long kros diwai! Pikinini bilong God i no eat pasin nogut, tasol em i karim hevi bilong sin. Bipo em i stap wantaim God, na em i pilim bikpela kalabus bilong sin i mekim man i stap longwe long God. Dispela i mekim Jisas i krai olsem, “O God bilong mi, God bilong mi, bilong wanem yu lusim mi?” Matyu 27: 46. Hevi bilong sin, na save tru long bikpela rong bilong sin, na dispela kalabus i mekim man i lus long God, ol dispela i mekim Pikinini bilong God i dai.

Tasol Jisas i no kam long dai bilong mekim Papa God i ken marimari long yumi, na bilong mekim em i laik kisim bek ol manmeri. Nogat tru! “God i givim bel moa yet long olgeta manmeri bilong graun, olsem na em i givim dispela wanpela Pikinini long ol.” Jon 3: 16. God Papa em i soim marimari long man long wanem - Jisas i mekim wok bilong tekewe sin? Nogat. Em i mekim rot bilong tekewe sin long wanem - em i gat marimari long yumi. Jisas em i rot bilong karim bikpela marimari i kam long dispela graun. “God i bin i stap long Kraist, na i wok long mekim olgeta man i lusim pasin birua na i kamap wanbel wantaim em.” 11 Korin 5: 19. God em i pilim pen wantaim Pikinini bilong en. Long bikpela pen long Getsemani, long dai long Kalvari, God Papa husat i pulap long marimari, em i givim bikpela pe tumas long baim bek yumi.

Jisas i tok, “As bilong Papa i givim bel long mi em i olsem: Mi lusim laip bilong mi, na bai mi kisim bek gen.” Jon 10: 17. Olsem Papa i save soim marimari long yu bikpela moa, na em i save soim marimari long mi moa yet, long wanem, mi givim laip bilong mi long baim bek yupela. Long kisim ples bilong yupela, na lusim laip bilong mi long kisim dinau bilong yupela - olgeta sin bilong yupela - God Papa em yet i soim stretpela pasin, na wantaim em i kolim man i bilip long Jisas i stretpela man. [14]

Pikinini bilong God wanpela tasol em inap long baim bek yumi. Husat i stap long bros bilong Papa tasol, em inap long soim God long yumi. Husat i save antap na daunbilo long marimari bilong God tasol, em inap long soim dispela. I no gat narapela samting - dai bilong Jisas tasol - em inap long soim

marimari bilong God long ol manmeri i lus long sin.

“God i givim bel moa yet long olgeta manmeri bilong graun, olsem na em i givim dispela wanpela Pikinini long ol.” Em i no givim tasol bilong stap wantaim man, na long karim ol sin bilong ol, na bilong dai na mekim ofa long ol. Em i givim Pikinini bilong en olgeta long ol man bilong dispela graun. Jisas i bung wantaim man na save olgeta long olgeta pasin bilong man. Em husat i stap wankain olsem God, i pasim em yet wantaim ol pikinini bilong man bilong oltaim oltaim. Jisas “Em i save kolim ol ‘brata,’ na em i no sem long kolim ol olsem.” Hibr 2: 11. Em i Ofa bilong yumi, Helpim bilong yumi, Brata bilong yumi. Long skin bilong man em i sanap long sia king bilong Papa, na bai oltaim i pas wantaim man em i baim bek - Pikinini bilong Man. Ol dispela em i mekim bilong litimapim man long pasin nogut bilong sin, olsem man i ken soim marimari bilong God na kisim amamas bilong stretpela pasin.

Pe bilong baim yumi bek, dispela bikpela ofa bilong God Papa long givim Pikinini bilong en long dai long kisim bek yumi, em i mas mekim yumi tingting planti long gutpela laip yumi inap long kisim long Jisas. Taim aposel Jon i lukim longpela moa, na antap tru, na daunbilo bilong marimari bilong Papa long ol manmeri i mas dai, em i pulap long lotu long God. Em i no inap long painim tok i klia long soim dispela marimari. Em i singaut long ol man bilong dispela graun, long lukim. “Olanan! Papa i bin givim bel moa yet long yumi! Em i kolim yumi pikinini bilong God.” 1 Jon 3: 1. Dispela i mekim man i olsem bikpela pe. Long sin, man i kamap lain bilong Seten. Long bilip long ofa bilong Jisas Kraist, ol pikinini bilong [15] Adam i ken kamap pikinini bilong God. Long kisim ples bilong man, Jisas i litimapim man. Man i lus long sin, nau i ken stap we i ken pas wantaim Jisas, na kamap tru olsem nem “pikinini bilong God.”

Dispela kain marimari i nogat narapela olsem. Pikinini bilong King long Heven! Gutpela promis tru! Em i wanpela samting yumi ken tingting planti long en! I no gat samting i winim dispela marimari bilong God long ol man husat i no save laikim God. Dispela marimari i gat strong long kalabusim tingting bilong man long laik bilong God. Taim yumi kisim save long pasin bilong God na diwai kros bilong Kalvari, yumi ken lukim klia moa, marimari na pasin bilong tekewe olgeta pasin nogut, i stap wantaim stretpela pasin. Na yumi ken lukim klia moa, planti mak bilong marimari i bikpela olgeta. Dispela marimari i winim tingting bilong mama long pikinini bilong en i lus.

[16] [17]

Sapta 2—Man I Mas Kisim Jisas

Pastaim God i givim man gutpela tingting i strong moa. Em i no gat wanpela samting nogut long laip bilong en, na em i pren bilong God. Olgeta laik bilong man na tingting bilong en i gutpela na klin tasol. Tasol em i sakim tok, na dispela pasin i mekim tingting bilong em i kamap kranki, na pasin bilong tingting na amamas long em yet i kisim ples bilong marimari. Taim man i mekim sin, dispela i mekim strong long laip bilong man i lus, na man i no inap long strong bilong em long paitim pasin nogut. Seten i kalabusim em, na man bai i stap olgeta long dispela kalabus. Em i laik bilong Seten long bagarapim wok bilong God taim em i wokim man. Seten i laik spoilim rot bilong God na mekim dispela graun i bagarap tru, na mekim i pulap long planti sori. Na bihain Seten i laik tok God yet i bringim ol dispela pasin nogut taim em i wokim man.

Taim man i no mekim sin yet, em i gat amamas long tok wantaim God, long husat. “Olgeta kain save na tingting hait em i pulap long Kraist, olsem mani i pulap long beng.” Kolosi 2: 3. Tasol taim man i rong pinis, em i no gat amamas moa long stretpela pasin, na em i ranawe long ai bilong God. Dispela pasin i olsem yet long ol husat i no givim laip bilong en long God. Sapos man i rong, em i no laik stap wantaim God, naem i no ken amamas long toktok wantaim God. Sapos sinman i stap wantaim God, i no ken amamas, em bai i no laik long stap wantaim ol ensel. Sapos God i larim dispela sinman i go long heven, bai i no ken [18] amamas. Long heven ol i no tingting long laik bilong ol yet, ol i save givim bel long God na amamas long marimari bilong en. Dispela pasin i narakain tru long pasin bilong sinman. Tingting bilong en, laik bilong en, na olgeta pasin bilong en i birua long stretpela pasin bilong ol i stap long heven. Em i ken olsem kranki nois long namel long gutpela musik. Heven bai i olsem ples bilong givim pen long sinman. Em bai i laik hait long Jisas em i lait bilong heven na as bilong ol amamas long dispela ples. I no gat wanpela lo bilong God i pasim sinman long go long heven. Pasin bilong ol yet i mekim ol i no inap long go insait. Glori bilong God i olsem paia bilong

kaikaim ol. Sapos ol i stap, ol i laik dai tasol, long hait long pes bilong Jisas i bin dai long baim bek ol man.

Yumi stap long wanpela bikpela hul bilong sin, na long strong bilong yumi yet yumi i no inap long kalapim dispela hul. Bel bilong yumi i nogut olgeta, na yumi no inap long senisim. “Husat inap long mekim klin samting i doti? No gat wanpela.” “Sapos tingting bilong man em i bihainim pasin bilong olupela bel, dispela man em i save birua long God. Long wanem: Em i no save stap aninit long lo bilong God. Nogat. Em i no inap long mekim olsem.” Jop 14: 4. Rom 8: 7. Pasin bilong kisim save, pasin bilong bosim tingting bilong yu yet, na ol wok bilong man, olgeta i gat ples bilong helpim man. Tasol bilong senisim tingting bilong man na mekim i gutpela, ol dispela i no inap tru. Ol i ken mekim laip bilong yumi i lukluk orait, tasol ol i no inap tru long senisim bel bilong man. Ol i no inap long klinim laip bilong man. Laip bilong God antap i mas strongim laip bilong man pastaim, na pasin bilong sin i ken pinis na stretpela pasin i ken kamap. Dispela strong bilong senisim laip em i Jisas. Marimari bilong en tasol em inap long kirapim bek man i dai long sin, na givim laip na stretpela pasin na bringim man klostu long God.

Jisas i tok, “Sapos man i no kamap nupela gen,” sapos em i no kisim nupela bel, nupela tingting na laik bilong em, [19] na laip i kamap nupela, “em i no inap lukim kingdom bilong God.” Jon 3: 3. Wanpela tingting i stap - em inap sapos man i mekim sampela gutpela pasin i stap long laip bilong en, i ken strong moa. Em i giaman tingting olgeta. “Tasol man i no gat Spirit, em i no save kisim tok bilong Spirit bilong God. Long wanem: Em i tingim dispela em i tok kranki. Dispela tok yumi save kisim long Spirit tasol, olsem na man i no gat Spirit, em i no inap save as bilong dispela tok.” “Yu no ken tingting planti long mi tokim yu, ‘Yupela i mas kamap nupela gen. ’” 1 Korin 2: 14. Jon 3: 7. Bilong Jisas ol i raitim, “Laip i stap long em, na dispela laip em i lait bilong ol man.” “Long olgeta hap graun God i no soim narapela nem long yumi, bilong em i kisim bek yumi.” Jon 1: 4; Aposel 4: 12.

Em i no inap sapos yumi lukim marimari bilong God, na save pasin bilong em i lukautim yumi olsem papa. Em i no inap long luksave lo bilong God i pulap long save na stret-pela pasin, na as bilong dispela lo em i marimari. Pol i save ol dispela pasin taim em i singaut, “Long dispela pasin bilong mi em i olsem mi tok, ‘Lo em i gutpela. ’” “Lo yet em i holi. Na olgeta tok bilong lo em tu i holi, na stret, na gutpela.” Tasol em i mekim bikpela krai

bilong sori, “Tasol mi yet mi gat olupela bel. Pasin bilong sin em i kalabusim mi na mi mekim wok bilong em.” Rom 7: 16, 12, 14. Em i laik tumas laip bilong en i ken klin tru, na stret, tasol em i no inap long bihainim laik bilong en, na em i krai, “O sori! Mi man bilong bagarap tru! Husat bai tekewe mi long dispela bodi bilong i dai?” Rom 7: 24. Planti manmeri long olgeta ples na olgeta taim, bel bilong ol i hevi, ol i bin mekim krai olsem. Long olgeta wanpela tok i kam bek, “Lukim, em i Pikinini Sipsip Bilong God. Em i tekewe sin bilong olgeta manmari long graun.” Jon 1: 29.

I gat planti tok bokis long wanem Spirit bilong God i traim long soim dispela trupela tok, na mekim i klia long ol husat i laik lusim hevi bilong sin. Jekop i mekim sin taim em i giamanim Iso. Na taim em i lusim ples bilong papa na [20] em i ranawe, em i pilim rong bilong en i hevi tumas, na em i laik lusim dispela. Em wanpela tasol i stap, na ol pren na samting em i laikim tumas i stap longwe moa, tasol long bikpela tingting bilong en i tingim sin bilong en i mekimem i lus long God, na God i lusim em pinis. Long bikpela sori em i slip nating long graun, na bikpela maunten i klostu, na sta i stap an tap. Taim em i slip, em i lukim long wanpela driman, wanpela bikpela lata i stat long graun klostu long em, na i go an tap tru long dua bilong heven. Plan ti ensel bilong God ol i wokabaut long dispela lata. Na an tap long dispela lata, namel planti glori, em i harim toktok bilong strongim bel bilong en. Jekop i harim tok long rot bilong stretim laip bilong en - dispela rot em i Jisas. Em i amamas tru, na em i save long dispela rot long mekim em wanpela sinman i ken kam bek na toktok long God. Dispela lata long driman bilong en, i soim Jisas - dispela wanpela rot tasol bilong kisim man i kam bek long God.

Jisas em i tok long dispela long Nataniel, “Bihain bai yupela i lukim heven i op, na yupela i lukim ol ensel bilong God ol i go antap na i kam daun long Pikinini Bilong Man.” Jon 1: 51. Taim man em i sin, em i pasim tru rot i go long God. Dispela graun i no moa stap wantaim heven. Dispela graun i stap longwe na man i no inap long mekim toktok long God. Tasol long Jisas, dispela graun i skruim gen long heven. Long wok bilong en, Jisas i mekim bris antap long hul bilong sin, na ol ensel i ken kam long man. Jisas i save skruim man husat i no gat liklik strong, long as bilong olgeta strong.

Man i ken lus, taim em i traim long litimapim man, na helpim man i ken mekim pasin bilong en i gutpela, sapos em i lusim dispela wanpela as bilong tanim bel na strongim bel long olgeta man. “Olgeta pasin bilong givim nating

gutpela samting, na olgeta presen i gutpela tru, em olgeta i save kam long heven.” Jems 1: 17. Jisas tasol mekim pasin bilong man i gutpela. Na i gat wanpela rot tasol i go long God, em Jisas. Em i tok, “Mi yet mi rot, na mi as bilong [21] tok tru, na mi as bilong laip. I no gat wanpela man i kamap long Papa long narapela rot. Nogat. Long mi tasol.” Jon 14: 6. Bel bilong God i laikim tumas ol pikinini bilong en long dispela graun, na marimari bilong en i winim dai. Taim em i givim Pikinini bilong en, em i kapsaitim heven olgeta long dispela wanpela presen. Laip bilong Jisas, dai bilong en, na wok bilong en long sanap namel long God na man, wok bilong ensel, toktok bilong Spirit bilong God, wok bilong God Papa antap ol arapela, - olgeta i wok bilong kisim bek man.

Olaman! Tingting planti long dispela bikpela ofa God i mekim long yumi! Yumi tingting planti na save dispela bikpela wok heven i mekim bilong kisim bek ol, na bringim ol i kam bek long haus bilong Papa. I no gat strong inap winim dispela strong God i wok long en. Bikpela pe bilong mekim stretpela pasin, amamas bilong go long heven, bilong stap wantaim ol ensel, bilong stap namel long marimari bilong God Papa na Jisas na toktok long em, bilong kisim save moa moa yet long oltaim oltaim, - ol dispela, em i no inap long mekim yumi givim bel na laip bilong yumi long Jisas husat em i wokim yumi na baim yumi bek, a?

Na long arapela hap i gat - pe bilong sin God i makim, na bihain dai i kisim yumi, pasin bilong man i kamap nogut na nogut moa, na bihain ol i dai pinis - ol dispela tok i stap long Buk Tambu bilong mekim man i no ken laik long bihainim Seten.

Olsem wanem, yumi no ken tingting long marimari bilong God, a? Wanem samting moa yet em i ken wokim, a? Em i gutpela yumi ken bihainim Jisas, em i gat bikpela marimari tru long yumi. Yumi mas bihainim dispela rot God i givim yumi bilong senisim pasin bilong yumi na kamap olsem pasin bilong em yet. Na bihain yumi ken toktok long ol ensel, na yumi ken stap wantaim God Papa na Jisas na toktok long tupela. [22]

Sapta 3—Tanim Bel

Olsem wanem man i ken stret long ai bilong God? Olsem wanem sinman i ken kamap man bilong God? Long Jisas tasol man i ken wankain God long pasin bilong holi; tasol olsem wanem yumi ken kam long Kraist? Planti man i askim olsem man i askim, long de bilong Pentikos. Taim ol i pilim hevi long sin ol i krai, “Bai mipela i mekim wanem nau?” Namba wan tok Pita i bekim, i olsem, “Tanim bel.” Aposel 2: 37, 38. Na bihain liklik, em i tok gen, “Olsem na yupela i mas senisim tingting bilong yupela, na tanim bel, na bai God i wasim sin bilong yupela na tekewe olgeta.” Aposel 3: 19.

Pasin bilong tanim bel i gat tupela wok. Yumi mas sori long sin na lusim olgeta. Sapos yumi ting em i liklik sam-ting, yumi no inap lusim sin. Sapos yumi no givim baksait long sin olgeta long bel bilong yumi, bai trupela senis i no ken kamap long laip.

Planti man i no save gut long pasin bilong tanim bel. Planti man i sori ol i mekim sin na ol i traिम long senisim pasin bilong ol liklik. Bilong wanem? Ol i pret, olsem ol i ting sin bilong ol i ken bringim trabel long ol. Tasol dispela pasin bilong tanim bel, i no olsem Biabel i tok. Dispela lain i bin sori long trabel, tasol ol i no sori tumas long sin bilong ol. Dispela pasin i stap long Iso, taim i tromwe olgeta blesing bilong namba wan pikinini. Taim Belem i lukim wanpela ensel i sanap long rot na redi long sutim em long bikpela bainat, em i sori. Bilong wanem i sori? Em i ting, [23] bai i dai; tasol em i no sori tru long sin, em i no laik birua bilong sin. Judas Iskeriot taim em i bin kamapim Jisas long ol birua pinis, em i tok, “Mi bin mekim sin. Mi kamapim man i no gat rong, na bai em i dai.” Matyu 27: 4.

Dispela tok i kamap olsem wanem? Em i save God i no inap baim bek em, na em i pret nogut tru na wetim kot bilong God tasol. Em i save, sin bilong en bai i bringim trabel na em i pret nogut tru, tasol bel bilong en i no hevi long dispela sin bilong kamapim Pikinini tru bilong God taim i no gat sin: na sin bilong givim baksait long Jisas. Fero tu, taim 10-pela bikpela

trabel i kamap long lain bilong en, i tok, “Mi man bilong sin.” Bilong wanem i tok olsem? Em i pret long sampela trabel moa. Tasol taim trabel i pinis em i mekim rong gen na em i tok bilas long heven. Ol dispela lain ol i bin sori long trabel sin i bringim, tasol ol i no bin sori long sin stret.

Taim yumi givim bel long God, na larim Holi Spirit i kam, yumi ken save gut wanem samting i gutpela, na yumi ken save liklik long lo bilong God. Dispela lo em i holi tru na em i as tru bilong gavman bilong God. “Dispela lait tru, em i save givim lait long olgeta manmeri, em i kam long graun long dispela taim,” na em i givim lait insait long ol tingting bilong man, na soim olgeta pasin bilong tudak. Jon 1: 9. Dispela tingting - olsem em i sinman - i kam long bel bilong en. Nau man husat i save sin bilong en i bikpela, em i save God i stretpela moa, na em i pret long sanap long ai bilong God. Bilong wanem? God i save long olgeta pasin bilong bel bilong ol man, na em yet i pulap long sin. Em i lukim marimari bilong God, gutpela bilong pasin holi, na amamas long pasin i klin; na em tu i laik klin na kam bek na pren long heven.

Prea bilong Devit, taim em i pundaun long sin i soim trupela pasin bilong sori long sin. Em i bin tanim bel tru. Em i no tingting sin bilong en i samting nating, em i no bin prea bilong ranawe long kot bilong God. Devit i lukim sin i bikpela moa, na bel bilong en i doti [24] tru, em i no laikim tru sin bilong en. Em i no prea long God i rausim sin tasol, em i askim God long mekim holi ol pasin long bel bilong en. Em i laikim amamas bilong man i holi, em i laik pren gen long God long tingting na pasin bilong en. Tingting bilong en i tok olsem: “Ol man God i bin tekewe sin bilong en i ken amamas, long wanem, sin bilong ol God i karamap pinis. Ol man God i tok long en ‘Yu no gat sin nau’ i ken amamas. Na insait tingting bilong ol i no gat giaman.” Sam 32: 1, 2. “Yu sori long mi, God, olsem long marimari bilong yu. Long bikpela sori bilong yu, tekewe sin bilong mi. Mi save mi mekim sin, sin bilong mi i pas long ai bilong mi oltaim. Rausim doti bilong mi long hisop, nau mi ken klin. Wasim mi, na klin bilong mi i ken winim wait bilong sno. Wokim klinpela bel long mi, God, wokim stretpela tingting long mi. No ken lusim mi long ai bilong yu. No ken tekewe Holi Spirit long mi. Givim bek long mi dispela amamas bilong man yu kisim bek pinis. Strongim mi long Spirit bilong yu, i no gat pe. Lusim mi long sin bilong dai, God, yu God bilong baim bek mi. Na tang bilong mi ken singaut strong long stretpela pasin bilong yu.” Sam 51: 1 - 14.

Dispela kain pasin bilong tanim bel, yumi no inap mekim long strong bilong yumi yet. Jisas tasol i ken givim yumi - em i bin go antap na em i givim presen long ol man.

Long dispela planti man i mekim rong na olsem ol i no kisim help Kraist i laik givim. Ol i tingting ol i mas tanim bel pastaim na bihain kam long Jisas, na sapos ol i bin tanim bel, i mekim rot olsem bilong lusim sin. Em i tru, man i mas tanim bel pastaim, na God i tekewe sin, olsem taim man i hevi long sin, i laik Jisas i baim bek em. Tasol, olsem wanem, man i mas tanim bel pastaim, na bihain kam long Jisas?

Baibel i no tok olsem sinman i mas tanim bel pastaim na bihain harim singaut bilong Jisas, “Yupela man i mekim hatwok na i karim bikpela hevi, yupela olgeta i kam long mi, na bai mi givim yupela malolo.” Matyu 1 1: 28. Gutpela [25] bilong Jisas i helpim man long tanim bel. Pita i bin tok klia long dispela long lain bilong Isrel, i spik, “God i kisim em i go antap na putim em i stap long han sut bilong en. Na em i stap Pesman na Helpim, bilong tanim bel bilong yumi Isrel, na bilong tekewe sin bilong yumi.” Aposel 5: 31. Yumi no inap tanim bel sapos Spirit bilong Kraist i no helpim yumi; olsem Jisas tasol inap long tekewe sin bilong yumi.

Kraist em i as bilong ol gutpela pasin. Em tasol inap mekim yumi birua bilong sin. Taim man i laik tru, na klin, na pilim sin i bikpela, em i soim wok bilong Holi Spirit long tingting bilong en.

Jisas i tok, “Nau mi stap long graun, tasol bihain bai ol i litimapim mi, na long dispela taim bai mi pulim olgeta manmeri ol i kam long mi.” Jon 12: 32. Man bilong sin i mas lukim Kraist taim i dai yet long sin bilong ol; na taim yumi lukim Pikinini Sipsip Bilong God long diwai kros bilong Kalvari, pasin bilong baim bek man i kamap klia long tingting bilong yumi, na yumi save God i gutpela na yumi tanim bel. Long dai bilong baim bek sinman, Kraist i soim bikpela marimari man i no inap save long en. Dispela marimari i save senisim laip, stretim tingting, na mekim i sori tru i wokim pasin nogut.

Tru, sampela man i sem long sin bilong en, na em i lusim sampela pasin nogut na bihain i save Kraist yet i bin pulim em. Tasol taim man i traim long stretim laip, i no samting bilong man tasol, Kraist yet i bin pulim em long strong bilong en. Taim man i no save, strong bilong Jisas i kirapim tingting bilong man, na pasin i kamap narakain, na ol i senisim laip bilong ol. Taim Kraist i bin pulim man, na ol i lukim diwai kros na Jisas i dai long sin bilong ol, ol i tingting long lo bilong God. Ol i save laip i no stret, na sin bilong ol i

bikpela. Ol i save liklik long stretpela pasin bilong Kraist na i ol tok, “Wanem dispela sin, i bin mekim Jisas i dai long baim bek man? Wanem, ol dispela mari-mari, planti pen, planti pasin bilong daunim man i mas [26] kamap long baim bek man bai i no ken dai, na givim laip i no inap pinis?”

Sinman i ken tok maski long marimari bilong God. I ken tok nogat long Kraist, tasol sapos i no tok olsem bai Jisas i pulim em. Save long dai bilong Jisas bai i mekim man i sanap daunbilo long diwai kros long sori long sin bilong en, sin i bin mekim planti pen i kamap long Pikinini bilong God.

Tingting bilong God i save wokim plaua, diwai na ol samting, em i toktok wantaim long bel bilong ol man na mekim ol i laik tumas long kisim samting ol i no gat. Ol samting bilong graun i no inap pulimapim laik bilong ol man. Spirit bilong God i askim ol long go painim gutpela samting bilong mekim ol i bel isi, na kisim malolo. Dispela samting, em i marimari bilong Kraist na amamas bilong stretpela pasin. Insait long samting yumi lukim na samting yumi no lukim, Jisas i wok oltaim long helpim yumi long lusim tingting bilong sin, na tingting long planti blesing i kamap long man bilong God. Long lain husat i dring long giaman save bilong dispela graun, God i tok, “Man i dai long wara, em i mas i kam. Man i laik dring, em i mas i kam na kisim wara bilong laip, em i olsem presen bilong God.” Revelesen 22: 17.

Sapos yu laik kisim samting i winim samting dispela graun inap long givim man, dispela laik em i olsem God i tok long yu. Askim God long givim yu pasin bilong tanim bel, na soim Kraist long yu wantaim marimari bilong en - i klin olgeta. Laip bilong Jisas i soim tru lo bilong God, olsem marimari long God na man. Pasin bilong givim samting na marimari long arapela, em i laip bilong Jisas. Taim yumi lukim em, lait bilong en i kam long yumi na yumi save bel bilong yumi i pulap long sin.

Ating yumi bin tingting olsem Nikodimas, laip bilong mi i gutpela na tingting bilong mi i stret, mi no ken daunim tingting bilong mi long ai bilong God olsem sinman. Tasol taim lait bilong Jisas i kam long yumi, yumi lukim doti [27] bilong yumi, na pasin bilong tingting long yumi tasol, yumi birua long God na dispela i bin mekim nogut olgeta pasin bilong yumi. Nau yumi save, ol gutpela pasin bilong yumi i olsem klos doti, na blut bilong Jisas tasol inap long wasim laip bilong yumi long doti bilong sin, na givim nupela bel long yumi olsem Jisas.

Wanpela hap glori bilong God, wanpela lait bilong klinpela bilong Kraist i kam long man, em i mekim klia ol liklik sin, na soim laip i no stret. Yumi

lukim gut ol laik nogut, pasin bilong tanim baksait, na toktok doti. Na sinman i save i bin brukim lo, i lukim stret ol rong bilong en, Holi Spirit i daunim tingting bilong en. I no laikim tru pasin bilong en, taim i lukim stretpela pasin bilong Kraist.

Taim profet Daniel i lukim glori bilong wanpela ensel i kam long em, i no gat strong, na em i pilim tru ol rong bilong en. Em i stori olsem, “Mi no gat strong, gutpela pasin biiong mi i kamap nogut, mi no gat tru strong.” Daniel 10: 8. Sapos dispela samting i kamap long man, bai i no laikim tru pasin bilong tingting long em yet, na i no laikim tru pasin bilong marimari long em yet. Em bai i laik painim long stretpela pasin bilong Jisas, klinpela tingting i stret long lo bilong God, olsem pasin bilong Kraist.

Pol i tok, “Sapos ol man i skelim mi long pasin bilong bihainim lo,” - pasin man i lukim - “orait mi no gat asua;” (Filipai 3: 6) tasol taim i lukim Spirit bilong God insait long lo, i save em i sinman. Long kotim em long lo olsem man i save kotim man, em i no mekim rong. Tasol taim em i lukluk insait tru long lo holi na i lukim laip bilong en olsem God i lukim em, i daunim tingting na autim sin. Em i spik, “Bipo mi no gat lo yet, long dispela taim mi bin i stap laip. Tasol bihain tok bilong lo i kam long mi, na pasin bilong sin em i kirap laip, na mi dai pinis.” Rom 7: 9. Taim em i lukim trupela pasin bilong lo, i save sin i samting nogut tru, na pasin bilong tingim laip bilong en i gutpela, i lus.

God i no tingting olgeta sin i wankain; sampela i bikpela [28] moa long ai bilong en, olsem long ai bilong man. Tasol sapos rong i samting nating long ai bilong man, em i no liklik long ai bilong God. Man i lukim hap tasol, tingting bilong en i no stret; tasol God i gat save long olgeta samting. Man i laik daunim man i spak long strongpela dring na ol i tok, em i no inap long go long heven. Tasol ol i no kros long arapela sin - bilong bikhet, bilong tingting long ol yet. bilong mangal long samting bilong arapela. Tasol dispela kain sin God i no laik tru; long wanem, ol dispela pasin i birua long gutpela pasin bilong God bilong givim samting, na bilong marimari. Dispela pasin bilong God i as bilong heven na arapela graun i no bin mekim sin. Man husat i pundaun long bikpela sin i pilim sem na i pilim em i rabisman, na i mas kisim marimari bilong Kraist; tasol bikhet man i no pilim olsem na em i pasim bel long kisim Kraist, wantaim planti blesing em i bin kam long givim.

Dispela man bilong kisim takis i bin prea, “O God, mi man bilong sin. Yu marimari long mi!” Luk 18: 13 em i ting em i man nogut tru, na ol manmeri i

tingting wankain. Tasol em i pilim i mas lusim rong, na em i kam long God, wantaim hevi bilong sin na sem, na i askim marimari. Tingting bilong en i op na Spirit bilong God i ken mekim gutpela wok na mekim em i t' ri long strong bilong sin. Bikhet prea bilong Ferisi, i pulap long tingting bilong em yet, na i soim tingting bilong en i pasim Holi Spirit long wok. Em i longwe long God, olsem i no pilim doti long sin bilong en. Em i narakain long gutpela pasin holi bilong God. Em i no laik kisim samting bilong God, na em i no kisim wanpela samting.

Sapos yu lukim sin bilong yu, yu no ken wet long stretim laip. Planti manmeri i tingting sin bilong ol i pasim ol long kam long Kraist. Wanem, yu tingting you inap kamap gutpela long strong bilong yu yet? “Wanem, man bilong Itiopia em inap senisim skin bilong en, na lepat em inap long senisim ol mak mak bilong en, a? Yu inap mekim gutpela pasin, yu husat i save mekim rong tasol, a?” [29] Jeremaia 13: 23. Help bilong yumi i stap long God tasol. Yumi no ken wet long strongpela toktok moa. long taim i isi moa, long gutpela pasin i no ken belhat. Yumi no inap stretim wanpela samting long laip. Yumi mas kam long Kraist wantaim pasin yu mekim nau.

Tasol yu no ken tingting giaman na tingim olsem; God, long sori na marimari bilong en bai i baim bek olgeta man husat i givim baksait long marimari bilong God. Long lait bilong diwai kros tasol yumi lukim bikpela rong, bilong sin. Taim man i tok God i gutpela tumas na em i no inap tromwe sinman, larim dispela man i lukluk long diwai kros long Kalvari. I no gat narapela rot bilong baim bek man. Sapos Kraist i no bin dai, man i no inap winim strong bilong sin i mekim doti, na kamap gen long toktok wantaim na pasin wankain ol i holi, i no inap kisim bek laip bilong Spirit. Long ol dispela samting, Kraist i bin karim hevi bilong ol husat i no harim tok, na dai long ples bilong sinman. Marimari, pen, na dai bilong Pikinini bilong God, ol i soim sin i bikpela samting tru, na man i no inap tekewe sin, na kisim gutpela laip. Tasol long givim olgeta tingting long Kraist, dispela em inap.

Sampela taim, man i no gat sem long sin, i laik mekim pasin bilong em i lukluk gutpela, taim i tokaut long pasin bilong arapela man i kisim nem Kristen. Em i tok, “Mi gutpela olsem dispela lain. Ol i no winim mi long daunim laik bilong ol, long tingting gut, na long mekim gutpela pasin. Ol i laikim tumas kain kain amamas bilong bodi olsem mi.” Olsem ol i mekim rong bilong arapela i haitim rong bilong ol. Tasol ol sin na rong bilong arapela man i no inap haitim rong bilong wanpela man. God i no bin givim

yumi long bihainim man i save mekim rong. Pikinini bilong God i no gat rong, na God i givim em tasol long yumi long bihainim. Na ol i tokaut man i kisim nem Kristen na i mekim rong, mobeta ol dispela i soim pasin i gutpela moa long laip bilong ol, na arapela i ken bihainim ol. Sapos ol i save moa long pasin bilong Kristen, na ol i no bihainim, [30] [31] ating sin bilong ol i bikpela moa, a? Ol i save long stretpela pasin, tasol ol i no mekim olsem.

Yupela was long pasin bilong tok olsem, bihain bai mi kam long Jisas. Yu no ken tok, bihain bai mi lusim sin na painim klinpela laip long Jisas. Long dispela tok planti tausen man i mekim rong na ol i lus pinis long oltaim oltaim. Mi no toktok planti nau long laip i sot tumas, na yumi no save wanem bai i kamap long laip. Tasol yupela was long dispela trabel - trabel man i no save long en - bilong tokim Holi Spirit bilong God, "Bihain bai mi givim laip long Jisas." Sapos yu tok olsem, yu yet yu laik stap long sin. Sin yu tingting em i liklik tasol, sapos you mekim bai yu lus olgeta. Wanem sin yumi no daunim, em yet bai i daunim yumi na bai i kilim yumi olgeta.

Adam na Iv i tingting long liklik sin bilong tupela, - olsem bilong kaikaim prut bilong diwai God i bin tok "yu no ken kaikaim" - bikpela trabel God i tok long en i no inap kamap. Tasol dispela liklik sin i brukim lo holi bilong God, lo i no inap senis. Dispela sin i sanap namel long man na God na i opim dua bilong dai, na planti trabel long dispela graun. Long olgeta yia bipo, man bilong dispela graun i mekim bikpela krai i go antap, na krai i no bin pinis. Na olgeta samting God i bin wokim, dispela ol i pilim pen olsem meri i laik karim pikinini. Na olgeta i krai nogut i stap, i kamap inap long nau. Bilong wanem? Man i sakim tok bilong God. Heven tu i pilim bikhet pasin bilong man. Dai bilong Jisas long Kalvari i olsem mak bilong soim ol, dispela ofa i bilong baim bek ol man i bin brukim lo bilong God. Yumi no ken tingting sin i samting nating.

Olgeta rong yu mekim, olgeta' taim yu tanim baksait long marimari bilong God, yu senis liklik. Dispela pasin i strongim bel long rong, i mekim man i no strong long bihai-nim laik bilong en, i mekim tingting i kranki, na mekim man i no laik tumas long kisim Jisas. Na sapos bai i laik kisim Jisas i hat moa long harim singaut bilong Holi Spirit bilong God. [32]

Bel bilong planti man i kirap, na ol i laik mekim i orait long tingting ol inap lusim pasin bilong sin, long wanem taim ol i laik. Ol i tingting ol i ken pilai nating long singaut bilong marimari bilong God, na bihain ol i ken pilim strongpela toktok bilong God na bihain ol i pilim gen na gen. Ol i tingting

taim ol i mekim pasin nogut tru long Spirit bilong marimari, na arapela man i save ol i sanap long hap bilong Seten - bihain, taim trabel i kamap, ol i ken senisim pasin bilong ol. Tasol dispela i no isi olsem man i tingting. Ol samting i bin kamap bipo long laip bilong ol, na ol save ol i bin kisim bipo long olgeta yia, ol dispela i bin wokim pinis pasin bilong ol, na bai wan wan tasol i laik kamap wanbel wankain Jisas.

Wanpela rong tasol insait long laip, wanpela laik nogut man i laikim tumas na i holim oltain, dispela bai i mekim strong bilong gutnius i ken pinis. Olgeta pasin bilong sin i strongim man i birua long God. Man i soim strongpela pasin olsem em i no bilip, na man i strong long no harim trupela tok bilong God; dispela pasin nogut i olsem prut bilong pikinini kaikai em yet i bin planim bipo. Insait long olgeta tok bilong Baibel i no gat wanpela tok i strong moa long daunim ol pasin bilong pilai nating long sin. Dispela tok, man bilong save i raitim, sinman “bai rop bilong sin bilong em yet, em bai i pasim em.” Provep 5: 22.

Kraist i redi long lusim yumi long sin, tasol i no strong long bosim laik bilong yumi yet. Na sapos namel long planti sin dispela strongpela laik bilong yumi i strong long mekim sin tasol, na yumi no laik lusim sin, na yumi no laik kisim marimari bilong God, wanem samting moa God inap mekim? Yumi bin bagarapim laip long dispela pasin, bilong tanim baksait long marimari bilong God. “Long gutpela taim mi bin harim tok bilong yu. Na long de bilong kisim bek ol man, mi bin helpim yu.” 1 1 Korin 6: 2. “Tude sapos yupela i harim maus bilong em, orait yupela i no ken pasim bel bilong yupela strong tumas.” Hibiru 3: 7, 8.

“Man i lukim ausait bilong man, tasol God i lukim bel [33] stret.” 1 Samyuel 16: 7. Bel bilong man i gat amamas na sori, bel i save senis planti na lusim God. na i hap bilong pasin doti na giaman. God i save ol tingting na laik na wok bilong man. Go long God wantaim bel doti bilong yu. Olsem Devit, yu opim bel long ai bilong God, na krai olsem em, “Luksave long mi God, save tru long bel bilong mi; traim mi, na save tingting bilong mi. Painim pasin nogut long mi na pulim mi long rot bilong stap oltaim oltaim.” Sam 139: 23, 24.

Planti ol i kisim save bilong lotu. na mekim pasin olsem man bilong God, taim bel i no klin. Yu prea, “Wokim klinpela bel long mi, O God: putim gen gutpela spirit insait long mi.” Sam 51: 10. Mekim trupela pasin long ol tingting na ol samting yu mekim. Wok strong long olgeta taim olsem bai yu

wok sapos dai bilong yu i klostu. Dispela samting yu mas stretim namel long yu na God, stretim bilong oltaim oltaim. Sapos man. long tingting bilong en tasol, i tingting em inap long go long heven, bai dispela man i lus.

Kisim planti save long toktok bilong God na prea taim yu ritim. Dispela toktok i soim yu long lo bilong God, na long laip bilong Kraist, na planti samting bilong mekim pasin holi. Sapos man i no kisim dispela “bai em i no lukim Bikpela.” Hibriu 12: 14. Baibel i soim sin. na mekim klia rot bilong go long heven. Harim gut olsem God i tok stret long bel bilong you.

Taim yu luksave sin i bikpela samting. na yu lukim ol pasin bilong yu stret, yu no ken bel hevi na tingting yu no inap. Kraist i bin kam bilong baim bek olgeta sinman. Yumi no gat wok long mekim God i kamap wanbel wantaim yumi, tasol - O gutpela marimari! God, long Kraist “i wok long mekim olgeta man i lusim pasin birua na i kamap wanbel wantaim em.” 11 Korin 5: 19. Em i laik pulim olgeta taim bel bilong ol sinman em bai i kamap pikinini bilong God. I no gat wanpela papamama bilong dispela graun husat em inap olsem God long pasin bilong [34] strongim bel na karim hevi, taim i lukim ol asua na rong bilong pikinini bilong en, olsem God i gat long ol man i laik baim bek. I no gat wanpela i beten moa long sinman. I no gat maus i bin toktok moa long marimari olsem Jisas. Olgeta promis na strongpela tok i olsem switpela tok long bikpela marimari i winim toktok bilong man.

Taim Seten i kam na tokin yu yu bikpela sinman, yu go long Jisas na tokaut long gutpela pasin bilong en. Lukim lait bilong en, bai i helpim yu. Tokim Seten yu man bilong sin, tasol, “Kraist Jisas i kam daun long graun bilong kisim bek yumi man bilong sin.” 1 Timoti 1: 15; na Jisas i baim bek yu long bikpela marimari bilong en. Jisas i askim Saimon long tupela man i gat dinau. Wanpela i gat liklik dinau na arapela i gat dinau i bikpela tru; tasol dispela man i bin lusim dinau bilong tupela. Na Jisas i askim Saimon husat man em i gat marimari moa long em? Saimon i bekim tok, “Mi ting dispela man em i lusim bikpela dinau bilong en.” Luk 7: 43. Bipo yumi sinman, tasol Kraist i bin dai long tekewe sin bilong yumi. Ol pasin i bin mekim bilong baim bek man, em inap long kisim ples bilong yumi long ai bilong God Papa. Ol husat God i bin tekewe planti sin bilong en, dispela lain bai i gat marimari moa long God, na bai i sanap klostu moa long sia king long mekim lotu long God long bikpela marimari na bikpela ofa bilong God. Taim yumi save olgeta long bikpela sen God i bin salim daun bilong kisim yumi, taim yumi save liklik long bikpela pen na dai bilong Kraist bilong kisim ples bilong yumi, bel

i olsem wara long marimari na bikpela sori. [35]

Sapta 4—Autim Sin

“Man i karamapim sin bilong en i no ken gutpela; tasol man i autim sin bilong en na lusim olgeta, em bai i kisim marimari.” Provep 28: 13.

Ol rot bilong kisim marimari bilong God i isi na stret na gutpela. God i no askim yumi long wokim hatpela samting bipo God i ken tekewe sin. Yumi no gat wok long mekim longpela wokabout i go long sampela ples holi, no mekim bikpela pen i kamap long bodi bilong mekim yumi lukluk gutpela long God bilong heven, no bilong mekim wok bilong tekewe sin bilong yumi; tasol man i autim sin na lusim olgeta bai i kisim marimari.

Aposel i tok, “Olsem na yupela i mas autim sin bilong yupela long ol brata. Na yupela i mas prea long God i helpim ol brata, na bai God i mekim orait yupela.” Jems 5: 16. Autim sin bilong yupela long God, em tasol inap long tekewe olgeta sin bilong yupela, na autim asua bilong yupela long ol brata. Sapos yu bin rongim pren na wantok bilong yu, yu mas autim rong, na arapela i mas lusim rong bilong yu. Yu mas askim God tu long tekewe sin bilong yu, long wanem, brata yu bin rongim em i bilong God stret, na taim yu rongim em yu rongim God wantaim, long wanem, God i wokim bodi bilong dispela man na i baim bek em. Kot bilong dispela i kamap long trupela namelman, hetpris bilong yumi - “Olgeta traim i save kamap long yumi, dispela olgeta i bin kamap pinis long em bilong traim em tu,” na em i “inap sori long yumi.” Hibr 4: 15. Na, em [36] inap wasim klin olgeta doti bilong sin.

Long ai bilong God, ol man i no bin daunim tingting bilong en yet long tokim em i sinman, i no bin mekim nambawan samting bilong God i kisim bek em. Sapos yumi no bin tanim bel long trupela pasin, olsem yu no bel hevi long pasin bilong tanim bel, na yumi no autim sin long pasin bilong daunim tingting na brukim spirit, na kamap birua bilong sin; yumi no askim God tru long tekewe sin. Na sapos yumi no askim tru, yumi no kisim bel isi bilong God. Bilong wanem God i no tekewe sin bilong yumi? Yumi no laik daunim

tingting na bihainim tok bilong Baibel, em tasol. Baibel i tok stret long dispela. Pasin bilong autim sin, long arapela man na long God, i mas tanim bel tru, na yumi mas autim olgeta. No ken tok strong tumas long sinman bilong mekim em i autim sin. No ken tok lap na tok nabaut, na holim pas sinman na mekim em i autim sin husat i no tingim sin i bikpela samting. Trupela pasin bilong autim sin, i bin kam long bel stret, dispela pasin bai i kam long God bilong sori. Man i bin raitim ol Sam i tok, “God i stap klostu long olgeta man i bel hevi; na em i kisim bek ol man i save daunim ol pasin nogut bilong en.” Sam 34: 18.

Trupela pasin bilong autim sin, i save kolim nem bilong olgeta sin wan wan. Sampela sin yumi autim long God tasol. Na sampela sin yumi autim long arapela man yumi bin rongim. Na sampela sin yumi mekim long ai bilong planti man yumi mas autim long ol. Tasol long olgeta taim yu autim sin yu mas tokim stret wanem sin yu mekim.

Long taim bilong Samyuel, lain bilong Isrel i lusim God. Ol i karim kaikai bilong sin bilong ol yet, long wanem, ol i lusim pinis bilip long God. Ol i no lukim strong bilong God, na save bilong en bilong bosim lain bilong ol. Ol i tingim God i no inap holim ol strong; na tokaut long wok bilong en. Ol i tanim baksait long Bikpela King bilong olgeta graun na bilong olgeta sta na heven wantim, na ol i laik kisim gavman olsem ol arapela lain klostu long ol. Bipo [37] ol i kisim bel isi, ol i autim sin long dispela tok, “Mipela bungim dispela sin wantaim olgeta sin bilong mipela, olsem mipela askim wanpela king.” 1 Samyuel 12: 19. Sin ol i mekim, dispela sin yet ol i autim. Ol i no tok tenkyu long God na dispela pasin i givim hevi long ol, na mekim ol i lus long pasin bilong God.

God i no laikim pasin bilong autim sin sapos yumi no tanim bel na senisim laip wantaim. Planti senis i mas kamap long laip. Ol samting God i no laikim, yumi mas lusim. Sapos yumi sori tru long olgeta sin, dispela pasin bai i kamap. God i makim stret wok bilong yumi, “Wasim yupela, mekim klin; lusim pasin bilong sin long ai bilong mi; pinis long mekim sin; kisim save bilong mekim gutpela pasin; painim save bilong tingting stret, helpim man arapela i bin rongim, soim marimari long ol i no gat papa, beten long helpim ol meri man bilong em i dai pinis na ol i stap wanpis.” Aisaia 1: 16, 17. “Sapos sinman i mekim promis gen, bekim ol samting i bin stilim bipo, wokabaut long lo bilong laip na i no mekim sin; bai em i stap, em i no inap dai pinis.” Esikiel 33: 15. Pol i tok, long pasin bilong tanim bel: “Dispela bel

hevi God i bin givim long yupela, em tasol i bin kamapin kain kain gutpela pasin long yupela. Em i hariapim yupela, na yupela i kirap long stretim tok bilong yupela. Em i kirapim yupela long krosim man i mekim rong, na yupela i pret long God. Bel bilong yupela i krai long lukim mipela, na yupela i strong long stretim dispela man i bin mekim rong. Long olgeta wok yupela i mekim bilong stretim dispela tok, pasin bilong yupela i kamap ples klia olsem: Yupela i no gat asua.” 2 Korin 7: 11.

Taim sin i bagarapim tingting, sinman i no lukim gut ol rong bilong en, na em i no tingim sin bilong en i bikpela tumas; na sapos em i no bihainim strongpela tok bilong Holi Spirit, bai i stap olsem i aipas liklik long lukim sin bilong en. Ol pasin bilong en bilong autim sin, i no tru na i no strong tumas. Olgeta taim em i tok i bin mekim sin, em i painim rot bilong haitim sin bilong en, olsem em i tokaut [38] long sampela samting i bin kamap bilong mekim em i mekim dispela sin, na em i tok, sapos dispela samting i no bin kamap long mi, ating mi no bin mekim dispela sin yu krosim mi long en.

Taim Adam na Iv i bin kaikaim pinis dispela prut God i tambuim, tupela i pulap long sem na pret. Pastaim tupela i laik painim rot bilong haitim sin bilong tupela, na bilong lusim pe olsem dispela dai ol i pret tumas long eh. Taim God i askim tupela long sin bilong en, Adam i spik na em i putim asua i go long God na long Iv wantaim; “Dispela meri yu bin givim mi, em yet i givim prut long mi na mi kaikaim.” Na meri i putim asua i go long snek, i spik, “Dispela snek i giamanim mi, na mi kaikaim.” Jenesis 3: 12, 13. Bilong wanem yu wokim dispela snek? Bilong wanem yu larim em i kam long Iden? Ol dispela askim i stap insait long tok bilong en taim em i laik haitim sin bilong en, olsem em i putim asua bilong sin bilong en i go long God. Holi Spirit i no bin kamapim dispela pasin bilong autim sin, na God i no inap harim. Long trupela pasin bilong autim sin, sinman em i karim asua bilong em yet, na taim i tok em i sinman, em i no giaman long tok bilong en, no long pasin bilong en. Olsem dispela rabisman bilong kisim takis, i no lukluk antap long heven, bai i krai, “O God, mi man bilong sin. Yu marimari long mi!” na ol man i autim sin bilong ol, em i kisim nem stretpela man pinis; na Jisas bai i beten long God long blut bilong en long kisim ples bilong man i tanim bel.

Ol stori yumi ritim long Buk Tambu bilong soim trupela pasin bilong tanim bel, na pasin bilong man bilong daunim em yet; dispela stori i save soim trupela pasin bilong autim sin wantaim. Ol i no mekim rot bilong haitim sin na ol yet i no laik mekim ol i gat nem stretpela man pinis. Pol i no mekim

rot bilong haitim pasin bilong en; em i tokaut long sin bilong en olsem i bikpela moa, i no liklik. Em i spik, “Mi kisim namba long ol bikpris, na mi pasim planti manmeri bilong God, na ol i go long haus kalabus. Na mi vot [39] wantaim ol arapela long kilim ol i dai. Na planti taim mi givim hevi long ol insait long olgeta haus lotu. Mi laik mekim ol i tok bilas long Bikpela. Mi belhat nogut tru long ol, na mi bihainim ol i go inap long taun i stap longwe.” Aposel 26: 10, 11. Em i no surik long tok, “Kraist Jisas i kam daun long graun bilong kisim bek yumi man bilong sin... Namba wan man bilong sin em mi hia.” 1 Timoti 1: 15.

Man i bin daunim em yet, na em i bel isi long wanem em tanim bel pinis long trupela pasin, dispela man em i save liklik long marimari bilong God na bikpela pe olsem dai bilong Jisas long Kalvari; na olgeta man i sori tru long sin bilong ol, bai ol i autim olgeta sin long ai bilong God, olsem pikinini i save autim sin long papa bilong en. Na Baibel i tok, “Na sapos yumi autim sin bilong yumi, orait bai God i no lusim yumi. Nogat. Bai em i mekim stretpela pasin na lusim sin bilong yumi, na em i tekewe olgeta pasin nogut na bai yumi kamap klin.” 1 Jon 1: 9. [40] [41]

Sapta 5—Bilong Givim Laip Long God

Promis bilong God i olsem, “Taim yu lukluk long painim mi, yu ken painim mi pinis, taim yu laik painim mi olgeta long bel bilong yu.” Jeremaia 29: 13.

Sapos yumi no givim bel bilong yumi olgeta long God, laip bilong yumi i no ken senis i kamap olsem em yet. Pasin bilong yumi i olsem birua bilong God. Holi Spirit em i makim stret pasin bilong yumi “Bipo yupela i mekim kain kain rong na sin na dispela em i kilim yupela i dai” “Het bilong yumi em i sik, na bel i no gat liklik strong; *’ “No gat wanpela hap bilong yumi i stap gutpela.” Yumi kalabus pinis long banis bilong Seten, “Seten i kisim ol long umben bilong en.” Efasas 2: 1; Aisaia 1: 5, 6; 11 Timoti 2: 26. God i laik mekim yumi gutpela gen, na mekim yumi fri. Tasol long mekim olsem, laip bilong yumi i mas senis olgeta, na yumi mas kisim nupela bel. Olsem yumi i mas givim olgeta bodi bilong yumi long God.

Dispela pait bilong paitim pasin bilong yumi yet, em i bikpela moa long olgeta pait. Pilong givim laip bilong yumi, na bilong larim laik bilong God i ken bosim olgeta samting bilong yumi, em i strongpela pait bilong yumi. Tasol pastaim yumi mas larim God i ken bosim yumi olgeta bipo laip bilong yumi i ken nupela na bihainim stretpela pasin.

Gavman bilong God em i no olsem Seten i toktok - man i no ken tingting, tasol em i mas bihainim nating laik bilong God. Gavman bilong God em i tok klia long save na [42] tingting bilong man. “Yu kam na toktok wantaim” em i singaut bilong God long olgeta man em i wokim. Aisaia 1: 18. God em i no pasim man long bihainim laik bilong en. Em i no ken kisim laip bilong man, sapos man i no tingting na laik tumas long givim olsem. Sapos God i pasim yumi long givim laip bilong yumi long en tasol, yumi no ken laik mekim olsem. Dispela bai i pasim tingting bilong yumi, na tingting i no ken strong, na yumi olsem wanpela masin. Laik bilong God i no olsem. Em i laik tumas

long man husat i antap long ol samting God i wokim, i ken strong moa, na tingting bilong en i ken antap tru. God em i soim yumi mak em i antap moa, na em i laik helpim yumi long marimari, long kamap long dispela mak. Em i askim yumi long givim laip bilong yumi long en, na em i ken wokim tingting bilong en insait long yumi. Yumi yet ken makim laik bilong yumi, sapos yumi laik long lusim kalabus bilong sin, na kamap t' ri wantaim ol pikinini bilong God.

Taim yumi givim laip bilong yumi long God, yumi mas lusim wantaim olgeta pasin nogut bilong mekim yumi lus long God. Olsem Jisas i tok, "Sapos wanpela man namel long yupela em i no givim baksait long olgeta samting bilong en, orait cm i no inap i stap disaipel bilong mi." Luki 14: 33. Olgeta samting i mekim bel bilong yumi i lusim God, yumi mas lusim dispela samting olgeta. Dispela graun em i lotu bilong planti man. Bilong laikim mani, na laik bilong kisim planti mum tru, em i olsem wanpela sen bilong gol, em i pasim ol wantaim Seten. Sampela i laik kamap bikpela man long ai bilong ol, na sampela i laikim tumas long kisim nambawan ples, na sampela i mekim dispela pasin i lotu bilong ol. Arapela man i laikim tumas laip i no gat hatpela wok na ol i laik sindaun nating namel long planti samting bilong ol, na ol i wok strong bilong mekim isi pasin. Tasol ol dispela kain sen bilong pasim laip bilong man i mas bruk olgeta. Yumi no ken stap olsem hap laip bilong yumi i bilong God, na hap i bihainim dispela graun. Yumi no ken pikinini bilong God, sapos yumi no bilong [43] God olgeta.

I gat sampela man i tok ol i pikinini bilong God, tasol long strong bilong ol yet ol i traिम long bihainim lo bilong God, na bilong mekim stretpela laip, na bilong painim ples bilong ol long heven. Bel bilong ol i no save pilim bikpela marimari bilong Jisas, tasol ol i traिम long bihainim pasin bilong kisim heven. Dispela kain lotu i no ken helpim yumi liklik. Taim Jisas i stap long bel bilong man, laip i pulap tru long marimari bilong en, wantaim amamas long toktok long em, na dispela man i laik tasol long stap wantaim Jisas. Na taim man i tingting long Jisas, em i lusim tingting bilong em yet. Ol man husat i pilim dispela marimari bilong God, ol i no askim wanem liklik samting em i mas givim long kamap tasol long mak bilong God. Ol i no tingting long kamap long mak em inap tasol. Nogat. Mak bilong ol i bilong bihainim olgeta tingting na pasin bilong Jisas. Laik bilong ol i strong tru bilong givim laip olgeta long God, na ol i tingting planti tru long dispela bikpela samting ol i laikim tumas. Sapos man i tok em i bihainim Jisas na em i no gat dispela bikpela marimari, em i tok win, na hatwok nating.

Olsem wanem long yu yet? Yu pilim em i bikepla ofa tumas long givim laip bilong yu olgeta long Jisas? Yu askim yu yet, “Wanem samting Jisas em i givim long mi.” Pikinini bilong God i givim olgeta samting - laip, na marimari, na save kisim planti pen - bilong baim bek yumi. Na yumi nogut olgeta, tasol dispela bikpela marimari i kam long yumi, na wanem long yumi - yu ken tok yet, yu no ken givim laip bilong yu long God, laka? Long olgeta taim long laik bilong yumi, yumi kisim blesing bilong marimari bilong God. Na bilong dispela, tingting bilong yumi i pas pinis, na yumi no ken save daunbilo long dispela hul Jisas i kamautim yumi long en. Yumi inap long lukluk long Jisas, na sin bilong yumi yet i bin bagarapim em, na tok nogut long marimari bilong en na ofa bilong en, a? Jisas em i Bikpela bilong heven na i stap namel long ol glori, [44] tasol em i daunim pasin bilong en yet na kamap olsem wokboi nating. Ating yumi no inap tok kros, long wanem, rot bilong kisim laip tru i stap long pasin bilong paitim Seten, na long daunim tingting bilong yumi.

Planti bikhet man i askim - “Bilong wanem mi mas daunim bel bilong mi olgeta, bipo mi ken save Godi redi long kisim mi?” Mi soim yu Jisas. Em i no gat sin, na antap long dispela samting em i Bikpela bilong heven, tasol em i kisim ples bilong ol sinman tru, na em i mekim olsem bilong helpim yumi man. “Em i stap wantaim ol sinman, na em i karim sin bilong planti man, na em i mekim wok namel long man na God Papa, bilong helpim ol sinman.” Aisaia 53: 12.

Tasol wanem samting yumi lusim taim yumi givim olgeta samting bilong yumi? Wanpela bel em i pulap long sin, bilong larim Jisas i ken klinim olgeta long blut bilong en, na long kisim bek long marimari bilong en. Olaman! Man i tingim i hatpela samting long givim ol samting! Mi sem long harim dispela tok, na mi sem long raitim.

God em i no mekim yumi lusim wanpela samting sapos em i gutpela bilong yumi long holim. Long ol samting em i wokim, em i tingting long mekim ol pikinini bilong en i ken gutpela tru. Nau i gutpela, sapos ol man i no bihainim Jisas, i ken save, samting Jisas i laik givim long ol, i winim tru samting ol yet i bihainim. Man i mekim samting i nogut moa long laip bilong en, taim em i tingting na mekim samting i no bihainim laik bilong God. Trupela amamas man i no ken painim long rot God i tok yu no ken go long en. Em i save samting i gutpela tru, na em i tingting long mekim laip bilong ol i gutpela tasol. Rot bilong sin em i rot bilong pen na dai tasol.

Em i rong long tingting God i gat amamas long lukim pikinini bilong en i gat pen. Ol bilong heven i laikim man i gat amamas. Long ol tok God i givim yumi bilong bihainim, em i askim yumi long lusim olgeta pasin i save mekim pen i kamap long yumi, dispela kain pasin i save pasim dua bilong [45] heven na dua bilong amamas tu. Peman bilong dispela graun i save kisim man olsem ol i stap yet - wantaim ol pasin bilong ol, na rong bilong ol, na taim ol i nogat strong. Na bai Jisas em i tekewe olgeta pasin nogut long ol, na i mekim ol i kamap klin, na em i baim bek ol long blut bilong en. Tasol long ol husat i laik kisim wok bilong en na karim hevi bilong en, em i ken mekim bel bilong ol i ken pulap long bikpela amamas. Em i laik bilong Jisas long givim bel isi na malolo long ol i kam long en bilong kisim bret bilong laip. Em i mekim yumi long mekim tasol ol samting i ken bringim yumi antap long ples bilong amamas, na man i sakim tok i no ken kisim. Trupela laip bilong man na amamas bilong dispela laip i olsem: Kraist i stap wantaim yupela, na yupela i wetim em i givim glori long yupela.

Planti ol i askim, “Olsem wanem mi ken givim laip olgeta long God?” Yu laik long givim laip bilong yu long Jisas, tasol yu no gat strong long paitim sin. Yu kalabus long wanem - yu no save bilip, na ol pasin bilong sin long laip bilong yu i bosim yu tru. Ol promis yu mekim i olsem rop bilong wesana. Yu no inap long bosim tingting bilong yu, na laik bilong yu. Taim yu tingim ol promis yu bin mekim na bihain brukim na yu no inap long bihainim - em i mekim yu tingting yu no inap tru, na yu pilim God i no kisim yu. Tasol yu no ken tingting dispela hevi i daunim yu olgeta. Yu mas kisim save gut long trupela strong long laik bilong man. Dispela em i bos tru insait long pasin bilong man, strong bilong makim rot bilong yu. Olgeta samting i bihainim dispela laik bilong man. God i givim ol man dispela strong bilong makim laik bilong ol, na dispela i bilong yumi long wok long en. Yu no inap long senisim bel bilong yu, yu yet yu no inap givim bel bilong yu long God. Tasol yu ken makim rot bilong yu long bihainim God. Yu ken givim em dispela strongpela laik bilong yu. Nau bai God i save wok insait long yupela. Em yet i kirapim laik bilong yupela, na yupela i ken mekim wok olsem em yet i laikim. Olsem olgeta pasin bilong yu i ken aninit long Spirit bilong [46] Kraist, na yu ken tingting long Jisas tasol, na tingting bilong yu i ken olsem tingting bilong em.

Laik bilong bihainim gutpela na stretpela pasin i gutpela liklik. Tasol sapos em tasol yu mekim, i no ken helpim yu. Planti man bai i ken lus tru taim ol i laik kamap Kristen. Ol i no kam long givim God dispela strongpela

laik bilong ol. Ol i no makim rot bilong ol tru long kamap Kristen.

Long mekim gutpela pasin long dispela laik bilong yu, wanpela senis i ken kamap long olgeta laip bilong yu. Taim yu givim dispela laik bilong yu long Kraist, yu stap wantaim dispela strong i antap long olgeta hetman na pesman. Bai yu ken kisim strong bilong antap bilong stap strong. Na taim yu givim laip bilong yu long God olgeta taim, bai yu inap long kisim dispela nupela laip - olsem laip bilong bilip. [47]

Sapta 6—Bilip Na God I Kisim Bek

Taim Holi Spirit i kirapim tingting bilong yu, yu bin save liklik long rong bilong sin, pawa bilong sin. asua na trabel bilong en; na yu no laikim tru. Yu pilim sin i lusim yu long God, na pawa bilong sin i kalabusim yu. Taim yu hatwok moa long lusim, yu save moa yu no inap lusim. As bilong tingting bilongyu i nostret; bel bilong yu i doti long sin. Yu save pasin bilong yu i pulap long tingting i go long yu yet na long sin. Yu laik tumas long tekewe sin. long kamap klin, long lusim kalabus bilong sin. Yumi ken mekim wanem bilong kamap wanbel wantaim God. a?

Em i gut sapos yu kisim bel isi - Heven i tekewe sin, na bel isi na marimari i stap insait long bel. Man i no inap baim dispela, gutpela tingting i no inap kisim dispela, save i no inap kamap olsem dispela: long oltaim yu no inap kisim dispela, save i no inap kamap olsem dispela; long oltaim yu no inap kisim dispela long strong bilong yu yet. Tasol God i laik givim yu dispela, olsem presen. “i no gat mani, i no get pe.” Aisaia 55: 1. Dispela i bilong yu, sapos yu putim han i go out na kisim. God i spik, “Tru, sin bilong yu i retpela, tasol bai i wait olsem waitpela klaut; tru sin i retpela tru tasol bai i waitpela olsem gras bilong sipsip.” Aisaia 1: 18. “Wanpela nupela bel bai mi givim yu, na wanpela nupela spirit bai mi putim insait long yu.” Esikiel 36: 2.

Yu autim sin bilong yu pinis, na long tingting bilong yu, yu lusim ol pinis. Yu laik long givim yu yet long God. Nau [48] yu go long God na askim em long wasim sin bilong yu, na givim nupela bel long yu. Nau bilip God i mekim dispela bilong kamapim kaikai bilong tok em i bin mekim. Taim Jisas i stap long graun i skulim ol long dispela - God i promis long givim presen long yumi, na sapos yumi bilip olsem yu kisim pinis, orait i tru, yumi kisim pinis. Jisas i mekim orait sikman taim ol i bilip long pawa bilong en. Em i helpim ol long ol samting ol i lukim klia, na long dispela ol i bilip long samting ol i no inap lukim yet; olsem na bai ol i bilip long pawa bilong Jisas inap long tekewe sin. Long dispela em i bin tokaut klia taim em i mekim orait

sikman bun bilong en i dai olgeta, i spik, “Tasol mi laik yupela i save, Pikinini Bilong Man em i gat pawa long dispela graun, inap long em i tekewe sin. (Olsem na em i tokim dispela man bun bilong en i dai olgeta), ‘Yu kirap na kisim bet bilong yu, na yu go long haus bilong yu. ‘ Matyu 9: 6. Olsem evanselis Jon i tokaut long ol mirakel bilong Jisas, i spik, “Tasol dispela mi ratim pinis, em mi raitim bilong yupela i ken bilip long Jisas em i Kraist, em i Pikinini bilong God. Na sapos yupela i bilip, orait bai yupela i kisim laip long nem bilong em.” Jon 20: 3 1.

Long Baibel yumi ritim planti stori bilong Jisas taim i mekim orait sikman. Na dispela stori i ken skulim yumi long pasin bilong bilip long Jisas, na em bai i tekewe sin. Lukim stori bilong sikman long liklik raunwara ol i kolim Betesda. Dispela sikman, i no inap mekim sampela samting; han na lek bilong en i nogut long 38-yia. Tasol Jisas i tokim em, “Yu sanap na kisim bet bilong yu na wokabaut.” Dispela sikman i no bin tok, “Bikpela, sapos yu mekim orait skin bilong mi bai mi bihainim maus bilong yu.” Nogat. Em i bilipim maus bilong Jisas, em i bilip olsem em i orait pinis na kwiktaim em i sanap: em i gat strongpela laik long wokabaut, na em yet i wokabaut. Em i bihainim maus bilong Jisas na God i givim strong. Sik bilong en i lus olgeta.

Olsem na yu wanpela sinman. Yu no inap mekim ofa [49] long ol sin bilong yu, yu no inap senisim bel na kamap holi. Tasol God i mekim promis inap long ol dispela insait long Kraist. Yu mas bilip long dispela promis. Yu autim sin na givim laip bilong yu long God. Yu laik tumas long bihainim em. Sapos yu mekim dispela pasin, God bai em inapim toktok bilong en. Sapos yu bilipim promis - bilipim God i bin tekewe ol sin bilong yu na wasim yu pinis - God yet i mekim ol dispela i kamap; God i mekim orait laip bilong yu olsem i bin mekim long sikman. God i givim strong bilong wokabaut long sikman taim em i bilipim God i mekim em i orait pinis. Sapos yu gat bilip, orait dispela samting i kamap pinis.

No ken wet long taim bai yu pilim strong. Yu mas tok, “Mi bilip long dispela, em i kamap pinis. i no kamap bilong wanem mi yet mi pilim. Nogat. I kamap long wanem, God yet i mekim promis.”

Jisas i spik, “Na sapos yupela i mekim prea na i beten long kisim wanpela samting, na sapos yupela i bilip na i tok, ‘Yes, tru, mipela bai i kisim dispela samting, ‘ orait, mi tokim yupela, dispela samting bai i kamap olsem yupela i tok.” Mak 11: 24. I gat wanpela samting yumi mas mekim bilong dispela promis - yumi mas prea wankain laik bilong God. Tasol em i laik bilong God

bilang wasim yumi bilang tekewe ol sin, na long mekim yumi olsem pikinini bilang en, na long helpim yumi long mekim pasin holi. Olsem na yumi ken askim God long ol dispela blesing na tok, “Yes, tru, mipela bai i kisim dispela samting,” na tok tenkyu long God i givim pinis dispela samting. I gutpela samting tru, yumi ken go long Jisas na em bai i mekim yumi klin na yumi ken sanap long ai bilang lo bilang God na no gat sem. “Olsem na yumi man i pas wantaim Kraist Jisas, i no gat wanpela tok bilang kot nau i tok long yumi mas kisim pe bilang sin.” Rom 8: 1.

Nau laip bilang yu i no bilang yu tasol, wanpela i bin baim yu pinis. “Em i no baim bek yupela long samting bilang graun em i save bagarap, olsem silva no gol. Nogat. [50] Em i baim bek yupela long blut bilang Kraist. Dispela blut em i dia tumas. Kraist em i olsem wanpela pikinini sipsip i klin olgeta, na i no gat mak nogut bilang en.” 1 Pita 1: 18, 19. Long dispela pasin bilang bilipim God i isi liklik long mekim, Holi Spirit i bin mekim nupela laip gen long bel bilang yu. Nau yu olsem pikinini i kamap nupela long lain bilang God na em i gat marimari long yu olsem i gat long Pikinini Man bilang en.

Nau, yu bin givim laip bilang yu i go long God, yu no ken lusim em, tasol long olgeta de yu mas tok, “Mi bilang Kraist; mi givim pinis laip bilang mi i go long en,” na askim em long givim Spirit bilang en i go long yu, na i ken holim yu long marimari bilang en. Taim yu givim laip bilang yu i go long God, na bilipim em, yu kamap pikinini bilang en, olsem na long dispela pasin yu ken i stap long em. Aposel i spik, “Yupela i kisim pinis Bikpela Kraist Jisas, olsem na yupela i mas wokabaut wantaim em.” Kolosi 2: 6.

Sampela man ol i tingting ol i mas mekim planti gutpela pasin pastaim bilang soim bilip bilang ol long God na long soim God ol i senisim pasin bilang ol pinis, na bai ol i ken askim blesing bilang God. Tasol, man i ken askim blesing bilang God long nau. Ol i mas kisim marimari bilang God, Spirit bilang Kraist pastaim bilang helpim sik bilang ol. Sapos ol i no kisim marimari bai i no inap sakim rong. Jisas i laikim yumi i kam long em long pasin bilang yumi yet - pulap long sin, no gat strong na sot long help bilang Jisas. Yumi ken kam taim yumi no gat strong, long pasin longlong, long sin, na pundaum long sori long lek bilang em. Glori bilang God i bilang pasim yumi long han bilang en long marimari, bilang pasim ol sua bilang yumi na bilang wasim i go ol doti bilang sin.

Long dispela samting planti tausen man i lus; ol i no bilipim God em inap

long lusim ol sin bilong ol wan wan. Ol i no bilip long toktok bilong God. Sapos ol man i bihainim. tok bilong God, ol i ken save God i tekewe olgeta [51] sin bilong ol. No ken tingim ol promis God i mekim, i no bilong yu. Nogat. God i givim promis long ol sinman i tanim bel. Long Kraist, ensel bilong helpim yumi i bringim strong na marimari long ol man i gat bilip. I no gat man pulap tumas long planti sin i no inap kisim strong, na klin, na stretpela pasin bilong Jisas em i dai bilong kisim bek ol. Em i wet nau long rausim klos doti long sin na long putim waitpela klos bilong stretpela pasin; em i tokim ol, “Yu mas gat laip, yu no ken i dai.”

Pasin bilong God bilong wok long helpim yumi, i narakain long pasin bilong yumi taim yumi wok long arapela man. God i tingting long marimari, long givim bel na long bikpela sori. Em i spik, “Larim sinman i lusim pasin bilong en, na man i no stret ol tingting bilong en; na larim em i kam bek long Bikpela, na Bikpela bai i givim marimari long em; na kam long God, long wanem, God bai i lusim olgeta sin.” Aisaia 55: 7. “Mi bin lusim pinis, olsem bikpela klaut ol rong bilong yupela, na olsem klaut, ol sin bilong yupela.” Aisaia 44: 22.

” ‘Mi no gat amamas long dai bilong man em i dai pinis, ‘ Bikpela God i spik; ‘olsem na, tanim bel bilong yupela na stap laip. ‘” Esikiel 18: 32. Seten em i redi long stilim olgeta gutpela promis bilong God. Em i laik karim i go olgeta liklik laik bilong man bilong kisim gutpela samting, na olgeta hap lait i stap long bel bilong man; tasol yumi no ken larim em long mekim dispela. No ken harim tok bilong Seten, tasol yu tok; “Jisas em i bin dai pinis bilong mi ken stap laip. Em i gat marimari long mi na em i no laik mi ken dai pinis. Papa bilong mi long heven i gat bikpela sori; na i tru mi bin sakim marimari bilong en na mi no bin lukautim gut olgeta blesing em i bin givim long mi, tasol “bai mi kirap, na mi go long Papa bilong mi, na bai mi tokim em, ‘Papa mi bin mekim sin long God na long yu. Na mi no gutpela man moa inap long yu kolim mi pikinini bilong yu. Yu putim mi olsem wanpela wokboi bilong yu. ‘” Long tok bokis i soim yumi long pasin bilong papa taim em i kisim [52] bek em: “Tasol em i stap longwe yet, na papa i lukim em. Na bel bilong papa i sori tumas long em. Em i ran i go na i holim pas pikinini na i givim kis long em.” Luk 15: 18-20.

Dispela tok bokis i soim bikpela sori bilong papa, tasol, i sot yet long soim bikpela sori bilong Papa God. Bikpela i tokaut long maus bilong profet bilong en, “Mi bin givim bel long yupela long marimari i stap oltaim oltaim;

olsem na long gutpela marimari mi bin pulim yupela.” Jeremaia 31: 3. Taim sinman i longwe long haus bilong Papa, na i laik lusim ol samting bilong en long longwe ples, bel bilong Papa i sori tumas long em. Na olgeta laik long bel bilong en long kam bek long Papa, dispela laik i olsem beten bilong Spirit bilong God Papa. Spirit i save askim, na i beten, na i pulim man i lus i kam bek long bel marimari bilong Papa.

Taim yu lukim olgeta gutpela promis long Baibel, yu inap long lusim bilip bilong yu, a? Yu inap bilip olsem, sapos sinman i laik long kam bek, na long lusim sin, Bikpela i ken kros na i no ken larim em i kam long lek bilong en na tanim bel, a? Lusim dispela kranki tingting. Sapos yu tingting pasin bilong Papa bilong heven i olsem, bel bilong yu bai i bagarap. God em i birua bilong sin, tasol em i gat marimari long sinman na em i bin givim em yet, taim i givim Kraist, bilong kisim bek olgeta man husat i laik kisim blesing long oltaim oltaim insait long kingdom bilong glori. Wanem strongpela tok moa na gutpela tok moa God i ken tokim, long soim yumi bikpela marimari em i gat long yumi, a? Em i tok, “Na wanem, meri em inap lusim tingting long pikinini bilong en taim em i givim em susu, a? Em i no inap sori long pikinini em i karim, a? Tru, sampela i lusim tingting, tasol bai mi no ken lusim tingting long yupela.” Aisaia 49: 1 5.

Lukluk antap, yupela husat i lusim bilip na guria nogut; long wanem, Jisas i stap laip oltaim na em i save beten long God i helpim ol. Tok tenkyu long God i givim Pikinini bilong en, na yu mekim prea olsem, nogut em i bin dai [53] nating bilong baim bek yu. Spirit i askim yu tude. Yu kam, wantaim olgeta pasin long bel bilong yu. Kam long Jisas, na yu ken kisim blesing bilong em.

Taim yu ritim ol promis, tingting olsem dispela i tok bilong bikpela marimari moa na sori. Bikpela bel bilong olgeta marimari i kam long sinman long bikpela sori. “Em i dai pinis bilong baim bek yumi, na long blut bilong en em i tekewe olgeta rong bilong yumi.” Efesas 1: 7. Yes, bilip tasol long God i helpim yu. Em i laikim olgeta man i ken kamap gen wanbel wantaim em. Taim yu kam klostu long God long pasin bilong autim sin na tanim bel, God bai i kam klostu long yu bilong givim marimari na tekewe sin. [54] [55]

Sapta 7—Mak Bilong Trupela Disaipel

“Olsem na sapos wanpela man i stap long Kraist, orait God i wokim em i kamap nupela man tru. Olpela pasin i pinis olgeta. Harim gut! Nupela pasin i kamap pinis. “II Korin 5: 17.

Sapos man i no inap makim de na ples em i bin senisim tingting bilong en na i kamap Kristen; dispela i no soim olsem em i no bin senis yet na kamap Kristen. Kraist i tok long Nikodimas, “Win em i save bihainim laik bilong em yet na i winim i go long narapela narapela hap. Yu save harim nois bilong en, tasol yu no save em i kamap we no i go we. Olgeta man i kamap nupela long Spirit, ol i olsem tasol.” Jon 3: 8. Yumi no lukim win, tasol yumi save lukim wokabout bilong win taim i winim ol samting na yumi save pilim long skin. Wok bilong Spirit bilong God i wankain, taim i wok long bel bilong man. Dispela pawa bilong wokim nupela man, yumi no inap lukim taim i kirapim nupela laip long man. Em i save wokim man i nupela na i kamap wankain God. Tru, wok bilong Spirit i no meknois, na yumi no ken lukim, tasol yumi save lukim senis long laip. Sapos bel bilong man i bin kamap nupela long Spirit bilong God, laip bilong en bai i soim dispela. Tru, yumi no inap mekim wanpela pasin bilong senisim bel bilong yumi, no bilong kamap wanbel wantaim God; tru, yumi no ken tingting ol gutpela pasin bilong yumi yet em inap helpim yumi; tasol, laip bilong yumi bai i soim stret sapos marimari bilong God i stap long en. Bai ol i lukim senis long [56] laip na pasin na wok bilong yumi. Ol bai i lukim klia senis long pasin bilong yumi, em i no olsem bipo, em i narakain tru. Man i no soim trupela pasin bilong en taim i mekim wanpela gutpela pasin no wanpela pasin nogut. Tasol long long olgeta toktok na pasin i save mekim oltaim, dispela i save soim trupela pasin bilong em.

Em i tru, sampela man i mekim gutpela pasin long ausait tasol, na strong bilong Kraist i no senisim bel bilong em. Sapos man i laikim arapela man i ken amamas long em yet, na em i laikim ol i ken tingim em i gutpela man,

dispela laik bai i mekim em i mekim gutpela pasin long ai bilong ol. Man husat i tingting long em yet, em inap mekim em i lusim pasin nogut. Man i tingting long em yet, em inap long mekim gutpela pasin long helpim arapela man. Olsem wanem yumi ken save wanem pasin yumi mekim?

Bel bilong yumi i bilong husat? Tingting bilong yumi i save go long husat? Yumi laik toktok planti long husat? Yumi givim marimari na wok strong long husat? Sapos yumi i bilong Kraist, tingting bilong yumi i save go long em na ol tingting i swit moa em i tingting yumi tingim long Kraist. Ol samting bilong yumi na pasin bilong yumi i bilong em yet. Yumi laik tru long kamap wanbel wantaim em, long kisim Spirit bilong em, long mekim pasin em yet i laikim, na long givim amamas long em long olgeta samting.

Olgeta man i bin kamap nupela long Kraist Jisas, em bai i karim prut bilong Spirit - "Pasin bilong givim bel, na amamas, na bel isi, na pasin bilong larim ol i rongim yumi, na pasin bilong helpim ol man, na wokabaut stret oltaim, na pasin bilong isi isi, na daunim laik bilong olupela bel." Galesia 5: 22, 23. Ol bai i no mekim pasin olsem ol i mekim bipo, tasol long bilip long Pikinini bilong God ol i bihainim wokabaut bilong em, mekim pasin bilong em, na kamap klin olsem em yet. Sampela samting i no laikim bipo, nau ol i laikim tumas; sampela samting ol i laikim bipo nau ol i no laikim tru. Man i bikhet na i tingting long em yet bipo, nau em i mekim pasin isi isi. Man i tingting [57] em i bikman na i laik daunim arapela, nau em i tingting stret na i no tingting em i bikman. Man i spak, nau em i no spak. Man bipo i mekim pasin pamuk, nau em i klin. Ol pasin na amamas bilong dispela graun ol i lusim. Kristen man i no laik "bilasim skin ausait," tasol "mobeta yupela i bilasim insait bilong bel. Dispela bilas em i no inap long bagarap. Em i pasin bilong bel i stap isi, na bel i malolo." 1 Pita 3: 3, 4.

Man i no bin tanim bel tru sapos dispela i no bin senisim pasin bilong en. Sapos em i givim samting i bin promis, givim gen samting i stilim bipo, autim ol sin bilong en na givim bel bilong en long God na long ol brata, dispela sinman i ken save i bin lusim pinis pasin bilong dai na em i kisim pinis pasin bilong laip.

Taim yumi sinman i kam long Kraist na kisim marimari bilong tekewe sin, pasin bilong givim bel bilong yumi i save kamap long laip. Olgeta hevi i no hevi tumas, long wanem, dispela hevi Kraist i putim long sol bilong yumi em i gutpela. Wok bilong yumi bai i gat amamas, na ofa bilong yumi i olsem amamas bilong yumi. Dispela rot bipo i tudak, nau Jisas - San Bilong

Stretpela Pasin - i givim lait.

Ol gutpela bilong pasin bilong Kraist yumi ken lukim long man i bihainim em. Em i amamas bilong Jisas bilong bihainim laik bilong God. Pasin bilong givim bel long God, na laik long givim glori long God, dispela tupela pasin em i pawa i bosim laip bilong Peman bilong yumi. Pasin bilong givim bel bilong em long God i mekim olgeta wok bilong em i gutpela moa. Pasin bilong givim bel i save kam long God. Sinman i no inap long givim bel bilong en tru. Dispela pasin i stap long man bilong Jisas tasol. “Yumi save givim bel, as bilong dispela em i olsem: God i bin givim bel long yumi pastaim.” 1 Jon 4: 19. Sapos marimari bilong God i i bin wokim nupela bel insait long man, em bai i save givim bel na dispela em i as bilong olgeta pasin bilong em. Dispela i save senisim pasin bilong man, bosim ol laik bilong em, helpim em long mekim gutpela pasin long arapela manmeri. [58] Dispela i daunim kros bilong em, na mekim pasin bilong em bilong givim bel i kamap gutpela. Sapos man i holim strong dispela pasin bilong givim bel bilong em, bai laip bilong em i ken swit moa, na em i helpim arapela manmeri long mekim gutpela pasin.

I gat tupela rong ol pikinini bilong God i mas was gut long en. Na olgeta manmeri husat i kisim bilip nau tasol i mas was gut tru long dispela. Nambawan samting yumi bin ritim pinis, olsem, em i pasin bilong man long lukluk long pasin bilong em yet, na long tingim ol wok bilong; en em inap mekim em i kamap wanbel, wantaim God, Sapos man i laik kamap holi long mekim planti gutpela pasin bilong bihainim lo, em i no inap tru. Ol pasin man i mekim taim i no gat Kraist em i pulap long pasin bilong tingting long em yet na long sin. Marimari bilong Kraist tasol, long bilip, em inap mekim yumi holi.

Arapela rong tu em i nogut, olsem, sapos man i bilip long Kraist, i ken lusim lo bilong God; olsem bilip tasol em inap mekim Kraist i givim marimari long ol, na olgeta pasin yumi mekim i no gat wok long baim bek yumi.

Tasol, harim gut, dispela pasin bilong bihainim maus i no bilong mekim wanpela samting tasol, em i wok bilong givim bel bilong yu wantaim. Lo bilong God i soim pasin bilong em yet. Lo yet em i dispela bikpela samting, em i pasin bilong givim bel bilong God. Olsem na, lo em i as bilong gavman bilong God long heven na long dispela graun. Sapos bel bilong yumi i kamap nupela wankain God, sapos marimari bilong God i stap long yumi, orait yumi

save inapim lo bilong God long laip bilong yumi. Taim pasin bilong givim bel i stap insait long laip, taim man i kamap nupela gen olsem em husat i bin wokim em bipo, dispela promis bilong nupela kontrak i karim kaikai, “Bai mi putim olgeta lo bilong mi long bel bilong ol, na bai mi raitim long tingting bilong ol.” Hibrú 10: 16. Nau sapos lo i stap pinis long bel, ating em inap stretim laip, a? Pasin bilong bihainim maus bilong God - man i gat trupela pasin [59] bilong givim bel i save mekim dispela - em i trupela mak bilong disaipel bilong God. Olsem Baibel i tok, “Sapos yumi bihainim lo bilong God, orait yumi save givim bel long God.” 1 Jon 5: 3. “Sapos wanpela man i tok, ‘Mi save gut long God’ tasol em i no bihainim lo bilong God, orait dispela man em i man bilong giaman na tok tru i no i stap long bel bilong em.” 1 Jon 2: 4. Bilip bilong man i no ken mekim man i lusim dispela pasin bilong bihainim maus bilong God. Nogat. Em i bilip, na bilip tasol, em inap larim yumi long kisim marimari bilong Kraist na long mekim yumi inap long bihainim maus bilong God.

Sapos yumi wok long bihainim maus bilong God, dispela i no bilong kisim pe olsem God bai i kisim bek yumi. Long wanem, taim God i kisim bek yumi, dispela samting em i presen God i givim yumi, i no gat pe, na yumi ken kisim dispela long bilip. Tasol sapos yumi bihainim maus bilong God, dispela pasin em i olsem pikinini kaikai bilong bilip. “Yupela i save, Kraist i bin kamap bilong tekewe sin, na i no gat sin i stap long em. Man i stap wantaim em, dispela man em i no bihainim pasin bilong sin. Sapos wanpela man i bihainim pasin bilong sin, orait yumi ken save, em i no bin lukim Kraist, na em i no save long Kraist.” 1 Jon 3: 5, 6. Dispela hia em i trupela mak. Sapos yumi stap wantaim Kraist, sapos marimari bilong God i stap long yumi, ol samting yumi pilim, ol tingting, ol laik na pasin bilong yumi bai i kamap olsem laik bilong God. Dispela laik bilong God yumi lukim long lo holi bilong em. “O, ol liklik pikinini bilong mi, yupela lukaut! Nogut wanpela man i giamanim yupela. Man i mekim -stretpela pasin, em i stretpela man olsem Kraist em i stretpela man.” 1 Jon 3: 7. Stretpela pasin yumi ken lukim long lo holi, long dispela tenpela lo God i givim long Sainai.

Sampela man i tingting olsem, sapos ol i gat bilip long Kraist i no ken bihainim maus bilong God. Tasol, dispela kain bilip i no stret. “Yupela i bilip long Kraist, na long marimari bilong God tasol, God i kisim bek yupela.” [60] Efesas 2: 8. Tasol, “Bilip tu, em i olsem tasol. Sapos em i stap nating, na i no kamapim gutpela pasin, orait em i samting nating.” Jems 2: 17. Jisas i bin tokaut taim i no bin kam yet long dispela graun, “Mi amamas long

bihainim laik bilong yu, O God bilong mi; yes, lo bilong yu i stap long bel bilong mi.” Sam 40: 8. Na taim i laik go antap gen long heven em i tok, “Mi bin bihainim gut lo bilong Papa bilong mi, na mi stap insait long sori bilong en.” Jon 15: 10. Baibel i tok, “Na sapos yumi bihainim lo bilong God, orait yumi ken save tru olsem: Yumi save gut long em... Sapos wanpela man i tok, ‘Mi stap wantaim God,’ orait, dispela man em i mas wokabaut olsem Kraist i bin wokabaut.” 1 Jon 2: 3, 6. “Long wanem: Kraist i bin karim pen bilong yupela. Olsem na em i soim yupela dispela pasin bilong em, bai yupela i ken bihainim lek bilong em.” 1 Pita 2: 21

Rot bilong kisim laip bilong i stap oltaim i wankain olsem bipo - em i olsem long Peradais taim namba wan papamama bilong yumi i no pundaun yet long sin - bihainim tru lo bilong God, na bihainim tru stretpela pasin. Sapos rot bilong kisim laip bilong i stap oltaim i no olsem, bai amamas bilong ol long heven na long graun i ken lus. Sin i ken kamap gen na trabel na sori bilong sin bai i stap oltaim oltaim.

Taim Adam i no bin mekim sin, em inap mekim stretpela pasin long bihainim lo bilong God. Tasol em i no mekim dispela, na sin bilong em i spoilim laip bilong yumi olgeta, na yumi no inap mekim stretpela pasin long strong bilong yumi yet. Olsem na yumi pulap long sin, yumi no holi, yumi no inap bihainim tru dispela lo holi. Yumi no gat wanpela stretpela pasin inap long bihainim lo bilong God. Tasol Kraist i bin mekim rot na yumi ken abrisim dispela pasin bilong bagarap. Em i bin stap long dispela graun wantaim trabel na traime olsem yumi. Em i no bin mekim wanpela rong. Em i dai long kisim bek yumi, na em i laik tekewe ol sin bilong yumi na givim yumi stretpela pasin bilong em. Sapos yu givim laip bilong yu long em, na [61] bilip long em olsem peman bilong yu, tru sin i bin spoilim laip bilong yu tasol long pasin bilong Peman, God i makim yu stretpela man. Pasin bilong Kraist i kisim ples bilong pasin bilong yu, na God i save kisim bek yu olsem man i no bin mekim rong.

Na moa yet, Kraist i save senisim bel bilong yumi. Em i save stap long bel bilong yumi long bilip. Yu mas stap klostu long Kraist oltaim long bilip, na long givim ol laik bilong yu long em oltaim. Na sapos yu mekim ol dispela, God bai i wok insait long laip bilong yu. Em yet i kirapim laik bilong yupela i ken mekim wok olsem em yet i laikim. Olsem na yu ken i tok, “Nau olgeta wokabaut bilong mi long graun em mi wokabaut long bilip tasol. Mi bilip long Pikinini Bilong God em i sori long mi na i lusim laip bilong em yet

bilang helpim mi.” Galesia 2: 20. Olsem na Jisas i bin tok long ol disaipel bilang em, “Bai yupela yet tasol i no autim tok. Nogat. Spirit bilang Papa bilang yupela, em bai i autim tok long maus bilang yupela.” Matyu 10: 20. Nau, taim Kraist i wok long laip bilang yu, bai yu soim spirit i wankain na mekim pasin wankain ol stretpela pasin, na bihainim maus bilang God.

Olsem na, yumi no gat wanpela pasin long laip bilang yumi yet bilang givim yumi amamas. Yumi no ken tingim yumi bikpela man. Wanpela rot tasol i stap, olsem stretpela pasin bilang Kraist i save givim nating long yumi na wok bilang Holi Spirit insait long laip bilang yumi i helpim yumi long helpim arapela manmeri.

Taim yumi tokaut long bilip yumi mas save gut long dispela. Long wanem, i gat bilip i narakain. God i stap, na i gat pawa, na tok bilang em i tru. Seten tu na ol ensel bilang en i no inap long tok ol dispela samting i giaman. Baibel i tok, “Ol spirit nogut ol tu i save bilip olsem, na ol i guria nogut.” Jems 2: 19. Tasol dispela i no bilip tru. Taim man i bilip long ol tok bilang God na i save givim laik bilang en long God; taim man i givim bel bilang en long God na em i tingting long God tasol, dispela em i bilip tru - [62] bilip i kirapim man long givim bel, na bilang stretim laip. Long dispela kain bilip man bai i kamap nupela gen wankain God. Na man husat bipo i no bin kamap nupela gen, em i no save stap aninit long lo bilang God. Nogat. Em i no inap long mekim olsem. Tasol, nau em i amamas long lo bilang God na em i tokaut wantaim Devit, “O, mi laikim tumas lo bilang God! Mi tingting long en olgeta de.” Sam 119: 97. Na stretpela pasin bilang lo i ken kamap long wokabout bilang yumi husat i bihainim Spirit bilang God.

I gat sampela man i bin save long marimari bilang Kraist, na ol i laik tru long kamap pikinini bilang God, tasol ol i save laip bilang ol i no stret olgeta na ol i wari, olsem ol i tingim Holi Spirit i no bin kamapim nupela laip long ol. Long dispela lain mi ken tok, yu no ken wari na tingting yu no inap. Planti taim bai yumi mas pundaun long lek bilang Jisas na krai long ol sin na rong bilang yumi; tasol yumi no ken larim dispela bel hevi i spoilim yumi. Sapos Seten i winim yumi, God i no ken lusim yumi olgeta. Nogat. Kraist i stap long han sut bilang God na em i save beten long God i helpim ol. Aposel Jon i spik, “Mi raitim dispela tok long yupela, bilang yupela i no ken mekim sin. Na sapos wanpela man i mekim sin, yumi gat Helpim bilang yumi, em i stap wantaim Papa. Em dispela stretpela man Jisas Kraist.” 1 Jon 2: 1. Na, no ken lusim tingting long toktok bilang Kraist, “Papa, em yet i laikim yupela.” Jon

16: 27. Em i laik yu ken kam bek gen long em; i laik lukim klinpela pasin na holi pasin bilong em i kamap long laip bilong yu. Na, sapos yu givim laip bilong yu long em, em husat i bin statim gutpela wok long yu i ken mekim i kamap moa inap long de bilong Jisas Kraist. Mekim prea strongpela moa, bilip moa yet. Taim yumi tingim strong bilong yumi yet i no inap, yu ken bilip moa long pawa bilong Peman bilong yumi, na bai yumi litimapim nem bilong em husat i strong bilong yumi.

Taim yu kam klostu moa long Jisas, yu save moa laip bilong yu i no stret; long wanem, ai bilong yu i ken lukim [63] klia na yu lukim ol rong bilong yu i narakain tru long stretpela pasin bilong Jisas. Dispela samting i soim olsem pawa bilong Seten i no inap winim yu, na Spirit bilong God bilong givim laip i kirapim yu.

Sapos man i no save laip bilong em i no stret, em i no inap givim bel bilong en tru long Jisas. Sapos marimari bilong Kraist i bin senisim man, em bai i laikim tru pasin bilong Jisas; tasol sapos yumi no save laip bilong yumi i no stret, dispela i soim tru yumi no bin lukim gutpela lukluk na pasin bilong Kraist.

Sapos yumi lukim laip bilong yumi yet na tingting em i no gut tumas, orait, bai yumi save lukim moa planti gutpela pasin na klinpela, pasin long Jisas. Taim yumi lukim pasin nogut long yumi yet, bai yumi laik kam long Jisas. Em yet i ken tekewe olgeta sin. Na taim yu mekim dispela pasin na laik long kisim Jisas, em bai i kam long yumi wantaim pawa. Olgeta taim yumi pilim laip i sot long Jisas na yumi go long em na ritim Baibel, orait, yumi lukim planti gutpela pasin bilong Jisas na bai yu ken kamap wankain em tru. [64] [65]

Sapta 8—Kamap Man Tru Bilong Jisas

Dispela senis i kamap long bel taim yumi kamap pikinini bilong God, Baibel i tok i olsem taim nupela pikinini i ka-map. Na em i tok gen, dispela i olsem lip bilong gutpela pikinini wit bosboi i planim. Olsem na, man i kisim Kraist long nau tasol, em i olsem “nupela pikinini,” (1 Pita 2: 2) bilong “kamap man tru” (Efesas 4: 15) olsem manmeri i pas tru wantaim Kraist. Na em i olsem gutpela pikinini wit ol i planim long gaden na i kamap tru na karim kaikai. Aisaia i tok, ol “bai i kolim em diwai bilong stretpela pasin God i planim bilong kisim glori.” Aisaia 61: 3. Olsem na stori i kamap long samting God i mekim bilong helpim yumi long kisim save long laip bilong Spirit.

Olgeta save bilong man i no inap long wokim laip insait long wanpela liklik samting God i bin wokim. Long laip God i givim tasol, ol plaua na bus i ken i gat laip. Olsem na, long God tasol man em inap long kisim laip bilong Spirit long bel bilong em. Sapos man i no “kamap nupela gen,” (Jon 3: 3) em i no inap kisim dispela laip Kraist i kam bilong givim em.

Em i olsem long laip, na kamap bilong en i wankain. God tasol i putim pikinini plaua na bihain kaikai. Long pawa bilong em, pikinini wit i kamapim lip, “pastaim lip i kamap, na bihain het i kamap, na bihain kaikai ‘i kamap bikpela insait long het.” Mak 4: 28. Na profet Hosia i tokaut long Isrel i spik, “em bai i kamap olsem wanpela plaua.” “Ol bai i kamap strong olsem kaikai, na kamap tru olsem [66] diwai wain. “Hosia 14: 5, 7. Na Jisas i tokim yumi, “Yupela tingim ol plaua.” Luk 12: 27. Ol kainkain plaua i no kamap long wok no wari bilong ol yet. Nogat. Ol i kamap taim ol i kisim ol samting God i givim bilong helpim ol. Wanpela pikinini em in no inap kamap bikpela long wari no pawa bilong em yet. Olsem tu, yu no inap kamap tru long laip bilong Spirit long wari na strong bilong yu yet. Dispela plaua na pikinini i kamap tru taim i kisim ol samting i stap nabaut bilong helpim ol win, lait bilong san na

kaikai. Ol dispela i helpim abus na plaua, na olsem, Kraist i helpim olgeta man husat i gat bilip long em. Em i “lait i stap oltaim oltaim” (Aisaia 60: 19) bilong ol, em i “san na hap plang.” Sam 84: 11. Em bai i olsem “wara bilong Isrel.” Hosia 14: 5. “Em bai i kam daun olsem wara i pundaun long gras ol i katim pinis.” Sam 72: 6. Em i wara bilong laip. “Dispela bret God i givim, em i lusim heven na i kam daun na i givim laip long ol manmeri long graun.” Jon 6: 33.

Taim God i givim pikinini bilong en, dispela presen i winim olgeta presen, em i pulapim dispela graun long marimari. Dispela marimari i trupela samting olsem win yumi pulim. Ol husat i laik pulim dispela win - i marimari bilong Kraist bilong givim laip - em bai i kamap man tru olsem manmeri i pas tru long Kraist Jisas.

Plaua i save tanim pes bilong en i lukim san, bilong kisim gutpela lait na bilong mekim em i kamap gutpela tru. Olsem na yumi mas tanim pes bilong lukim San bilong Strepela Pasin - dispela em i Jisas - na lait bilong heven i ken laitim yumi na bai pasin bilong yumi i ken kamap wankain Kraist.

Jisas i skulim yumi long dispela taim em i spik, “Yupela i mas i stap long mi, na mi stap long yupela. Sapos han bilong diwai wain em i no pas long diwai, orait em i no inap karim kaikai. Olsem tasol, sapos yupela i no i stap wantaim mi, yupela tu i no inap karim kaikai.... Sapos yupela i lusim mi, yupela i no inap mekim wanpela [67] samting.” Jon 15: 4, 5. Sapos wanpela han wain i laik kamap strong na karim kaikai i mas pas tru long diwai wain. Olsem na yupela i mas pas tru long Kraist sapos yupela i laik kamap holi. Sapos yupela i no pas wantaim Jisas yupela i no gat laip. Yupela i no gat pawa bilong winim ol traim no bilong kamap long marimari na pasin holi. Sapos yu pas wantaim em, bai yu kamap gutpela tru. Taim yu pulim laip i kam long Jisas, yu no inap dai na yu no ken lus long karim kaikai. Bai yu olsem wanpela diwai ol i planim klostu long wara.

Plantu man ol i ting i mas mekim sampela wok em wanpela tasol. Ol i bin bilip long Kraist i tekewe sin, tasol nau ol i hatwok long stretim laip long strong bilong ol yet. Tasol dispela kain pasin i no inap. Jisas i tok, “Sapos yupela i lusim mi, yupela i no inap mekim wanpela samting.” Jon 15: 5. Yumi i kamap long marimari na amamas na pasin bilong helpim arapela. Ol dispela pasin i kamap taim yumi stap wantaim Kraist tasol. Sapos yumi toktok long em, olgeta de, olgeta aua, na stap wantaim em, orait, long dispela yumi i ken kamap long marimari. Em i no As bilong bilip bilong yumi tasol,

em i Man bilong mekim bilip bilong yumi i karim kaikai tru. Kraist em i namba wan na las, na i bilong olgeta taim. Em i no inap stap wantaim yumi taim yumi nupela pikinini, na taim yumi laik dai tasol. Nogat. Em i mas i stap wantaim yumi long olgeta wokabaut bilong laip bilong yumi. Devit i spik, “Olgeta taim mi lukluk long God; long wanem, em i stap long han sut bilong mi na mi no inap lus.” Sam 16: 8.

Yu laik askim, “Olsem wanem mi ken i stap wantaim Kraist?” - Long rot yu bin kisim pastaim. “Yupela i kisim pinis Bikpela Kraist Jisas, olsem na yupela i mas wokabaut wantaim em.” Kolosi 2: 6. “Tasol stretpela man bilong mi em i bilip, olsem na bai em i stap laip.” Hibrui 10: 38. Yu bin givim bel bilong yu long God long kamap pikinini bilong em, long wok long em na bihainim em, na long kisim Kraist i Helpim bilong yumi. Long strong bilong yu [68] yet, yu no inap tekewe sin no senisim bel; tasol yu givim bel bilong yu pinis long God na yu bin bilip God i mekim pinis ol dispela samting bilong helpim yu. Long bilip, yu bilong Kraist pinis, na long bilip bai yu kamap man tru na pas wantaim em - long givim samting na kisim samting. Yu mas givim olgeta samting, bel bilong yu, laik bilong yu, na wok bilong yu - givim olgeta samting long em bilong bihainim maus bilong em; na yu mas kisim olgeta samting - Kraist, em i pulap long olgeta blesing, bilong stap long bel. Em yet em i strong bilong yu, stretpela pasin bilong yu na Helpim bilong oltaim - bilong givim pawa bilong bihainim maus.

Givim laik bilong yu long God long moningtaim; dispela em i namba wan wok bilong yu. Prea bilong yu i ken olsem, “Kisim mi, O God, bilong yu olgeta. Olgeta laik bilong mi bilong wok mi putim aninit long laik bilong yu. Kisim mi tude long mekim wok bilong yu. Stap wantaim mi na olgeta wok bilong mi bai i kamap long strong bilong yu.” Dispela em i samting bilong mekim long olgeta de. Olgeta moningtaim givim laip bilong yu long God inap long de tasol. Olgeta samting yu laik mekim i mas aninit long laik bilong God, bilong mekim no no mekim. Olsem na, sapos yu putim laip bilong yu long han bilong God long olgeta de, long dispela pasin bai yu i ken kamap moa na moa olsem laip bilong Kraist.

Laip i stap wantaim Kraist em i laip bilong malolo. Tru, yu no pilim amamas i bikpela moa, tasol, yu pilim bilip i gutpela na i save stap oltaim. Helpim bilong yu i no yu yet, em i Kraist. Dispela pasin bilong yu i no strong tumas em i pas wantaim strong bilong em; liklik save bilong yu i skruim wantaim bikpela save bilong em, bodi bilong yu i no strong tumas em i pas

wantaim strong bilong em i stap oltaim. Olsem na, yu no ken lukluk long yu yet na tingting planti long yu yet. Lukluk i go long Kraist. Tingting planti long marimari bilong em, na long ol gutpela pasin bilong em i no gat sin. Kraist i no tingting long em yet, em i save dau- [69] nim ol laik bilong em yet, em i klin na holi, em i pulap long pasin bilong givim bel bilong em long arapela. I no gat arapela man i olsem. - Tingting planti long ol dispela samting. Taim yu givim bel bilong yu long em, bihainim lek bilong em, na em i bin helpim yu, bai yu senis na kamap wanbel wantaim em.

Jisas i spik, “Yupela i mas i stap long mi.” Dispela tok i tokaut long malolo, pasin bilong stap strong na long bilip. Na gen em i spik, “Yupela olgeta i kam long mi, na bai mi givim yupela malolo.” Matyu 11: 28. Tok bilong Devit i wankain. “Kisim malolo long God na wetim em.” Sam 37: 7. Na Aisaia i tok, “Sapos laip i no gat nois, na i gat bilip, long dispela bai yu kisim strong.” Aisaia 30: 15. Dispela malolo yumi no inap kisim taim yumi les; long wanem, singaut bilong Jisas i skruim malolo na wok wantaim. Em i tok, “Dispela diwai i stap long sol bilong mi, em yupela kisim.... Na bai yupela i painim malolo.” Matyu 11: 29. Sapos bel bilong man i malolo moa long Jisas, em bai i mekim strongpela wok moa long wok bilong God.

Taim man i tingting planti long em yet, dispela pasin i tanim em na em bai i givim baksait long Kraist, i As bilong strong na laip. Olsem na, olgeta taim Seten i laik putim narapela samting long tingting bilong man, bilong mekim em i lusim tingting long Kraist, na em i no stap wantaim Jisas na toktok long em. Ol amamas bilong graun, wari bilong man na sori, rong bilong arapela no rong bilong yu yet - Seten i laik pasim tingting bilong man long ol dispela samting. Yu no ken larim Seten i gramanim yu. Planti man husat i gutpela man na i laik bihainim rot bilong God, em tu Seten i laik giamanim em. Ol i tingting long rong bilong ol yet long tingim ol pasin bilong ol i no strong tumas. Olsem na, long dispela pasin Seten i laik mekim ol i lusim Kraist na em bai i winim ol. Yumi no ken mekim yumi yet i olsem as bilong laip bilong yumi; na wari na pret na tingting yumi no inap kamap long heven. Ol dispela tingting i [70] save lusim yumi long As bilong ol strong. Larim God i lukautim laip bilong yu na bilip long em. Toktok na tingting long Jisas. Tingting long Jisas oltaim, na olsem yu no gat taim bilong tingting long yu yet. Lusim dispela tingting bilong ting yu no inap painim heven; lusim ol pret bilong yu. Yu spik olsem Aposel Pol i spik, “Olsem na nau mi stap laip,, em i no laip bilong mi yet. Nogat. Kraist em i stap laip insait long mi. Na nau olgeta wokabaut bilong mi long graun, em mi

wokabaut long bilip tasol. Mi bilip long Pikinini Bilong God em i sori long mi nai lusim laip bilong em yet bilong helpim mi.” Galesia 2: 20. Malolo wantaim God. Yu givim pinis ol samting bilong yu i go long em, na em inap lukautim ol samting long laip bilong yu. Sapos yumi i stap long han bilong em, Kraist i bin givim bel long yumi, em oltaim i mekim yumi i win tru.

Taim Kraist i kisim pinis laip na pasin bilong man em i pasim pinis ol manmeri wantaim em long bikpela pasin bilong givim bel. Na i no gat wanpela pawa i ken lusim yumi long dispela, laik bilong man tasol em inap lusim. Oltaim Seten i laik putim planti gutpela samting long ai bilong yumi bilong mekim yumi i lusim Kraist - bilong mekim yumi laik long lusim em. Yumi mas was gut long dispela, na hatwok na prea, na bai wanpela samting i no ken mekim yu long laik long kisim narapela bikpela man long laip bilong yu; long wanem, oltaim yu ken lus sapos yu laik. Mobeta yumi mekim ai i pas tru long lukim Jisas, na em bai i lukautim yumi. Taim yu lukluk long Jisas yu ken orait. 1 no gat wanpela samting em inap lusim yu long han bilong em. Taim yumi lukim em, “Oltaim yumi save kisim glori moa yet, na dispela em i senisim yumi, na yumi kamap olsem piksa bilong Bikpela yet. Bikpela em Spirit, na em i mekim olsem.” 2 Korin 3: 18.

Long dispela pasin ol disaipel i kamap pastiam, ol i bin kamap wankain gutpela Helpim bilong yumi. Taim ol dispela disaipel i harim toktok bilong Jisas, ol i pilim long kamap olsem em tru. Ol i painim em, ol i kisim em, na ol i [71] bihainim em. Ol i stap wantaim em long haus, long tebol, long rum na long gaden. Ol i stap wantaim em olsem skulboi i stap wantaim tisa, na long olgeta de ol i kisim save bilong trupela pasin i kam long maus bilong em. Ai bilong ol i lukluk i go long Jisas, olsem wokboi i lukluk long bikpela man bilong kisim save long wok bilong ol. Dispela lain disaipel ol “i man wankain olsem yumi.” Jems 5: 17. Ol i pait long winim sin olsem yumi. Ol i sot long marimari olsem yumi, bilong i kamapim laip holi.

Jon tu, dispela pren tru bilong Jisas i winim arapela long mekim gutpela pasin i wankain olsem pasin bilong Helpim, em bipoi nogat dispela gutpela pasin. Em bipo i laik bikhet long arapela na i laik tru long kisim biknem. I no dispela tasol, em tu i belhat na kros taim arapela i rongim em. Tasol taim em i luksave long pasin bilong Jisas, em i save em i sot long planti samting, na dispela save i wok long daunim tingting bilong em. Olgeta de em i lukim planti gutpela pasin i stap long laip bilong Pikinini bilong God. Em i lukim strong bilong em na pasin bilong man i sanap strong long traime. Em i lukim

pawa bilong em na marimari, em i Nambawan King na i gat isi pasin long ol man. Ol dispela samting i mekim Jon i tingim Jisas i gutpela tru na i laik givim bel long em. Olgeta de tingting bilong en i stap long Jisas. Olsem na, em i no tingting moa long em yet, em i givim bel long Bikpela. Em i larim Kraist i senisim pasin bilong kros na bikhet long pawa bilong em. Pawa bilong Holi Spirit i kamapim nupela bel long em. Pawa bilong pasin bilong Jisas i givim bel, i senisim pasin bilong em. Dispela bai i kamap oltaim sapos man i stap wantaim Jisas. Taim Jisas i stap long bel, olgeta pasin bilong man i narakain. Spirit bilong Kraist na pasin bilong em i givim bel, dispela i mekim man i bel isi na em bai i tingting long God na heven.

Taim Kraist i goap long heven, ol disaipel i pilim olsem em i stap yet wantaim ol. Na ol i pilim marimari na lait. Dispela Jisas, Helpim bilong ol, i bin wokabaut na toktok [72] na pren wantaim ol, i bin tokaut long pasin bilong wetim God na i strongim bel bilong ol, nau, taim em i givim tok bilong bel isi em i bin goap long heven. Taim i goap na klaut bilong ol ensel i kisim em, ol i harim tok bilong en i kam daun long ol - “Mi stap wantaim yupela long olgeta de, inap long dispela taim i pinis.” Matyu 28: 20. Em i bin go long heven na em i man yet. Ol disaipel nau i save Jisas i bin klostu long sia King bilong God, na em i Pren na Helpim bilong ol yet; tingting bilong en i no senis; em i Helpim yet bilong man i gat trabel. Nau em i beten long God i helpim ol. Long wanem blut bilong en i lus bilong baim bek ol man. Nau em i soim God dispela mak long han na lek bilong tingting bek long bikpela ofa em i mekim pinis bilong baim bek man. Ol i save i bin go long heven bilong redim ples bilong ol, na bai em i ken kam bek na kisim ol i go i stap wantaim em.

Taim Jisas i goap pinis na ol disaipel i bung, ol i laik tru long prea long Papa God long nem bilong Jisas. Olsem na pasin holi ol i prea na ol i tokim dispela ves bilong strongim tingting bilong ol. “Sapos yupela i prea long Papa i givim wanpela samting long yupela, orait, long nem bilong mi bai em i givim long yupela. Bipo yupela i no prea long kisim wanpela samting long nem bilong mi. Yupela prea, na bai yupela i kisim. Olsem na bai bel bilong yupela i amamas tru.” Jon 16: 23, 24. Ol i putim bilip i go antap moa na moa taim ol i tok, “Kraist Jisas em i bin i dai, yes, na i kirap bek tu. Na em i stap long han sut bilong God, na i save prea tu bilong helpim yumi.” Rom 8: 34. Na long Pentikos ol i kisim dispela Man bilong strongim bel, em i Holi Spirit. Kraist i bin tokaut long Holi Spirit taim em i tok, “na bai em i stap insait long yupela.” Jon 14: 17. Na em i tok gen, “Tasol mi tok tru long yupela. Mi lusim

yupela na mi go, em i bilong helpim yupela. Sapos mi no i go, bai Man bilong strongim yupela em i no i kam long yupela. Tasol, sapos mi go, orait bai mi salim em i kam long yupela.” Jon 16: 7. Nau, long Spirit, Kraist em inap stap [73] wantaim ol pikinini bilong en oltaim. Bipo ol i stap wantaim Jisas, tasol nau ol i stap klostu moa long em. Lait, na pasin bilong givim bel, na pawa bilong Jisas, i stap insait long laip bilong ol, na ol i autim long arapela man. Olsem na, taim ol man i lukim pasin bilong ol, “ol i tingting planti. Ol i save, bipo tupela i stap wantaim Jisas.” Aposel 4: 13.

Ol samting Kraist i mekim long ol disaipel em i laik mekim olsem long ol pikinini bilong en tude; long vvanem, taim em i mekim prea long las taim wantaim sampela disaipela em i tok, “Tasol mi no beten bilong helpim ol dispela tasol. Nogat. Mi beten bilong helpim ol man i harim tok bilong ol na i bilip long mi.” Jon 17: 20.

Jisas i bin prea long helpim yumi na em i askim olsem yumi olgeta i ken stap wanpela tasol, olsem em na God i stap wanpela tasol. O gutpela samting! Helpim bilong yumi i tokaut long pasin bilong em yet, “Pikinini em i no inap mekim wanpela samting long tingting bilong em yet.” Jon 5: 19. “Papa i stap long mi, em i save mekim ol wok bilong en.” Jon 14: 10. Nau sapos Kraist i stap long bel bilong yumi, em bai i wok insait long yumi “na yupela i ken mekim wok olsem em yet i laikim.” Filipai 2: 13. Yumi bai i wok olsem em i bin wok; na soim spirit i wankain. Olsem, na taim yumi givim bel long em na stap wantaim em, bai yumi ken “kamap man tru, na pas tru wantaim Kraist, em i het bilong yumi.” Efesas 4: 1 5. [74] [75]

Sapta 9—Wok Na Laip

God em i as tru bilong laip na amamas long olgeta ples. Olsem lait i kam long san, na wara i ran long ples i kam antap long graun, olgeta blesing i kamap long God, na i go long olgeta samting em i bin wokim. Na taim laip bilong God i stap insait long bel bilong man, bai dispela i ken kapsait, na blesing na marimari bai i go long arapela man-meri.

Jisas i amamas long litimapim na baim bek man i pundaun long sin. Long dispela em i no tingim laip bilong en, tasol em i karim pen na i dai long diwai kros, na em i tingim sem bilong diwai kros i olsem samting nating. Olsem, ol ensel i wok oltaim long mekim arapela i amamas. Dispela em i amamas bilong ol. Man i save tingting long em yet tasol, taim em i lukim pasin bilong helpim ol rabisman tru, dispela wok i nogut tru long ai bilong en, long wanem, em i tingim i mas daunim em yet long mekim kain wok olsem. Tasol ol ensel i no bin mekim sin, i save mekim dispela wok. Pasin long marimari bilong Jisas - em i no tingting long em yet - dispela pasin em i pasin bilong ol long heven, na dispela pasin em i as tru bilong amamas bilong ol. Ol man i bihainim Jisas i mekim dispela pasin, na bai ol i mekim dispela kain wok.

Taim marimari bilong Jisas i stap insait long bel bilong man, olsem gutpela smel bilong plaua, dispela pasin i no ken hait. Na ol man i lukim yumi i ken save long dispela pasin. Dispela pasin bilong Jisas, taim i stap insait long bel, [76] em i olsem wara i kam antap long graun long ples i no gat wara tru. Na dispela pasin i kirapim man, na helpim dispela man i lus, long painim laip.

Taim man i gat marimari long Jisas, em i soim dispela pasin long mekim wok olsem Jisas, long blesim na litimapim ol man. Na bai i soim marimari na sori long olgeta samting God i wokim na lukautim.

Taim Jisas i stap long dispela graun, laip bilong en i no isi. Em i no tingting long mekim laip bilong en i gutpela. Fm i wok hat tru olgeta taim na em i no wok isi liklik - bi-long painim ol man i lus na kisim bek ol. Long

taim em i kamap pikinini, i go inap long taim em i dai long Kalvari, olgeta de em i daunim laik bilong em yet, na em i no laik lusim hatpela wok na longpela wokabaut. Em i tok, “Pikinini Bilong Man... i no bin i kam bilong ol man i ken mekim wok bilong helpim em. Nogat. Em i kam bilong mekim wok bilong helpim ol, na bilong lusim laip bilong em yet bilong baim bek planti manmeri.” Matyu 20: 28. Em i tingim dispela wanpela tingting tasol long laip bilong en. Olgeta arapela samting i kam bihain, na bilong kisim hap bilong helpim dispela wanpela wok. Em i kaikai bilong en na dring bilong en, long bihainim laik bilong Papa na long pinisim wok bilong Papa. Long wok bilong en, em i no tingting liklik long laik bilong em yet.

Olsem olgeta manmeri i bin kisim marimari bilong Jisas, i ken redi long mekim ofa i bikpela moa yet, bilong helpim arapela manmeri God i baim bek, i ken kisim hap bilong dispela presen bilong heven. Bai ol i wok strong long mekim dispela graun i gutpela ples moa, long wanem, ol yet i stap long graun. Sapos man i tanim tru na kam bek long Jisas, dispela pasin i mas kamap long laip bilong en. Taim man i kam long Jisas em i laik tumas long tokaut long arapela, Jisas em i gutpela pren tru. Man i no ken pasim long ting-ting bilong en, dispela trupela tok na tok bilong kisim bek man. I mas telimautim dispela tok. Sapos yumi putim klos bilong stretpela pasin bilong Jisas, na yumi i pulap long [77] amamas bilong Holi Spirit, bai yumi no inap long pasim maus. Sapos yumi kaikai pinis na save God i gutpela, bai yumi painim gutpela stori bilong tokaut. Olsem Filip taim em i painim Jisas, bai yumi ken mekim olsem, na askim arapela man long kam long Jisas. Bai yumi soim arapela ol gutpela pasin bilong Kraist, na ol samting yumi no lukim yet long laip i kamap bihain. Na laik bilong yumi i strong moa moa yet long bihainim rot Jisas i wokabaut. Yumi laik tumas ol arapela klostu long yumi ken “Lukim, em i Pikinini Sipsip Bilong God. Em i tekewe sin bilong olgeta manmeri long graun.” Jon 1: 29.

Na taim yumi wok long helpim arapela, blesing bai i kam long yumi yet. Olsem bilong dispela, God i givim yumi dispela hap wok insait long wok bilong baim bek man. God i givim long man dispela gutpela pasin bilong kamap wankain God long pasin na laip, na bihain long givim long ol arapela man, ol blesing ol yet i kisim. Ol man i kisim dispela wok bilong marimari, bai i kam klostu moa long God em i wokim ol samting.

God em inap long givim ol tok bilong dispela gutnius, na wok long marimari long ol ensel. Em inap long painim narapela rot long mekim

dispela. Tasol long dispela marimari bilong em i bikpela moa yet, em i mekim yumi, long wok wantaim em yet, na wantaim Kraist na ensel. Long dispela em i laik yumi ken painim ol blesing na amamas i mekim tingting i antap, taim yumi wok long arapela, na no gat tingting long yumi yet.

Em i skruim yumi wantaim sori bilong Kraist taim yumi kisim hap long pen bilong en. Olgeta taim yumi wok long helpim arapela na no tingting long yumi, i strongim pasin bilong givim samting, long bel bilong man i mekim olsem. Na dispela pasin i skruim yumi klostu moa long Peman bilong dispela graun husat “em i gat planti samting, tasol bilong helpim yupela em i kamap rabis tru. Em i mekim olsem bilong em yet i ken i stap rabis, na long dispela yupela i ken kisim planti samting.” 1 1 Korin 8: 9. God i [78] laikim yumi mekim olsem long laip bilong yumi, na long taim tasol yumi inapim dispela, bai laip i ken pulap long blesing.

Sapos yu go na wok olsem Kraist i laikim ol disaipel bi-long en i mas wok, na pulim man i kem long en, bai yu pilim yu mas painim planti save moa long pasin bilong God. Na bai yu laik tumas long kisim stretpela pasin olsem man i hangre long kaikai na i dai long wara. Bai yu beten long God, na bilip bilong yu i ken strong moa. Na yu ken dring planti long dispela gutpela hul wara, olsem laip i no ken pinis. Taim hatpela taim na ol traim i kam long yu, bai ol i mekim yu ritim Baibel, na mekim prea. Bai yu kisim moa dispela marimari na kisim planti save long Kraist, na laip bilong yu i ken pulap tru.

Pasin bilong wok long helpim arapela tasol, i mekim laip i strong moa, na gutpela lukluk bilong Kraist i karamapim, na bel isi na amamas i ken kam wantaim. Ol laik bilong man long samting i laik mekim, bai i kamap bikpela moa. I no gat ples bilong les, na bilong tingting long em yet. Ol husat i mekim pasin bilong Kristen i kamap strong long laip bilong em, bai i strong moa long wok bilong God. Bai save long pa-sin bilong God i ken klia moa, bilip bilong en i ken strong moa, na strong bilong prea i ken antap moa. Spirit bilong God i wok long laip bilong man, na han bilong God i mekim laip bilong dispela man i swit moa. Ol husat i givim strong bilong ol long wok long helpim arapela tasol, bai i mekim rot bilong painim laip i ken stap oltaim oltaim.

I gat wanpela rot tasol long kisim dispela marimari long mekim long strong bilong yumi dispela wok Kraist i askim yumi long mekim. Olsem long helpim na givim blesing long olgeta manmeri long olgeta strong bilong yumi. Strong bilong bodi i kamap bikpela taim yumi wok, na lo bilong laip i olsem,

man i mas wok. Ol man i laik stap Kristen na kisim olgeta blesing i kam long marimari, tasol ol i no wok liklik long wok bilong Kraist. ol i laik olsem kaikai na no mekim wok. Olsem long laip bilong vumi, dispela pasin i [79] mekim laip i no strong na dai i kamap; em i tru tumas olsem long laip bilong Kristen. Sapos man i no laik wok long han na lek bilong en, i no longpela taim bai strong bilong han na lek i pinis olgeta. Na i tru olsem long Kristen, sapos em i no mekim wok bilong God, em bai i no kamap bikpela long pasin bilong Kraist, tasol bai ol strong bilong em i lus olgeta.

Sios bilong Kraist em i rot God i makim bilong kisim bek man i lus. Wok bilong sios i bilong karim dispela gutnius long olgeta hap graun. Na dispela wok i kam long olgeta Kristen. Olgeta wan wan i mas long olgeta strong bilong en inapim dispela tok bilong Kraist bilong salim ol man long dispela wok. Taim yumi save long marimari bilong Kraist, yumi gat dinau long olgeta manmeri i no save long Jisas. God i givim lait long yumi - na i no bilong yumi tasol, i bilong givim long arapela.

Sapos ol man i bihainim Jisas na kisim wok bilong em. bai i gat planti tausen tude long ples i gat wanpela, i telimautim gutnius long ol ples bilong haiden. Na ol i no inap long mekim dispela wok, bai ol i strongim dispela wok long mani, na pasin na prea bilong ol. Na wantaim bai wok i strong moa long kisim bek man long ol ples Kristen i stap.

Yumi no ken go long ples bilong haiden. yumi no ken lusim lain bilong yumi, sapos wok God i givim yumi i stap long ples tasol. Yumi ken mekim dispela long lain bilong yumi, long sios bilong yumi, na long ol manmeri klostu long yumi, na long ol yumi lukim long wok bilong yumi.

Bikpela hap bilong laip bilong Jisas lone dispela graun, em i wok long kamda long Nasaret: Planti ensel i stap wan-taim Bikpela bilong laip taim em i wokabaut wantaim ol wokboi na man i wok long gaden, tasol ol man i no save long en na ol i no litimapim nem bilong en. Em i bihainim wok bilong em yet taim em i wok kamda olsem long taim em i mekim sikman i gutpela gen, na taim em i wokabaut antap long bikpela raunwara long Galili. Olsem long ol liklik wok bilong ol rabis man, yumi ken wokabaut na wok [80] wantaim Jisas.

Aposel i tok, “Kam wok man i bin i stap long en na God i singautim em, em i mas i stap long dispela wok tasol wantaim God.” 1 Korin 7: 24. Man i wok bisnis i ken wokim bisin long pasin i ken litimapim nem bilong Bikpela, olsem em i no stilman. Sapos em i bihainim Kraist tru, bai lotu bilong en i

ken go wantaim em long olgeta samting i mekim na soim long olgeta man pasin bilong Kraist. Man i wok long stretim ensin long ka i ken wok tru long soim trupela pasin bilong Jisas, husat i wok strong long wok man i no save amamas long en tumas, taim i stap long hap bilong Galili. Olgeta man i kisim nem bilong Kraist i mas wok olsem na taim arapela i lukim wok bilong en, i ken litimapim nem bilong Jisas, em Peman bilong yumi i bin wokim dispela graun.

Planti i tok ol i no inap long givim strong bilong ol long wok bilong Kraist, long wanem, arapela i gat save moa. Wanpela tingting i stap long planti man, olsem, man tasol i gat bikpela save moa i mas mekim wok bilong God. Planti ol i tingting liklik lain man tasol i kisim gutpela save, na ol arapela i no kisim na ol i no ken wok wantaim man i gat gutpela save, na ol i no ken kisim pe olsem. Tasol long tok bokis dispela i no tru. Taim bikpela i singautim ol wokboi em i givim olgeta man wok bilong em yet.

Ol wok bilong laip i no bikpela long ai bilong planti man, tasol yumi ken mekim ol dispela long marimari, olsem, “Yupela i mekim wok long Bikpela.” Kolosi 3: 23. Sapos marimari bilong God i stap long bel bilong yumi, yumi ken lukim long laip. Gutpela pasin bilong Kraist i ken stap nabaut long yumi, na pasin bilong yumi i ken helpim na blesim arapela.

Yu no ken wet long bikpela wok na long taim bai yu ken kisim bikpela save, na bihain wok long God. Yu no ken tingim tumas long tingting arapela manmeri i tingting long yu. Sapos laip bilong yu long olgeta de i soim bilip bilong yu i klin na tru, na arapela i save yu yet yu laik helpim ol, [81] bai wok bilong yu i no ken lus olgeta.

Sapos disaipel bilong Jisas em i daunim moa tingting bilong em yet, na em i rabisman tru, em yet i ken givim blesing long arapela. Ol i save ol i mekim gutpela wok. Tasol laip bilong ol yet i mekim wok bilong blesing i kamap bikpela moa, olsem liklik si long raunwara i save kamap bikpela moa na i daunbilo moa. Na ol i no ken save pinis long wok bilong ol, bai ol i save long de Jisas i givim pe long ol man. Ol i no save ol i mekim bikpela wok. Ol i no hatwok long tingting long wok bilong ol, i gutpela no nogut. Ol i wok tru tasol long wok God i givim ol, na laip i no ken lus nating. Pasin bilong ol i klosap moa olsem laip bilong Kraist. Ol i wok wantaim God long dispela laip, na olsem ol i redi long bikpela wok na amamas tru bilong laip i kamap bihain. [82] [83]

Sapta 10—Bilong Save Long God

I gat planti rot God i wokim bilong soim em yet long yumi na bilong bringim yumi klostu long em long toktok wantaim em. Taim man i opim bel bilong em, bai i ken save taim em i lukim ol samting han bilong God i wokim, ol marimari na glori bilong em. Taim ia i op bilong harim, em i ken save long ol samting God i wokim na i laik toktok long yumi. Ol gras i grinpela, ol diwai 1 antap tru, ol plaua na pikinini plaua, ol klaut i antap, ol ren i pundaun, ol liklik wara i krai long ston, ol glri bilong ol sta long heven, ol dispela i toktok long tingting bilong yumi, na askim yumi long kisim save long em em i wokim ol dispela.

Jisas i skruim ol tok bilong em wantaim tok bilong ol samting God i wokim. Long diwai, na pisin, ol plaua i stap klostu long wara, ol maunten, na raunwara, na gutpela lukluk bilong heven. ol dispela wantaim ol stori bilong laip bilong man yet, em i skruim wantaim trupela tok. Na man i ken tingting bek planti taim long tok bilong em taim em i stap namel long wok bilong em.

God i laikim ol pikinini bilong em i ken amamas long ol samting em i wokim, na amamas tru long gutpela bilasem i wokim long dispela ples bilong yumi. God i laikim tumas ol samting i lukluk gutpela, na antap long olgeta samting i lukluk gutpela long ausait, em i laikim moa, laip bilong man i ken lukluk gutpela tru. Em i laikim yumi i ken mekim klinpela pasin na pasin holi i kamap long laip bilong yumi olsem ol plaua. [84]

Sapos yumi laik long harim, ol samting God i wokim i ken skulim yumi long pasin bilong harim tok na bilip. Long ol sta i wokabaut antap long skai long ples i no gat rot, na ol i bihainim long taim bipo inap long nau, rot God i makim long ol, na long ol samting i liklik tru, ol samting God i wokim i bihainim laik bilong God. Na God yet i lukautim gut na strongim ol samting em yet i wokim. God husat i holim ol sta, yu no ken makim namba bilong ol, long go long ples i no gat arere, em wantaim i lukautim liklik pisin i mekim gutpela sing na i no save pret. Taim ol man i go long wok bilong ol olgeta de,

olsem taim ol i mekim prea, taim ol i lindaun long nait, na taim ol i kirap long moningtaim, taim ol maniman i kaikai planti long gutpela haus bilong ol, no taim rabisman i bungim ol pikinini bilong em bilong kaikai liklik kaikai tru, God Papa long heven i save lukim ol wan wan long marimari. I no gat wanpela taim ai wara bilong wanpela i ken kapsait, tasol God i lukim. I no gat amamas i kamap long pes bilong wanpela em i no lukim.

Sapos yumi bilipim tru long ol dispela, bai ol tingting yumi mekim bel bilong yumi i hevi, i ken pinis olgeta. Laip bilong yumi bai i no ken pulap long sori olsem long nau, long wanem, yumi putim ol bikpela samting na ol liklik samting long han bilong God. Planti trabel moa i no inap pasim tingting bilong em. Hevi bilong ol trabel i no ken winim em. Sapos yumi mekim pasin olsem, yumi ken amamas long painim pinis malolo long laip bilong yumi. Planti man i no bin painim dispela malolo bipo.

Taim yu save long ol gutpela samting bilong dispela graun na yu amamas, yu ken tingting long dispela nupela graun i ken kamap bihain. Sin na dai i no ken kamap long dispela nupela graun. Long dispela ples ol samting God i wokim, i no ken pilim hevi bilong olgeta samting God i no laik tru long en. Larim tingting bilong yu i tingim piksa bilong heven, na yu save dispela ples i ken winim tru ol tingting yu ken tingim. Long ol samting God i wokim na [85] givim yumi, yumi ken lukim liklik tasol long glori bilong God. Baibel i tok, “Samting ai i no bin lukim, na ia i no bin harim, na i no bin kamap long tingting bilong man tu, olgeta samting God i bin redim bilong ol man i save givim bel long em.” 1 Korin 2: 9.

Man i raitim sing, na man i save moa long dispela graun, ol i mekim planti toktok long ol samting God i wokim. Tasol Kristen i ken amamas moa long gutpela lukluk bilong dispela graun, long wanem, em i save Papa bilong em i wokim ol dispela samting, na ol long plaua na diwai em i ken lukim marimari bilong Papa bilong em. I no gat narapela man i ken amamas tru long ol maunten, na baret, wara na solwara, sapos em i no tingting God i soim mari mari long ol man long dispela.

God i save toktok long yumi long taim em i lukautim yumi, na long taim Spirit bilong em i toktok long bel bilong yumi. Long ples yumi stap, na long ol pasin i stap nabaut long yumi, long ol nupela samting i kamap klostu long yumi long olgeta de, yumi ken kisim save, sapos tingting bilong yumi i op bilong kisim. Devit i toktok long pasin bilong God long lukautim gut olgeta, na em i tok, “Dispela graun i pulap long gutpela pasin bilong God.” “Husat

em i gat save, na i laik lukim ol dispela samting, em i ken save tru long marimari bilong God.” Sam 33: 5; 107: 43.

God i save toktok long yumi insait long Baibel. Long hia yumi ken lukim ol pasin bilong em yet, pasin bilong helpim man, na dispela bikepla wok bilong baim bek man. Yumi ken lukim stori bilong ol tumbuna na profet, na arapela holiman bilong bipo. Ol dispela man i “wankain olsem yumi.” Jems 5: 17. Yumi lukim ol i pait long winim ol bikpela sori olsem yumi yet. Yumi lukim ol i pundaun taim Seten i traime ol, olsem yumi bin mekim, na ol i strongim bel gen na winim dispela long marimari bilong God. Taim yumi lukim ol dispela, yumi kisim strong long bihainim stretpela pasin long laip bilong yumi. Taim yumi [86] ritim long ol gutpela taim long laip bilong ol, long lait, na marimari na blesing ol i bin kisim, na long wok ol i mekim long strong bilong God, dispela pasin i kirapim ol, i mekim bel bilong yumi i kirap strong long mekim pasin olsem na long wokabaut wantaim God.

Jisas i toktok long Olpela Testamen, na i tru moa moa yet long Nupela Testamen, “Dispela rait em yet i save autim as bilong mi.” Jon 5: 39. Em i baim bek man, na bilip bilong ol long wetim laip i stap oltaim. i stap tru long em. Yes, olgeta tok bilong Baibel i toktok long Kraist. Taim em i stat long kamapim ol samting, - “Em i wokim olgeta samting, na i no gat wanpela samting i kamap long narapela rot,” i go long las gutpela tok -“Harim! bai mi kamap kwiktai!” yumi ritim stori long wok bilong en na harim toktok bilong maus bilong em. Jon 1: 3. Revelesen 22: 12. Sapos yu laik kisim save long dispela Man bilong kisim bek yumi, yu mas ritim gut Holi Baibel.

Pulapim bel bilong yu long toktok bilong God. Em i olsem wara bilong laip, na em i ken mekim nek i gutpela taim yu dai long dispela wara. Em tu i bret i gat laip i kam daun long heven. Jisas i tok, “Sapos yupela i no kaikai bodi bilong Pikinini Bilong Man, na sapos yupela i no dringim blut bilong em. bai yupela i no gat laip long yupela.” Na em i mekim klia tok bilong em taim em i tok, “Dispela tok mi givim long yupela em i spirit, na em i laip.” Jon 6: 53, 63. Bodi bilong yumi i kisim strong long ol samting yumi kaikai na dring. Na em i tru olsem long laip bilong spirit. Ol samting yumi tingting long en, em i ken givim strong long laip bilong spirit bilong yumi.

Stori bilong baim bek man i stori ol ensel i laik tumas long save long en. Em tu bai i pulapim tingting bilong ol man i go long heven long oltaim oltaim. Nau wanem, em i gutpela yumi ken tingting planti long dispela man, a? Dispela bikpela marimari na pasin bilong Jisas long givim bel bilong em long

yumi, na dispela of a Jisas i mekim bilong yumi, i singaut long ol man i ken tingting planti long em. [87] Yumi mas tingting long pasin bilong Jisas, em i baim bek yumi na mekim beten long God i helpim yumi. Yumi mas tingting long wok bilong em husat i kam bilong kisim bek ol man long sin bilong ol. Taim yumi tingting olsem long ol samting bilong heven, bilip bilong yumi na pasin bilong yumi long givim bel i ken strong moa, na prea bilong yumi i ken gutpela moa long ia bilong God. Long wanem, ol preaem i pulap long bilip na pasin bilong givim bel. Ol prea tu i ken strong na ol i kamap long save. Na bai bilip bilong yumi long God i ken strong moa olgeta de, na long laip bilong yumi olgeta de yumi ken save long pawa bilong em bilong kisim bek ol manmeri i kam klostu long God long nem bilong em, na givim laip long ol i stap oltaim oltaim.

Taim yumi tingting planti long laip bilong Jisas i no gat rong, bai yumi laik long kamap olsem nupela gen long klinpela pasin bilong em. Bai yumi ken laik tumas long kamap wankain em yet, olsem man i hangre na i dai long wara bai i laikim kaikai na wara. Yumi laikim tumas Jisas. Taim yumi tingting moa long Jisas, bai yumi ken toktok moa long em long arapela, na laip bilong yumi i ken soim pasin bilong em long ol long dispela graun.

Baibel i no bilong saveman tasol. Nogat tru. Em i bilong olgeta man. Ol bikpela trupela tok insait long rot bilong kisim bek man, ol i klia olsem san i klia long namel long de. Na i no gat wanpela i ken lusim rot bilong en, tasol man i bihainim tingting bilong em yet, na lusim laik bilong God, i ken lusim rot.

Yumi no ken harim tok bilong man em i tok, “Baibel i tok olsem olsem.” Yumi yet mas lukim gut toktok bilong God. Sapos yumi larim narapela man i tingting long ples bilong yumi, bai tingting bilong yumi i no ken strong, na yumi bai i no inap save gut. Strong bilong tingting i ken lus taim yumi no tingting planti long bikpela tingting, na bai yumi no ken kisim bikpela save long tok bilong God. Tingting bilong man i ken kamap bikpela sapos em i mekim tingting i wok long ritim ol tok bilong Baibel, na bungim olgeta [88] tok Baibel i mekim long wanpela tok.

Pasin bilong ritim planti long rait bilong God, i antap long ol arapela pasin bilong strongim tingting bilong man. I no gat narapela buk i strong moa long mekim tingting i ken antap, na givim strong long man long tingting, olsem dispela tok tru bilong Baibel. Sapos man i ritim planti rait bilong God, long trupela pasin bilong kisim save bai tingting bilong man i ken bikpela

moa, na pasin bilong man i antap tru, na laip bilong man i ken strong moa. Dispela pasin yumi no lukim tumas long dispela taim.

Tasol sapos man i ritim liklik long rait bilong God na ritim kwiktaim, dispela pasin i ken helpim man liklik tru. Man i ken ritim Baibel olgeta, na em i no lukim gutpela, na em i no save ol tok hait i stap long en. Sapos yumi ritim wanpela hap wan taim na tu taim, na kisim save true long dispela hap, na save gutpela long stori bilong kism bek man i stap insait long dispela, dispela pasin i gutpela moa long ritim nating planti sapta na no save long ol. Yu mas holim Baibel i stap wantaim yu. Sapos yu gat liklik taim, ritim. Ritim gen na gen, na putim sampela ves insait long tingting bilong you. Taim you wokabout long rot yu ken ritim wanpela - liklik hap na tingting long en, olsem you putim dispela long tingting bilong yu.

Yumi no inap long kisim save sapos yumi no tingting gut na prea taim yumi ritim. Sampela hap bilong rait bilong God i isi tumas long save, na man i ken kisim stret ol tok. Tasol arapela hap i no isi long save taim yumi lukim kwik-taim. Yumi mas lukim rait bilong God na lukim ol arapela hap wantaim. Yumi mas lukim gut olgeta hap na prea taim yumi tingting long dispela. Sapos yumi ritim gut olsem, bai yumi ken painim bikpela save. Olsem man i mekim hul long graun long painim sampela gol i stap aninit long graun, man i lukim gut long tok bilong God i ken painim trupela tok i olsem i gat bikpela pe, na man i lukluk liklik tasol i no ken kisim dispela. Tok bilong God, sapos yumi tingting long en; i ken olsem wara i kapsait i kam long wara bilong [89] laip.

Yu no ken ritim Baibel wanpela taim sapos yu no mekim prea pastaim. Taim yumi opim dispela buk, yumi mas askim Holi Spirit i ken givim save long yumi, na yumi ken kisim olsem. Taim Nataniel i kam long Jisas, Jisas i tok, “Lukim, em i man bilong Isrel tru. I no gat wanpela giaman i stap long em.” Nataniel i tokim em, “Olsem wanem na yu save long mi?” Jisas i bekim tok long em, i spik, “Bipo Filip i no singautim yu na yu stap yet long as bilong diwai fik, long dispela taim mi lukim yu.” Jon 1: 47, 48. Na Jisas i ken lukim yumi tu long ol ples hait bilong mekim prea, sapos yumi laik kisim lait bilong save wanem i trupela. Ensel i Kam long ples lait bai i stap wantaim ol man i daunim pasin bilong ol, na askim God i ken givim save long ol.

Holi Spirit i save litimapim na haimapim Jisas. Em i wok bilong em long soim Kraist, na klinpela bilong stretpela laip bilong em, na dispela nupela laip God i givim yumi taim i kisim bek yumi. Jisas i tok, “Bai em i kisim tok

bilong mi na i autim long yupela.” Jon 16: 14. Spirit em i as bilong tok tru, em tasol em inap long skulim yumi long tok tru bilong God. God i tingting gut long ol man. Em i givim Pikinini bilong em long dai long ples bilong ol man, na em i makim Spirit bilong em long skulim man na long helpim man long olgeta taim. [90] [91]

Sapta 11—Prea

God i tok long yumi long olgeta samting em i wokim, na long revelesen, long pasin bilong em long lukautim yumi, na long wok bilong Holi Spirit. Tasol ol dispela samting em i no inap. Yumi mas opim bel bilong yumi long em. Bilong mekim Kristen laip bilong yumi i kamap strong, yumi mas toktok long God Papa long heven. Yumi ken tingting long em, yumi ken tingting long wok bilong en, long marimari bilong en, na long olgeta blesing bilong en. Tasol dispela em i no pasin bilong toktok long God stret. Bilong toktok wantaim God, yumi mas toktok long em long laip bilong yumi yet.

Prea em i pasin bilong opim bel bilong yumi long God, olsem long wanpela gutpela pren. Yumi no ken prea long God bilong soim God ol pasin bilong yumi - em i save pinis. Tasol yumi prea long God bilong mekim rot bilong yumi long kisim em. Prea em i no save bringim God i kam daun long yumi, tasol prea i bringim yumi antap wantaim God.

Taim Jisas i stap long dispela graun, em i skulim ol disaipel bilong en long mekim prea. Em i tok, ol i mas tokim God long samting ol i laikim bilong olgeta de, na long ol hevi bilong ol em ol i mas putim long han bilong God. Na Jisas i tokim ol, God i ken harim prea bilong ol, na olsem em i ken harim prea bilong yumi tu.

Jisas yet, taim em i stap wantaim man, i mekim prea long planti taim. Taim Jisas em i kisim ples bilong man, em i [92] save tru long ol pasin malumalum bilong man, na em i mekim beten, na krai long God bilong askim em long givim em nupela strong long olgeta de. Olsem em i ken strong inap long winim ol traim, na mekim wok bilong em. Jisas em i soim yumi ol dispela pasin bilong en, na bai yumi i ken bihainim lek bilong em. Em i brata bilong yumi long olgeta sik bilong yumi, na “olgeta traim i save kamap long yumi, dispela olgeta i bin kamap pinis long em bilong traim em tu.” Tasol em i holi, na pasin bilong en i no laikim tru ol samting nogut. Em i stap namel long dispela graun i pulap long sin, na em i winim ol traim i kam long em.

Olsem em i man tu, em i mas prea long God. Em i strongim bel na i amamas long toktok long Papa bilong em. Na sapos Jisas husat i kisim bek man, na em i Pikinini Bilong God, em i pilim i mas prea; wanem nau long yumi man husat i no gat strong na i pulap long sin na dai? Ating yumi mas mekim beten na strongpela prea olgeta taim, a?

Papa bilong yumi long heven em i wet long kapsaitim bikpela blesing long yumi. Yumi ken amamas, yumi ken dring planti long dispela wara i marimari bilong God. O sori! Bilong wanem yumi laik prea liklik tasol! God i redi long harim trupela prea bilong olgeta pikinini bilong en. Tasol yumi soim, yumi no laik tokaut long God olgeta samting yumi laikim. Ol ensel i ken tingting wanem, taim ol i lukim yumi man i no gat strong, na planti traim i kam long yumi, na bel bilong God i laik tumas long givim marimari i bikpela olgeta long yumi? Em i redi long givim yumi antap long olgeta samting yumi laik askim, na yumi ken tingting, tasol yumi man i save prea liklik tru, na bilip i liklik olsem! Ol ensel i laik tumas long lotu long God, ol i laik tumas long stap klostu long en. Taim ol i toktok wantaim God, dispela em i nambawan amamas bilong ol. Tasol ol man bilong graun ol i sot tumas long help God tasol i ken givim, ol i laik wokabaut nating na no lukim lait bilong Spirit Bilong God, na no laikim God i ken pren na stap [93] klostu long ol.

Tudak bilong Seten i karamapim ol i lusim pasin bilong prea. Birua bilong yumi i tokim ol traim long yumi i isi isi na gutpela, long mekim yumi pundaun long sin. Na dispela i kamap long yumi long wanem, yumi lusim pasin God i givim yumi long kam long em long prea. Bilong wanem ol pikinini manmeri bilong God i no laik mekim prea? Prea i olsem ki long han bilong bilip, bilong opim banis long olgeta blesing long heven, na insait long dispela, olgeta blesing na strong bilong God i stap. Taim yumi no mekim prea long olgeta taim na yumi no lukluk gut long laip bilong yumi, bai em i isi tumas long yumi pundaun na lusim trupela rot. Olgeta taim birua bilong yumi i laik pasim rot i go long God. Em i no laik yumi ken beten na bilip strong na painim marimari na strong long winim olgeta traim bilong en.

1 gat sampela lo yumi ken save bai God i ken harim prea, na givim yumi ol samting yumi askim. Namba wan long dispela i olsem yumi pilim yumi mas painim help long God. Em i mekim promis, “Mi ken kapasaitim wara long ol man i dai long wara, na bikpela wara long graun i drai.” Aisaia 44: 3. Ol man husat i laikim tumas long kisim stretpela pasin olsem man i hangre

long kaikai na i dai long wara, na ol i laik painim God, i ken save tru, bai God i givim ol inap tru. Sapos bel bilong man i no op long Spirit bilong God, ol i no ken kisim blesing bilong God.

Olsem yumi no gat strong tru, na dispela em i olsem strongpela tok i beten long God bilong helpim yumi. Tasol yumi mas singaut strong long God na askim em long helpim yumi. Em i tok, “Yupela prea long God, na bai em i givim yupela.” Na “Em i no bin surik long givim Pikinini bilong em yet long yumi. Nogat. Em i salim em i kam bilong helpim yumi olgeta. Olsem na ating bai em i no givim nating long yumi olgeta arapela samting tu wantaim em?” Matyu 7: 7; Rom 8: 32.

Sapos yumi save sin i stap insait long bel bilong yumi, [94] sapos yumi holim pas sampela sin yumi save long en, God i no ken harim yumi. Tasol God i save harim prea bilong man i autim sin na i sori long en, na i daunim pasin bilong em. Taim yumi stretim olgeta sin yumi save long en, yumi ken bilip God i ken givim long yumi, samting yumi askim. Samting yumi yet mekim long laip bilong yumi i no ken mekim God i laikim yumi. Strepela pasin bilong Jisas tasol i ken kisim bek yumi, na blut bilong em i ken wasim yumi. Tasol yumi yet i gat sampela wok bilong mekim, bilong God i ken harim prea.

Narapela lo bilong prea em i bilip. “Sapos man i laik i go klostu long God, dispela man i mas bilip long God em i stap. Na em i mas bilip long God em i save givim gutpela pe long ol man i wok long painim em.” Hibru 11: 6. Jisas i tok long ol disaipel bilong en, “Na sapos yupela i mekim prea na i beten long kisim wanpela samting, na sapos yupela i bilip na i tok, ‘Yes, tru, mipela bai i kisim dispela samting, ‘ orait, mi tokim yupela dispela samting bai i kamap olsem yupela i tok.” Mak 11: 24. Nau wanem, yumi bilipim na bihainim dispela tok bilong em?

Promis bilong God i bikpela na i no ken pinis, na yumi save, olgeta samting God i tok pinis long mekim, em tru tumas bai em i mekim. Planti taim yumi save rong, na ai bilong yumi no ken lukim samting longwe, na long sampela taim yumi askim God long givim yumi samting i no gutpela long yumi. Na Papa bilong yumi long heven, long marimari bilong en i givim long yumi samting i gutpela moa long yumi. Samting yumi bai i ken askim God sapos yumi gat ai olsem God na yumi lukim ol samting long trupela pasin. Taim yumi no lukim samting yumi askim God long prea long givim yumi, yumi mas holim pas dispela promis bilong God. Na taim bilong kisim

dispela samting bai i ken kamap, na bai yumi kisim blessing yumi sot moa long en. Tasol sapos yu tok God i ken givim yu oltaim, wanem samting yu askim em long prea, na long pasin yu yet yu laikim, dispela i no stret. God em i gat save tumas na em i no [95] mekim rong, na em i gutpela tumas olsem em i no ken pasim yumi long kisim olgeta samting i gutpela, bilong ol i bihainim stretpela pasin. Sapos yu no lukim yet samting yu bin askim God long prea long givim yu, yu no ken pret long bilip long en. Kisim strong bilong yu long promis bilong God i tru tumas. “Yupela prea long God, na bai em i givim yupela.” Matyu 7: 7.

Sapos yumi no save bilip yet, na yumi trai askim ol dis-pela pret na trabel long givim save long laip bilong yumi, na long ol samting yumi no lukim klia, bilong mekim laip i klia olgeta; bai ol bikpela trabel i ken bikpela moa na i hat moa. Tasol sapos yumi kam long God, na yumi pilim yumi no gat strong, na yumi mas painim help long em - na dispela i tru tumas - na long bilip bilong yumi, tokim God long olgeta samting yumi sot long en, em husat i save olgeta samting, na em husat i wokim olgeta samting, na na long lo na tok bilong em i bosim olgeta samting; em inap long harim na bai i harim beten bilong yumi. Na lait i ken kam long bel bilong yumi. Trupela pasin bilong prea i skruim yumi wantaim tingting bilong God i gat olgeta save. Sampela taim yumi no save pes bilong Peman bilong yumi i klostu long yumi long marimari na bilong givim bel. Tasol dispela i tru olsem. Yumi no save pilim em i holim yumi, tasol han bilong en i stap long yumi bilong givim bel na bilong marimari tru.

Taim yumi kam long askim marimari na blesing long God, yumi mas holim pasin bilong marimari, na bilong lusim sin, long bel bilong yumi. Olsem wanem yumi ken prea olsem, “Na yu lusim ol sin bilong mipela, olsem mipela tu i lusim pinis sin bilong ol man i bin rongim mipela,” na holim yet pasin bilong no lusim sin long arapela manmeri? Matyu 6: 12. Sapos yumi laikim God i ken harim prea bilong yumi, yumi yet i mas lusim olgeta sin bilong arapela man long pasin olsem yumi laikim sin bilong yumi i ken lus.

Yumi mas strong long prea olgeta taim. Sapos yumi laik [96] God i ken givim samting yumi askim em long prea long long givim. Yumi mas prea olgeta taim sapos bilip na laip bilong yumi i ken amamas gutpela. Yumi mas “holim pas pasin bilong prea.” “Yupela i mas holim strong pasin bilong prea. Long prea bilong yupela, yupela i mas tingting gut na tenkyu long God.”

Rom 12: 12. Kolosi 4: 2. Pita i tok strong olsem, man i bilip i mas “tingting klia, na mekim prea oltaim.” 1 Pita 4: 7. Pol i tok, “Long olgeta samting yupela i mas tokim God long samting yupela i laikim. Yupela i mas prea long em, na singaut long em, na tenkyu long em.” Filipai 4: 6. “Tasol yupela ol brata tru” Jut i tok, “oltaim yupela i mas prea long strong bilong holi Spirit. Yupela i mas holim pas sori bilong God.” Jut 20, 21. Prea yumi mekim oltaim i save skruim yumi long God. Na laip bilong God i ken kam insait long laip bilong yumi, na klinpela pasin na stretpela pasin long laip bilong yumi i save go bek long God.

Yumi mas wok strong long mekim prea. Yu no ken larim wanpela samting i pasim yu. Long olgeta strong bilong yu, yu mas mekim toktok i go na i kam long yu na Jisas. Yu mas mekim rot long go long olgeta ples man i mekim prea long en. Ol husat i laik toktok tru long God, bai i ken stap wantaim ol long lotu bilong mekim prea. Ol i laik mekim dispela olgeta taim, long wanem, ol i laik kisim olgeta blesing. Ol i ken mekim rot long go long lait bilong heven em bai i ken kamap long ol.

Ol papamama na pikinini bilong ol i mas bung wantaim na mekim prea. Na antap long ol arapela samting, ol man i no ken lusim pasin bilong mekim prea, em wanpela na God. Dispela i laip tru bilong man. Pasin bilong man i no ken kamap strong taim cm i lusim pasin bilong prea. Sapos man i mekim prea wantaim meri na pikinini long haus bilong em, na wantaim long ol manmeri long ples, em i no inap. Taim man i stap wanpela, i mas opim bel bilong en long ai bilong God. Dispela prea hait, God tasol em i ken harim. Ia bilong narapela man klostu i no ken harim ol hevi [97] yumi autim long prea olsem. Taim yumi wanpela tasol i mekim prea, narapela samting i no ken mekim yumi lusim tingting long God, na i no gat wanpela samting i ken kam na mekim yumi kirap nogut. Isi isi, tasol strong yet, prea bilong yumi i painim God. Spirit bilong God i swit moa na i kam na stap wantaim yumi. Em i lukim yumi long ples hait na ia bilong em i op long harim prea i ken aut long bel bilong yumi. Bilong bilip i isi, man i ken toktok wantaim God na kisim lait bilong God i ken strongim na holim gut man long pait long Seten. God em i ples strong bilong yumi.

Mekim prea long rum bilong yu, na taim yu wok, planti taim yu mas opim bel bilong yu long God long prea. Long dispela pasin Inok i bin bihainim laik bilong God. Ol dis-pela prea yumi mekim i kamap long sia bilong marimari bilong God olsem gutpela smel tru. Seten i no ken winim

man i pas long God long dispela pasin.

I no gat wanpela ples no wanpela taim, em i no gutpela long mekim prea long God. I no gat wanpela samting i ken pasim yumi long litimapim bel bilong yumi long mekim beten. Long namel long planti man long rot, na long namel long wokim bisnis wantaim wanpela man, yumi ken mekim prea long God na askim em long givim save long yumi, olsem Niemaia i mekim taim em i mekim wanpela askim long King Ataseksis. Long wanem ples yumi stap yumi ken painim ples bilong prea. Yumi mas opim dua bilong bel bilong yumi olgeta taim, na olgeta taim askim Jisas bilong heven long stap insait long laip bilong yumi.

Taim ol pasin nogut i stap raun long yumi, yumi no ken tingting yumi mas bihainim dispela pasin nogut. Yumi ken kisim gutpela laip olsem bilong heven. Yumi ken pasim dua long olgeta tingting i no holi, na i no klin, taim yumi litimapim tingting bilong yumi long God antap na mekim beten. Ol husat i opim bel bilong en long kisim help na blesing bilong God, i save wokabaut long gutpela tingting i winim tingting bilong man long dispela graun, na toktok bilong [98] en i ken go long heven oltaim.

Taim yu lukim Jisas yu mas lukim klia moa, na tingting i mas pulap moa long ol samting bilong laip i ken stap oltaim oltaim. Gutpela pasin holi i mas pulapim bel bilong olgeta pikinini bilong God. Na bilong mekim dispela i kamap pinis long laip bilong yumi, yumi mas askim God i ken soim yumi pasin bilong heven yet.

Tingting bilong yu i go olgeta taim long heven, na God bai i larim yu long kisim gutpela save bilong heven. Yumi ken i stap klostu tru long God, na taim sampela traime i kam long yu, na yu no tingting bai i kam, yu ken tanim tingting bilong yu i go long God olsem sampela plaua i save tanim pes bilong en i go long san.

Tokim God olgeta taim wanem samting yu sot long en, na long amamas bilong yu, ol sori bilong yu, ol trabel bilong yu, na ol samting yu pret long en. Yu no inap long putim planti hevi tumas long em. Yu no inap long mekim em i les long dispela. God i save long olgeta namba bilong gras long het bilong yu, na em i no inap long tanim baksait long pikinini bilong em, taim ol i sot long samting. “Bikpela em i save sori moa long yumi, na oltaim em i marimari long yumi.” Jems 5: 11. Bel bilong em i pulap long marimari na em i pilim ol sori bilong yumi, na i pilim tu taim yumi toktok long en long sori bilong yumi. Bringim long em olgeta samting i mekim tingting bilong yu i

hevi. I no gat samting i bikpela tumas long em bilong karim, long wanem, em i holim antap olgeta sta, na em i bosim olgeta samting bilong olgeta san na sta. I no gat wanpela samting i ken mekim yumi bel isi, i liklik tumas long em long lukim. I no gat hap long laip bilong yumi i tudak long em long ritim. I no gat trabel i hat tumas long em long pinisim. I no gat wanpela bikpela trabel i ken kam long wanpela liklik pikinini bilong en, i no gat wanpela samting i mekim yumi pret, i no gat wanpela amamas i kirapim bel bilong yumi, i no gat wanpela prea i kamap long maus bilong yumi, tasol em i lukim pinis, na em i tingting long dispela [99] long taim i kamap. “God i mekim gutpela gen ol man bel bilong em i bruk long hevi. Em i pasim ol sua bilong ol.” Sam 147: 3. Pasin bilong God long wanpela man i narakain long pasin i mekim long ol arapela. Na God i tingting long wanpela man olsem sapos i no gat narapela man long dispela graun i mas lukautim, olsem sapos i no gat narapela man bilong husat i givim Pikinini bilong em.

Jisas i tok, “Yupela i prea long nem bilong mi. Na mi no tokim yupela olsem: Mi yet bai mi prea long Papa i helpim yupela. Nogat. Papa em yet i laikim yupela.” “Mi makim yupela pinis bilong mi... Olsem na sapos long nem bilong mi yupela i beten long Papa i givim wanpela samting long yupela, orait bai em i givim long yupela.” Jon 16: 26, 27. Jon 15: 16. Tasol long mekim prea long nem bilong Jisas, i no olsem bilong putim nem bilong en pastaim long prea na taim prea i pinis tasol. Em olsem bilong mekim prea long tingting na pasin bilong Jisas. Na yumi mas bilip long ol promis bilong em, bilip tru long marimari bilong em, na mekim pasin bilong em.

God i no gat tingting olsem yumi mas go na stap wanpela tasol, no stap wantaim sampela man holi na lusim ol arapela man, bilong givim laip bilong yumi long mekim lotu. Nogat. Laip bilong yumi i mas olsem laip bilong Kraist - em i go antap long maunten bilong mekim prea na kisim strong, na i go long ol man bilong helpim ol. Man i mekim prea tasol, long olgeta de, klosap bai i pinis long mekim prea, na ol prea bilong en i olsem tok nating. Taim sampela man i lusim ol arapela man, na ol i go longwe na lusim wok bilong Kristen, na bilong karim diwai kros; taim i pinis long wok strong long Bikpela husat i wok strong long ol, bai i lusim pinis pasin bilong prea tru, na i nogat samting bilong mekim i lotu gut. Long prea bilong ol bai ol i tingting long ol yet tasol. Ol i no inap long mekim prea bilong helpim ol man, na bilong strongim wok bilong God, na bilong askim God long givim ol strong bilong wok.

Yumi lusim pinis samting, taim yumi givim baksait long [100] taim yumi ken stap wantaim arapela man bilong God bilong toktok wantaim na strongim arapela long wok bilong God. Ol trupela tok long Baibel yumi no lukim gut tumas, na yumi no tingting ol tok i bikpela. Bel bilong yumi i no ken kisim save, na ol gutpela pasin bilong arapela i no ken kirapim yumi, na pasin bilong yumi long bihainim God i no strong tumas. Taim yumi Kristen man i stap wantaim arapela, yumi lusim planti help taim yumi no save marimari long arapela. Man i stap wanpela ples tasol, i no kisim ples tru olsem God i makim long em. Pasin bilong stap wantaim planti arapela man na toktok long ol, em i mekim yumi ken sori long arapela, na dispela pasin em i rot bilong mekim yumi kamap gutpela na kisim strong long wok bilong God.

Sapos ol Kristen man i stap wantaim arapela, na ol i toktok long arapela long marimari bilong God, na long ol gutpela tok bilong baim bek man, bel bilong ol i ken kirap gen, na ol i ken mekim arapela i kirap tu. Olgeta de yumi mas kisim save moa long Papa bilong yumi long heven, na kisim marimari bilong em i nupela gen long yumi. Sapos yumi olsem, bai yumi laik tumas long tokaut long marimari bilong em. Na taim yumi mekim pasin olsem, bel bilong yumi i ken pairap na yumi ken strong. Sapos yumi tingting na toktok moa long Jisas, na maski long toktok long yumi yet, bai Jisas i ken i stap klostu moa long yumi.

Sapos yumi tingting long God long olgeta taim yumi save lukim samting i soim yumi em i lukautim yumi, bai yumi ken tingting long em long olgeta taim, na yumi ken amamas long tokautim nius bilong en long arapela, na long litimapim nem bilong em. Yumi toktok long ol samting bilong dispela graun, long wanem, yumi gat save long en. Yumi toktok long ol pren bilong yumi, bilong wanem, yumi givim bel long ol, na olgeta amamas na sori i stap wantaim ol. Tasol long givim bel long God, i bikpela moa yet, long olsem yumi givim bel long ol pren long dispela graun. Na em i gutpela tru sapos i isi tumas long yumi long [101] mekim God i nambawan long ol tingting bilong yumi, na long tokautim gutpela pasin bilong em na strong bilong em. Ol gutpela presen bilong pe i antap moa, God i givim long yumi, i no bilong mekim tingting na marimari bilong yumi i go long ol dispela tasol na yumi no givim sampela tingting i go long God. Nogat. Ol dispela i bilong mekim yumi tingting long God, na bilong pasim yumi long rop bilong marimari na amamas long Bikpela long heven husat i givim yumi olgeta samting. Laip bilong yumi i olsem klostu tumas long dispela graun. Lukim long ai bilong yu, antap long dua bilong haus holi tru long heven, lait bilong glori bilong

God i go long pes bilong Kraist, “Olsem na em inap long kisim bek ol manmeri i kam klostu long God long nem bilong em.” Hibru 7: 25.

Yumi mas litimapim nem bilong God planti moa, “Bilong olgeta gutpela pasin bilong em, na bilong ol gutpela pasin em i mekim long man bilong dispela graun.” Sam 107: 8. Taim yumi mekim prea yumi no ken mekim oltaim long askim samting na long kisim samting tasol. Yumi no ken tingting oltaim long samting yumi tingting yumi sot long en, na lusim tingting olgeta long ol blesing yumi kisim pinis. Yumi no save prea planti tumas, tasol yumi lusim tumas pasin bilong tok tenkyu. Olgeta taim yumi save kisim planti blesing bilong God, na yumi tok tenkyu liklik tru. Long liklik taim tasol yumi save litimapim nem bilong God long olgeta samting em i mekim long yumi.

Long taim bipo God i tokim Isrel taim ol i bung long mekim lotu, “Yupela i mas kaikai long ai bilong Bikpela em i God bilong yu, na yupela i mas amamas long ol samting yupela i mekim, yupela na ol i stap wantaim yu.” Diuteronomi 12: 7. Ol pasin yu mekim bilong givim glori long God, yu mas mekim wantaim amamas, na long sing bilong litimapim nem bilong em, na bilong tok tenkyu. Na no ken mekim na sori long dispela.

God bilong yumi em i no hatpela, em i Papa bilong marimari. Taim yumi wok long em, yumi no ken tingim [102] dispela i bilong mekim yumi bel hevi. Nogat. Taim man i lotu long God na mekim wok bilong en, i ken amamas. God i no laikim ol pikinini bilong en, bilong husat i givim bikepla rot bilong kisim bek ol, i soim pasin olsem God i hatpela masta bilong ol. Nogat. Em i nambawan pren bilong ol, na taim ol i lotu long em, em i laik stap wantaim ol, long blesim ol na strongim bel bilong ol, na bilong pulapim bel bilong ol long amamas na marimari. God em i laik ol pikinini bilong em i ken strongim bel insait long wok bilong em, na kisim amamas long wok bilong em, na dispela amamas i winim ol hatpela taim. Em i laik ol husat i kam long lotu long em, i ken karim i go gutpela tingting long pasin bilong em long lukautim ol na long marimari. Na ol i ken amamas long wok bilong ol na ol i ken kisim marimari long mekim trupela na stretpela pasin long olgeta wok bilong ol.

Yumi mas kam klostu raun long diwai kros. Jisas Kraist, na dai bilong en long diwai kros i mas stap namel long ol tingting bilong yumi, na toktok bilong yumi, na long ol bikpela amamas bilong yumi. Yumi mas putim ol blesing yumi kisim long God, i stap namel long tingting bilong yumi. Na taim yu save long bikpela marimari bilong em, yumi bilip long em tru, na putim

olgeta samting long laip bilong yumi long dispela han ol i nilim long diwai kros.

Man i ken antap klostu moa long heven, taim em i liti-mapim nem bilong Jisas. Antap long heven, olgeta i lotu long God long sing na musik. Na taim yumi tok tenkyu long God yumi mekim wankain liklik olsem pasin olgeta bilong heven antap i mekim long lotu. “Husat man i litimapim nem bilong God, i givim glori long God.” Sam 50: 23. Yumi tu i mas kam long God long amamas i holi. Kam long God i wokim yumi. Na “tok tenkyu na sing wantaim gutpela musik.” Aisaia 5 1: 3. [103]

Sapta 12—Bilong Stretim Tingting

Planti man, na planti nupela Kristen, i gat wari long sampela taim, na ol i tingting planti long toktok bilong Baibel. I gat planti tok insait long Baibel ol i no inap autim klia, no-save gut long dispela. Long dispela Seten i laik sakim bilip bilong ol na mekim ol i tingim dispela tok i no tok bilong God stret. Ol i askim, i spik, “Olsem wanem mi ken save wanem rot i trupela? Sapos Baibel em i tok bilong God stret, olsem wanem mi ken lusim ol dispela pasin bilong kisim tupela tingting na wari?”

God, em i no askim yumi long bilip sapos em i no givim yumi planti save pastaim, na yumi ken bilip taim yumi lukim dispela. God i stap yet long heven, pasin bilong em i gutpela na toktok bilong em i tok tru. Baibel i tokaut planti long ol dispela na yumi laik long bilip long dispela. Tasol sampela i no bilip long en. God i no mekim vumi long bilipim, sapos man i laik i ken i gat tupela tingting. Bilip bilong yumi i mas kamap long ol samting yumi ritim long Baibel, i no ken kamap long tingting bilong yumi tasol. Sapos man i laik lusim bilip em inap; na olsem, sapos man i laik tru long save long tok tru, em bai i painim planti na em i ken sanapim bilip long dispela.

Sotpela tingting bilong man i no inap save gut long olgeta pasin na wok bilong God. Man i gat gutpela save na man i skul planti, em tu i no inap. Bikpela i stap long ples hait oltaim. “Yupela inap painim God? Yupela inap save gut long ol pasin bilong Bikpela Dispela i antap olsem heven; yu -inap mekim wanem? Daunbilo olsem hel; yu inap [104] mekim wanem? Jop I 1: 7, 8.

Aposel Pol i tok, “Olaman! Tingting bilong God na save bilong en em i pulap tru, na i daun tumas olsem solwara! Man em i no inap tru long painim as bilong olgeta tingting bilong em. Man em i no inap tru long bihainim olgeta rot bilong em.” Rom 11: 33. Tsol, “planti klaut na tudak i stap nabaut long em, stretpela pasin na wok kot em i as bilong sia king bilong em.” Sam 97: 2. Yumi inap save long pasin God i mekim long yumi, na ol laik bilong

en bilong helpim yumi, na olsem yumi save em i gat bikpela marimari na pawa i moa moa yet. Yumi save long God inap long helpim yumi tasol; na samting yumi no save yumi mas larim dispela i stap long han bilong God i pulap long pasin bilong givim bel.

Toktok bilong God, olsem pasin bilong em, i gat planti tok hait yumi man i no inap long save gut long en. Taim sin i kamap long dispela graun, taim Kraist i kamap insait long bel bilong mama bilong en, kirap bek bilong Jisas, na planti moa toktok yumi ritim long Baibel - long ol dispela yumi save liklik tasol, yumi no inap save olgeta as bilong dispela tok. Tasol yumi no ken tingim tok bilong God i no tru, long wanem, yumi no save gut long sampela tok hait i stap long gutpela pasin bilong en. Long ol diwai na plaua na ol samting God i wokim long dispela graun, yumi lukim planti samting yumi no save gut long en. Ol bikpela saveman long dispela graun i no inap tru long save gut long liklik samting God i wokim. Long olgeta hap i gat planti gutpela samting God i wokim na yumi no inap save long en. Na wanem, yumi inap tingting planti sapos yumi lukim samting long Baibel na long Kristen laip yumi no save gut long en? Tingting bilong man i no strong tumas na olsem em i no inap save gut. God i bin givim yumi ol toktok long Baibel inap long yumi ken save em i toktok bilong God stret. Na olsem yumi no ken kisim tupela tingting long dispela, long wanem, yumi no save gut as bilong olgeta pasin na toktok bilong em. [105] [106]

Aposel Pita i tok, “Sampela tok i stap long dispela ol pas em i no klia, na i gat hatwok bilong kisim save long en. Ol man i no gat save na ol i no sanap strong, ol i save paulim dispela tok na olgeta arapela tok bilong Baibel tu. Olsem na ol i lus.” 11 Pita 3: 16. Sampela man i no gat bilip i tok olsem, Baibel i hat tumas long save na olsem man i no ken bilip long en. Tasol, dispela kain tok i no stret. Ol toktok bilong Baibel i soim tru God i raitim. Sapos Baibel i tokaut long pasin bilong God ol samting i isi long save tasol; sapos yumi man inap save olgeta bikpela na olgeta pasin king bilong God; dispela Baibel i no gat mak tru bilong God. Ol bikpela na hatpela toktok em i mekim yumi bilip long Baibel em i toktok bilong God.

Baibel i soim tok tru, i isi long save, na map tru long pulapim laik na tingting long bel bilong man; na ol saveman i tingting planti taim i ritim na i amamas long en, na man i no gat planti save em inap painim rot bilong God i kisim bek em. Tasol trupela tok ol i raitim klia, i tokaut long tok i go longwe moa na i antap moa long liklik save bilong man. Yumi bilipim, long wanem,

God yet i tokim. Olsem na, wok bilong God i kisim bek man i klia tru, na ol i ken save long rot bilong tanim bel na kamap tru long God, na long bilip long Bikpela Jisas Kraist, bilong kamap pikinini bilong em. Tasol, aninit long dispela trupela tok i isi long save, i gat sampela tok hait bilong glori bilong God - tok i antap tumas long tingting bilong yumi, tasol em inap long givim yumi bilip na pasin bilong litimapim nem bilong God. Taim man i ritim Baibel, em i save moa dispela i tok bilong God long heven. Nau em i daunim tingting bilong en long trupela tok bilong God.

Sapos yumi tok yumi no inap save gut ol bikpela tok bilong Baibel, as bilong dispela i olsem - man tasol em i no inap save long tingting bilong God. Liklik save bilong man i no inap save ol bikpela save bilong God.

Sampela man i no gat bilip na ol i lusim toktok bilong God, long wanem, ol i no inap save long en. Na man i gat [107] bilip, em tu i mas was long dispela. Aposel i spik, “Ol brata, yupela i mas was gut. Nogut wanpela brata namel long yupela em i gat tingting nogut long bel bilong en na em i lusim bilip na i givim baksait long God i gat laip.” Hibrui 3: 12. Em i gut sapos man i ritim gut Baibel na lukim “olgeta pasin hait bilong God,” (1 Korin 2: 10) inap long save long samting God i soim pinis. “Ol tok hait i bilong God stret, na ol tok God i autim pinis long yumi, dispela i bilong yumi stret.” Diuteronomi 29: 29. Tasol em i wok bilong Seten bilong paulim tingting. Sampela man i laik bikhet taim i ritim Baibel na sapos ol i no inap save long wanpela pas ol i gat sem na kros na i laik autim tok bilong olgeta pas kwiktaim. Ol i gat bikpela sem long tok ol i no save gut long wanpela pas bilong God. Ol i no laik wetim God inap long taim em bai i mekim klia long tingting bilong ol. Ol i tingim save bilong ol yet em inap mekim ol i save long Baibel, na taim ol i no inap kisim save ol i tingting Baibel yet i no stret. Em i tru, planti toktok man i ting i bin aut long Baibel, i no kamap long Baibel, i narakain tok tru. Na dispela i mekim man i gat tupela tingting na i wari long dispela. Tasol, dispela tok i no bilong Baibel stret, i kamap long tingting bilong man tasol, na i no stret.

Sapos man em inap save long olgeta save bilong God na wok bilong em, em bai i no inap kisim save moa long trupela tok, em i no inap kamap long save, em i no inap strongim tingting moa na strongim bel moa. Olsem God no winim em long save; na man i pulap long olgeta save na i no inap kamap gutpela moa. Yumi mas tenkyu long God, dispela tok i no tru. God tasol i gat bikpela save; “Olgeta kain save na tingting hait em i pulap long Kraist, olsem

mani i pulap long beng.” Kolosi 2: 3. Na long oltaim oltaim man i ken painim save na kisim save na i no inap kisim olgeta save bilong save bilong God, bilong gutpela pasin na pawa bilong em.

Long laip bilong nau tu God i laikim man i ken painim [108] planti save long toktok bilong em long olgeta de. I gat wanpela rot tasol bilong kisim save. Holi Spirit tasol i ken autim save long toktok bilong God. Long wanem, em yet i bin helpim man long raitim pastaim. “I no gat wanpela man i save long tingting bilong God. Spirit bilong God yet, em tasol i save.” “Yes, Spirit em i save lukim olgeta samting, olgeta pasin hait bilong God tu.” I Korin 2: 11, 10. Na Helpim i bin promis long ol i bihainim em, “Tasol, bai Spirit bilong tok tru i kam, na bai em i stiaim yupela long olgeta tok tru.... Bai em i kisim tok bilong mi na i autim long yupela, long dispela pasin bai em i kamapim biknem bilong mi.” Jon 16: 13, 14.

God i laikim tumas man i ken strongim tingting bilong en; na taim man i kisim save long Baibel, em i painim nambawan samting bilong strongim tingting bilong en. Yumi mas was na no ken litimapim save long ai bilong yumi. Long wanem, tingting bilong yumi i no strong tumas na sampela taim yumi gat sik, na dispela inap long paulim tingting. Sapos yumi no laikim ol toktok bilong Baibel i ken olsem tok hait, na yumi no save long samting ol i raitim klia tumas, yumi mas i gat bilip olsem pikinini, na redi long kisim save na prea long Holi Spirit i helpim yumi. Taim yumi pilim pawa na save bilong God, na yumi no inap long save long ol bikpela pasin bilong em, dispela bai i daunim tingting bilong yumi, na yumi mas opim toktok bilong em olsem long pasin yumi mekim sapos yumi kamap long ai bilong en stret - long pasin Holi, na pret. Taim yumi ritim Baibel, yumi mas save dispela i antap long ol tingting bilong yumi yet, na bel na tingting bilong yumi i mas aninit long Bikpela.

I gat planti samting ol man i tingim i hat tumas long save, na i no klia tumas long tingting bilong ol. Tasol, dispela, bai God i mekim klia na isi long ol i ken save, sapos ol i prea long em i helpim ol. Tasol, sapos Holi Spirit i no helpim yumi, bai yumi paulim tok oltaim na autim tok i no [109] stret. Planti taim man i ritim Baibel, na dispela i no helpim ol. Na sampela taim, ol i ritim na i mekim tingting bilong ol i nogut. Taim man i opim Tok bilong God na i no litimapim nem bilong God na i no mekim prea pastaim; taim tingting na laik bilong man i no pas long God no long bihainim laik bilong God, tingting bilong em bai i olsem tudak, na i kisim tupela tingting; na nau taim man i

ritim moa long Baibel i ken lusim moa bilip bilong em. Birua i bosim tingting bilong yumi na em i paulim tingting bilong yumi, na i putim tok i no stret long tingting bilong yumi. Taim man i no laik kamap wanbel wantaim God long ol toktok na pasin bilong en, sapos man olsem i gat bikpela save, i ken autim long Baibel save i no stret, na yumi no ken bilip long ol toktok em i autim long yumi. Ol man i lukluk long Baibel bilong painim tok i rong, ol i no kisim save long God. Tingting bilong ol i paul pinis na ol bai i painim planti samting bilong givim tupela tingting long ol, na bilong sakim bilip bilong ol, insait long tok i klia na i isi long save.

Ol man i laik haitim pasin bilong ol, tasol as bilong dispela pasin bilong tupela tingting na pasin bilong sakim bilip em i olsem - ol i laikim tumas sin bilong ol! Man i laikim tumas sin, na i laikim biknem, em i no laik harim ol tok bilong God na lo bilong em. Ol husat i no laik bihainim tok bilong God, i redi long tingim Baibel i no tok tru bilong God. Sapos yumi laik painim tok tru, yumi mas laik tru long save long tok tru na laik long bihainim tu. Na olgeta man husat i ritim Baibel long pasin olsem, ol i ken save em i tok bilong God stret, na ol i ken save gut long tok tru inap long God i kisim bek ol.

Kraist i tok, “Sapos wanpela man i laik bihainim maus bilong God, em bambai i save as bilong dispela tok mi autim.” Jon 7: 17. Yu no ken toktok planti na tingting planti long samting yu no save gut; mobeta yu bihainim lait yu bin kisim pinis na bai yu kisim lait i bikpela moa. Long marimari bilong God, mekim olgeta wok yu save yu mas mekim, na bai God i helpim yu long save long ol na [110] long mekim arapela wok yu no save gut long en nau.

Yumi ken save long tok tru taim yumi traim ol tok insait long laip bilong yumi. Ol man i gat bikpela save na man i no gat, tupela wantaim i ken kisim save long dispela. God i askim yumi long traim ol tok bilong en long laip bilong yumi na skelim ol promis bilong en, i tru no nogat. Em i tok, “traim em, na save God i gutpela.” Sam 34: 8. Yumi no ken kisim tok bilong arapela man tasol, yumi yet i mas traim. Em i tok, “Yupela prea, na bai yupela i kisim.” Jon 16: 24. Em bai i givim ol samting em i bin promis long yumi. Ol promis i no pinis; ol i no inap pinis long oltaim. Taim yumi kam klostu long Jisas na amamas long gutpela pasin bilong en bilong givim bel, ol pasin bilong tupela tingting na tudak bilong yumi i pinis, long wanem, lait bilong Jisas i stap wantaim yumi.

Aposel Pol i tok olsem, God “i bin tekewe yumi long strong bilong tudak,

na em i putim yumi insait long lain bilong Pikinini bilong em, dispela Pikinini em i laikim tumas.” Kolosi 1: 13. Na ol husat i lusim pinis pasin bilong i dai, na i kamap long laip ol i ken “tok yes long dispela tok, ‘God em i save tok tru. ’” Jon 3: 33. Em i ken tok, “Bipo mi sot long help bilong God, na mi painim pinis long Jisas. Olgeta laik bilong mi em i bin pulapim, olgeta hangre bilong mi em i bin pulapim; na nau Baibel i tokim mi tok tru bilong Jisas. Yu laik askim mi bilong wanem mi gat bilip long Jisas? - Em yet i Helpim na God bilong mi. Bilong wanem mi gat bilip long Baibel? - Em i tok bilong God i kam long bel bilong mi.” Yumi ken kisim pinis dispela tok God i bin autim na save em i tok tru, na Kraist em i Pikinini bilong God. Yumi save yumi no bihainim tok giaman.

Pita i tok long ol brata bilong en, i spik, “Yupela i stap long marimari bilong Bikipela na Helpim bilong yumi Jisas Kraist, na yupela i save long em. Olsem na yupela i mas kisim moa dispela marimari, na yupela i mas kisim planti save long Kraist.” 11 Pita 3: 18. Taim ol i kisim moa dispela [111] marimari ol i kisim save i klia moa long tok bilong em. Ol bai i lukim nupela lait na gutpela tok tru insait long Tok Tru i Holi. Em i tru long lotu bipo na i tru nau inap long taim i pinis.” “Rot bilong stretpela man i olsem lait i kamap strongpela moa na moa inap long de bilong God.” Provep 4: 18.

Long bilip yumi ken lukluk i go long taim i laik kamap bihain, na kisim promis bilong God bilong strongim tingting-bilong yumi, na skruim ol samting bilong yumi wantaim God, na bringim ol pawa bilong yumi i kam klostu long As bilong lait. Yumi ken amamas long dispela. Ol samting yumi no save gut insait long pasin bilong God, em bai i mekim klia long tingting bilong yumi. Ol samting em i hat tumas long save, bihain bai yu save long ol. Na ol ples yumi lukim pasin i paul nabaut na ol laik i no bin kamap, yumi bai i lukim ol samting i klia na stret na gutpela tru. “Yes, nau yumi lukim samting olsem long glas bilong lukim pes, na i no klia tumas. Tasol long dispela taim bihain, bai yumi lukim tru pes bilong God. Nau mi save hap hap. Tasol bihain bai mi save tru long em, olsem em i save tru long mi.” 1 Korin 13: 12. [112] [113]

Sapta 13—Bikpela Amamas Bilong Ol Kristen

God i singautim ol pikinini bilong en bilong soim ol gut-pela pasin na marimari bilong Jisas. Olsem Jisas i soim tru-pela pasin bilong Papa bilong en long yumi, yumi mas soim dispela pasin bilong Jisas, long olgeta man i no save long dispela marimari. Jisas i tok, “Bipo yu salim mi na mi kam i stap namel long ol manmeri bilong graun. Olsem tasol mi salim ol tu ol i go i stap namel long ol manmeri bilong graun.” “Mi stap long ol, na yu stap long mi.... Olsem na ol manmeri bilong graun ol i ken save, yu bin salim mi na mi kam.” Jon 17: 18, 23. Pol i tok long ol disaipel bilong Jisas, “Yupela i stap ples kliia olsem wanpela pas i kam long Kraist.” “Olgeta man ol i save long dispela pas, na ol i save i ritim.” 11 Korin 3: 3, 2. Long olgeta pikinini bilong Jisas, em i salim wanpela pas long olgeta man. Sapos yu bihainim Jisas, em i salim wanpela pas - dispela pas em yu yet - long lain bilong yu, long wantok bilong yu, na long ples bilong yu. Taim Jisas i stap insait long laip bilong yu, em i laik toktok long tingting long olgeta husat i no save long em. Ating sampela ol i no save ritim Baibel, na ol i no harim God i toktok long ol long dispela buk, na ol i no save lukim marimari bilong God long olgeta samting em i wokim. Tasol sapos yu wanpela trupela man bilong soim pasin bilong Jisas, bai long yu yet, ol i ken save liklik long marimari bilong God, na ol i ken laik long wokboi bilong God na givim bel long en. [114]

Olgeta Kristen i olsem wanpela lait long rot i go long heven. Ol lait bilong Jisas i kam long ol, ol i mas givim bek dispela lait long ol bilong dispela graun. Laip na olgeta pasin bilong Kristen i mas olsem, na arapela man i ken kisim trupela save bilong Jisas na wok bilong em.

Sapos yumi soim pasin bilong Jisas stret, bai yumi mekim wok bilong en i lukluk gutpela moa. na olsem dispela i tru yet. Olgeta Kristen husat i bungim hevi na sori long laip bilong ol, na mekim tok nogut, ol i soim giaman piksa bilong God, na laip bilong Kristen, long arapela. Ol i soim

olsem God i no gat amamas taim pikinini bilong en i save amamas, tasol long dispela ol i mekim giaman.

Seten i save amamas taim i mekim pikinini bilong God i lusim bilip na pilim bel hevi. Em i amamas moa yet taim em i lukim yumi no bilipim God, na yu tingting strong bilong God i no inap na em i no laik long kisim bek yumi. Em i laik tumas yumi ken tingim taim God i wasman bilong yumi, em i mekim yumi nogut. Em i wok bilong Seten long mekim ol i tingting God i no gat marimari na i no save sori long yumi. Seten i mekim giaman tok long pasin bilong God. Em i laik pulimapim tingting bilong man long olgeta giaman tingting long pasin bilong God. Na planti taim tumas yumi no tingting long trupela pasin bilong Papa bilong yumi, na yumi save tingim ol giaman bilong Seten, na yumi lusim bilip long God, na mekim tok, God i nogut. Olgeta taim Seten i laik mekim laip bilong Kristen i lukluk olsem i no gat amamas. Em i laik mekim i lukluk olsem i hatpela, moa yet. Na taim ol Kristen i soim ol dispela pasin long laip bilong en, ol i strongim dispela giaman bilong Seten, long wanem, ol i no save bilipim God.

Planti long dispela laip, ol i tingim oltaim ol sin bilong ol, na rong bilong ol, na bel bilong ol i pulap long hevi na bikpela sori. Taim mi stap long hap bilong Yurop, wanpela meri em i mekim dispela pasin na kisim bikepla hevi olsem, em i raitim pas long mi bilong askim mi long helpim em. Mi ritim dispela pas na long nait mi driman mi stap long [115] wanpela gaden. Mi kisim planti plaua na mi amamas long ol gutpela smel bilong ol. Dispela meri i raitim pas long mi, i wokabaut klostu long mi, na singautim mi long lukim ol kanda i gat nil i pasim rot bilong en. Em i sanap na krai na mekim tok nogut. Em i no wokabaut long rot na bihainim man i soim rot long mipela. Em i wokabaut namel long ol kanda. Dispela meri i krai olsem, “Mi sori tumas ol rop i gat nil i mekim dispela gaden i nogut tru!” Na papa bilong dispela gaden i tok, “Maski long dispela rop i gat nil, larim i stap, em i ken mekim skin bilong yu i pen. Mobeta yu kisim ol plaua.”

Ating yu gat sampela gutpela taim long laip bilong yu, a? Wanem, yu no gat sampela taim bel bilong yu i amamas long bekim tok long Spirit bilong God, a? Sapos yu tingim bek laip bilong yu, yu inap long save long sampela gutpela taim i stap, a? Nau wanem, ol promis bilong God, olsem dispela gutpela plaua, ol i no i stap nabaut klostu long rot bilong yu, a? Na yu inap long larim gutpela lukluk na smel long olgeta promis, i ken mekim bel bilong yu i amamas, a?

Ol kanda na rop i gat nil, i bilong mekim yu nogut na sori tasol. Sapos yu kisim ol dispela samting na givim long arapela, bai yu tanim baksait long ol pasin gutpela bilong God, na wantaim yu pasim arapela klostu long yu long kisim laip.

I no gutpela sapos yu tingting bek long olgeta samting nogut i bin kamap bipo, na long olgeta sin long laip bilong yu, long toktok long ol dispela na pilim hevi long ol dispela. Bai dispela pasin i mekim yumi go daun long sori. Man i mekim pasin olsem, tudak i pulimapim em, na lait bilong God i no inap long go insait long laip bilong en, na em i mekim rot bilong arapela man i tudak wantaim.

Yu mas tok tenkyu long God long ol gutpela piksa em i bin soim yumi. Bungim olgeta promis bilong marimari bilong en na lukim oltaim. Pikinini bilong God taim i lusim sia king bilong Papa, em i stap God tru tasol em i karamapim [116] dispela na em i kamap man, bilong kisim bek man na lusim man long strong bilong Seten. Taim em i win bilong helpim yumi, na opim heven long man i ken lukim glori bilong God. Em i kirapim man long hul bilong sin. na bringim man i ken stap wantaim God yet, na taim God i traim em, man i ken sanap strong na winim dispela long bilip long Peman bilong yumi. Na, long klos olsem stretpela pasin bilong Jisas, man bai i ken kamap long sia king bilong Jisas. Ol dispela em i piksa God i laikim yumi ken tingim.

Taim bilip bilong yumi long promis na marimari bilong God i no strong, yumi mekim pen long bel bilong God na Holi Spirit. Wanpela mama i ken tingting olsem wanem, sapos ol pikinini ol i tingim mama i no gat marimari long ol, na ol i tok nogut long en olgeta taim, na ol i kros long mama na tok, “yu no bin lukautim mi gut.” Tasol mama i mekim gutpela pasin olgeta taim long helpim pikinini. Sapos pikinini ol i tingim mama i no gat marimari long ol, bel bilong mama i ken bruk long bikpela hevi tru. Nau ol arapela papamama i ken tingting olsem wanem sapos pikinini bilong ol i mekim pasin olsem? Na Papa bilong yumi antap long heven i ken tingting olsem wanem sapos yumi no save bilipim marimari bilong en - dispela marimari i givim dispela wanpela Pikinini bilong en tasol long givim laip long yumi? Aposel Pol i tok, “Em i no bin sunk long givim Pikinini bilong em yet long yumi. Nogat. Em i salim em i kam bilong helpim yumi olgeta. Olsem na ating bai em i no givim nating long yumi olgeta arapela samting tu wantaim em?” Rom 8: 32. Tasol hamas man i tok olsem long laip bilong en - sapos i no tok

long maus - “God i no save wokim dispela long mi. Mi tingting em i gat marimari long arapela man, tasol long mi yet i no gat.”

Ol dispela samting i save mekim laip bilong yu i nogut. Olgeta taim yu toktok liklik yu no save bilip, i olsem yu singautim Seten i kam. Long dispela tok i strongim yu long pasin bilong lusim bilip, na bilong mekim ol ensel i go longwe long yu. Taim Seten i traim yu, yu no ken toktok [117] long wanpela liklik tok olsem yu no bilip. Sapos yu opim dua long tok bilong Seten, bai em i ken pulimapim tingting bilong yu long olgeta tok nogut tru. Sapos yu tokim olgeta samting yu pilim, dispela tok i ken mekim laip bilong yu i ken nogut moa, tasol dispela tok i olsem pikinini kaikai yu planim long laip bilong arapela. Bai dispela pikinini kaikai i ken kamap bikpela na yu no inap long autim dispela samting nogut yu yet yu planim. Sampela taim yu inap winim traim bilong Seten, na umben bilong en, tasol long arapela man husat i harim toktok bilong yu, sampela i no inap. I gutpela sapos yumi toktok tasol long olgeta samting bilong strongim laip.

Ensel i save harim ol toktok yumi mekim long pasin bilong Papa bilong yumi. Larim toktok bilong yumi i ken toktok long Jisas husat i stap antap na em i save beten long God i helpim yumi. Taim yu holim han long pren bilong yu, yu mas toktok long amamas bilong God - dispela amamas i stap long bel bilong yu na long maus bilong yu. Em dispela pasin i ken mekim pren bilong yu i tingting long Jisas.

Olgeta man i gat taim bilong traim, taim bel i pulap long sori na i hat tumas long karim, traim i hat tumas long winim. Yu no ken telimautim ol trabel bilong yu long ia bilong arapela man. Bringim ol dispela i kam long God long prea. Yu mas mekim wanpela lo bilong yu olsem, yu no ken tokaut long liklik bilip na ol hevi bilong yu. Yu ken helpim laip bilong arapela man na strongim em taim yu toktok long pasin bilong wetim God na samting bilong mekim man i ken amamas.

I gat planti man i tingim i no inap long sanap strong long olgeta traim, na klostu ol i ken pundaun olgeta long dispela pait long pasin nogut bilong em yet, na long pait long strong bilong Seten. Yu no ken mekim tok bilong mekim laip bilong dispela man i hatpela moa. Tokim sampela gutpela tok bilong helpim em na strongim em. Dispela pasin i ken mekim lait bilong Jisas i ken kam long [118] laip bilong yu. “I no gat wanpela man i save tingim laip bilong em, em i samting bilong em yet.” Rom 14: 7. Taim arapela man i lukim laip bilong yumi, pasin bilong yumi i ken helpim na strongim em, na

sampela taim i ken mekim arapela i lus na i no laik long bihainim moa Jisas na trupela pasin bilong en.

Planti man i holim kranki tingting long pasin na laip bilong Jisas. Ol i tingting em i no gat amamas, na pes bilong en i hatpela na em i no gat amamas liklik. Long planti man dispela tingting bilong ol i ken mekim laip bilong ol i olsem ol i no gat amamas.

Planti taim man i tok, Jisas i bin krai, tasol pes bilong en i no bin soim liklik amamas long wanpela taim. Helpim bilong yumi em i Man bilong karim bikpela hevi, na em i save long olgeta bel hevi bilong em. Tru, laip bilong en i gat pen, na em i daunim tingting bilong em yet, tingting bilong en i strong olgeta. Pes bilong en i no save soim bikpela hevi na sori. Nogat. Pes bilong en i save soim bilip bilong en long God na pasin bilong bel isi. Bel bilong em i save pulap olgeta long laip, na long olgeta ples em i go, i karim malolo, na bel isi, na amamas.

Helpim bilong yumi em i tingting olgeta taim long wok bilong en, tasol pes bilong en i no save soim pasin bilong bel hevi. Laip bilong olgeta man i bihainim Jisas i ken pulap long strongpela tingting bilong wok. Ol i ken tingting strong dispela wok i bilong ol stret. Ol i ken daunim pasin bilong mekim planti lap, ol i no ken mekim tok bilong kirapim bikpela lap moa, tasol lotu bilong Jisas i save givim man gutpela pasin bilong bel isi. Em i no save pasim pasin bilong amamas, em i no save pinisim amamas na mekim pes i ken longpela tasol. Kraist i no bin i kam bilong ol man i ken mekim wok bilong helpim em. Nogat. Em i kam bilong mekim wok bilong helpim ol. Na taim marimari bilong Jisas i king long bel bilong yumi, yumi ken bihainim dispela pasin bilong en.

Sapos yumi tingim oltaim ol pasin nogut bilong arapela [119] man, bai yumi no inap long soim marimari long ol, olsem Jisas i soim long yumi. Tasol sapos yumi tingting long bikpela marimari Jisas i gat long yumi, yumi ken inap long mekim dispela pasin long ol. Tru ol man i gat sampela pasin nogut long laip bilong ol, na yumi save long ol dispela pasin, tasol yumi mas soim pasin bilong marimari long ol. Yu mas mekim tupela pasin i kamap strong - pasin bilong daunim yu yet, na pasin bilong tingim strong bilong yu i no inap. Na, taim yu lukim ol rong bilong arapela yu mas lukim long marimari. Dispela pasin bai i ken mekim dai ol pasin bilong tingting long yumi tasol, na mekim yumi laik tumas long helpim ol arapela long marimari.

Devit i tok, “Bilipim God, na mekim gutpela pasin; olsem yu ken sindaun

gut long hap graun bilong yu, na kaikai gutpela.” Sam 37: 3. Bilipim God. Olgeta de i gat ol kain hevi na trabel, na taim yumi lukim sampela pren, yumi save laik tumas long telimautim olgeta traim na trabel bilong yumi. Yumi mekim planti tok long ol trabel, na tok long pret, na sapos arapela man i harim toktok, em i ken tingting yumi no gat Jisas i stap wantaim yumi bilong harim olgeta samting yumi laik askim, na bilong helpim yumi olgeta taim.

Sampela ol i pret, na mekim trabel i kam long ol. Olgeta de ol samting i soim marimari bilong God i stap nabaut long ol. Olgeta de ol i kisim ol gutpela samting God i givim ol long marimari, tasol ol i no tingting long dispela blesing. Olgeta taim ol i tingting long samting nogut ol i pret i ken kamap long ol bihain. Sampela taim sampela liklik trabel i stap wantaim ol, na dispela liklik samting i pasim ai bilong ol long lukim planti gutpela samting i stap - long ol dispela ol i mas tok tenkyu long God. Ol trabel i kamap long ol, em i bilong bringim ol long God husat em inap long helpim ol. Tasol taim ol trabel i mekim bel bilong ol i kirap, na ol i toktok nogut, dispela pasin bilong ol, i mekim ol i go longwe long God.

Dispela pasin bilong lusim bilip olsem i gutpela, no [120] nogat? Bilong wanem yumi no tok tenkyu long God na no gat bilip long en? Jisas em i pren bilong yumi, na ol bilong heven i tingting long helpim yumi. Yumi no ken larim ol liklik trabel na pret i kamap long yumi long olgeta de, i ken mekim tingting bilong yumi i kirap nogut, na mekim pes bilong yumi i lusim amamas. Sapos yumi mekim dispela pasin, bai olgeta de yumi ken painim trabel bilong mekim yumi pret nogut. Yumi no ken tingting planti tumas long olgeta liklik trabel long olgeta de. Dispela pasin i save kirapim nogut bel bilong yumi, na mekim yumi olsem yumi no ken winim ol traim.

Sapos yu gat trabel long wok bilong yu na trabel i save kamap bikpela moa inap long mekim ol mani bilong yu i lus, yu no ken larim bel bilong yu i kirap nogut na lusim bilip. Olgeta hevi bilong yu, em yu mas putim long han bilong God, na bel bilong yu i ken isi na yu no ken pret. Prea long God na askim em long givim save long yu long lukautim gut wok bilong yu, na bikpela trabel i kamap long yu i ken pinis. Yu mas mekim ol samting yu inap long mekim bilong wok bilong yu i gutpela. Jisas em i mekim promis long helpim yu, tasol yu mas wok strong wantaim. Taim yu bilipim Helpim bilong yumi, na mekim pinis olgeta samting yu tu inap mekim, orait, larim ol samting i ken kam, na amamas.

God i no laik olgeta pikinini bilong en i ken hevi moa long ol trabel.

Tasol Bikpela bilong yumi em i no giamanim yumi. Em i no tokim yumi, “Yu no ken pret: i no gat trabel long rot bilong yu.” Nogat. Em i save, i gat traim na trabel i stap, na em i tokim yumi stret. God em i no mekim rot bilong kamautim ol pikinini bilong en long dispela graun bilong sin. Tasol em i soim yumi wanpela ples i strong moa. Em i prea long ol disaipel bilong en olsem, “Mi no beten long yu tekewe ol long dispela graun. Nogat. Mi beten long yu lukautim ol, na dispela man nogut i no ken bagarapim ol.” “Long graun yupela i gat hevi. Tasol bel bilong yupela i ken i stap strong. Mi winim pinis pasin [121] bilong dispela graun.” Jon 17: 15; 16: 33.

Taim Jisas i autim tok antap long maunten, em i skulim ol disaipel bilong en long pasin bilong bilipim God. Dispela tok em i bilong helpim ol pikinini bilong God long olgeta taim. Na dispela tok em i kam nau long skulim yumi, na strongim bel bilong yumi. Jisas i soim ol pisin lone pikinini bilong en. Ol i amamas na mekim gutpela krai. Ol i no save tingting long trabel. “Ol i no save planim wit, na ol i no save bungim kaikai na putim long haus kaikai, tasol God Papa i save lukautim ol. Jisas i askim, “Ating yupela i no winim tru ol pisin, a?” Matyu 6: 26. God Papa i lukautim man na kain kain abus; em i save givim kaikai long olgeta samting i wokim. Em i tingim ol pisin wantaim. Em i no putim kaikai long maus bilong ol stret, tasol em i mekim rot bilong ol long kisim. Ol i mas kisim kaikai long olgeta ples em i putim. Ol i mas kisim samting long wokim haus bilong ol. Ol i mas givim kaikai long pikinini bilong ol. Ol i krai amamas taim ol i flai long mekim dispela wok. Bilong wanem - “Papa bilong yupela long heven em i save givim kaikai long ol.” Ating yupela husat i eat save, na save lotu long God, yupela i no winim tru ol pisin a? God em i As bilong laip bilong yumi, na i lukautim laip bilong yumi, em yet i wokim yumi long pasin bilong em yet, ating em i ken lukautim yumi sapos yumi bilip long en, a?

Jisas i soim ol disaipel bilong en ol plaua bilong dispela graun. Planti i save kamap klostu klostu, na lukluk gutpela olsem taim God i wokim ol, na ol i soim God i marimari lone man. Em i tok, “Yupela i tingim gut ol plaua i stap ausait, ol i kamap olsem wanem.” Matyu 6: 28. Lukluk bilong ol dispela plaua ol yet i kamap nating long graun, i winim ol bilas bilong Solomon. Ol gutpela klos bilong bilas man i hatwok long mekim, i no inap tru long winim bilas na lukluk bilong ol plaua God i wokim. Jisas i askim, “Tude gras i stap long gaden, na long tumora bai ol i katim na tromwe long paia. Na kain gras nating olsem, em God i save bilasim. Olsem na yupela manmeri i gat liklik bilip tasol. [122] yupela i ken save tru. God bai i lukautim yupela tu.” Matyu

6: 30. God Papa em i wokim ol kain plaua ol i stap liklik na tumora ol i dai pinis, na em i wokim gutpela lukluk long ol - retpela, waitpela, na narakain narakain. Sapos em i wokim ol plaua olsem, olsem wanem long yumi husat em i wokim wankain olsem em yet? Em inap long lukautim yumi gutpela moa? Dispela tok bilong Jisas i ken mekim dai ol kranki tingting bilong man taim bilip bilong en i no strong.

God em i laikim ol pikinini bilong en i gat amamas, bel bilong ol i stap isi, na ol i save harim tok. Jisas i tok, “Bel isi bilong mi, em mi givim long yupela. Mi no givim bel isi long yupela olsem ol manmeri bilong graun ol i givim long yupela.” “Mi laikim amamas bilong mi em i stap long yupela, na dispela amamas i pulap tru long bel bilong yupela. Olsem na mi mekim dispela tok long yupela.” Jon 14: 27; 15: 11.

Taim man i tingting long em yet, na i no tingim wok bilong en, amamas bilong dispela man em i no gutpela, na kwiktaim i save pinis. Taim dispela amamas i pinis, laip bilong man i pulap long bel hevi na i no gat pren tru. Tasol taim man i mekim wok bilong God, em i ken painim bikpela amamas. God i no larim ol Kristen i wokabaut long ol kain rot ol i no save long en; em i no larim man. i stap nating bilong kisim ol kain tingting i hevi moa. Sapos yumi no gat planti amamas bilong dispela laip, yumi ken amamas long tingting long laip i ken i stap oltaim oltaim.

Tasol long dispela graun ol Kristen i ken kisim amamas i kamap taim ol i wokabaut wantaim Kraist. Jisas em i givim lait bilong marimari bilong en, na amamas olsem wanem em i stap wantaim ol. Olgeta de i ken bringim yumi klostu moa long ples em i redim long yumi. Olsem na yumi i no ken lusim dispela strongpela bilip bilong yumi. Yumi ken holim pas dispela bilip tru bilong yumi, na dispela bilip i save kamap strong moa long olgeta de. “Long olgeta taim bipo God i bin helpim yumi” na em inap long helpim yumi [123] long oltaim long laip bilong yumi. 1 Samyuel 7: 12.

Tingting long olgeta samting God i wokim long strongim bel bilong yumi, na long holim yumi olsem birua i no ken kisim yumi. Yumi mas tingting oltaim long ol gutpela marimari God i soim long yumi - taim em i mekim ai wara bilong yumi i pinis, taim em i rausim pen bilong yumi, na olgeta taim em i pinisim pret bilong yumi, na givim yumi ol samting long laip bilong yumi, na kapsaitim olgeta blesing long yumi. Ol dispela em i bilong strongim yumi long olgeta de.

Bambai planti trabel i ken kamap long yumi, tasol yumi ken tingim

wantaim ol samting i bin kamap bipo long yumi. Na yumi ken tok, “Long olgeta taim bipo God em i helpim mi.” “Strong bilong yu i ken inap long olgeta de bilong yu.” Diuteronomi 33: 25. Ol traim i kamap long yumi i no ken antap long strong God i givim yumi long winim dispela traim. Olsem yumi ken kisim wok bilong yumi, na wanem samting i kamap, yumi ken bilip bai God i ken givim yumi strong inap long winim ol traim.

Bambai ol dua long heven i ken op, na ol pikinini bilong God i ken go insait. Na long maus long King bilong glori gutpela tok i kam long ol na ol i harim olsem gutpela musik, “Yupela i gat blesing bilong Papa bilong mi! Bipo graun i kamap nupela yet na Papa i redim kingdom na i makim bilong yupela, dispela kingdom yupela i kam kisim.” Matyu 25: 34.

Long dispela taim ol manmeri Jisas i kisim bek i ken go insait long ples em i redim long ol. Long dispela ples man i wokabout wantaim ol, i no ken man bilong nogut pasin, giaman man, man i lotu long god giaman, man i mekim pasin doti, na man i no save bilip. Tasol ol i ken wokabout wantaim ol husat i winim Seten na long marimari bilong God i mekim laip bilong ol i stret tru. Olgeta pasin bilong mekim sin, ol samting i nogut i save bagarapim man long dispela graun, blut bilong Jisas i rausim olgeta. Na God i givim long ol, glori bilong Jisas, i winim tru lait bilong san. [124] Na pasin bilong Jisas i stap long ol - pasin i no gat wanpela sin, na lukluk bilong dispela i winim lukluk bilong glori bilong ol. Ol i no gat asua, na ol i sanap long bikpela waitpela sia king bilong God na ol i bung wantaim ol ensel.

Taim man i tingim dispela samting God i redim long em, “Bai man i givim wanem pe bilong baim bek laip bilong en?” Matyu 16: 26. Man i ken rabisman long dispela graun, tasol em yet bai i gat bikpela pe dispela graun i no inap givim. Wanpela man Jisas i kisim bek na mekim klin na tekewe ol sin, dispela man, taim em i givim laip bilong en long wok bilong God, i winim pe long olgeta samting. Na bikpela amamas i stap long heven wantaim God na ol ensel long wanpela manmeri Jisas i baim bek. Na dispela amamas ol i soim long sing bilong winim olgeta pait.